

撫晉奏議

禮

白大中丞撫晉奏議初刻序

虞書首載都兪其風邈已至

商周所傳訓誥一何盛也後

世得斯意者唯武侯宣公二

表奏議飢切詳盡詞取達而

可行意取誠而易動雖使千
百世下讀之者猶惻然感起
如與聞警咬觀迺指畫龍門
氏曰予雖爲之執鞭所忻慕
焉而今遇我

大中丞白公公於丙申之春
承

命撫晉未及朞季利罔勿舉弊
罔勿剔闔境寧謐民物亨阜
偶值燕見出所上諸疏稿以

示聖 跽誦之不禁額手舞蹈
思武侯宣公之在古今未始
不相及也遇更過之蓋武侯
所遇在漢末季勢限偏鄙宣
公邁唐中葉兵革膠擾故二
公忠愛憂勞之意時若有烏
咽隱忍未克盡展者而公
運際開國上奉

喆人是用中秉薦摯出以昌明

然亦有數難者蓋功臣言與

諫臣異諫臣多慙似可以言
自謝而功臣宜思爲主聽地
唯不言言必期允無嫌市恩
無疑揜息爲一難大臣言又
與新進異新進矜名似可以
一肯邀聽而大臣則期爲百
世計唯不言言必可久何曰
任怨何曰避名爲一難封疆
大臣又與朝宁大臣異朝宁
大臣守人主左右言者待機

聞者易信而封疆外隔地闊
事繁言之悉則瀆也匪曰尊
君言之間則畧也無曰盡計
又一難况前制設官務爲牽
掣互奪其柄僂于推卸而

昭代或仍厥舊寬卹乎武健者
自愧生忌持漙乎貪饕者留
隙生非持大體乎徧細者以
爲迂不切中難之不可勝述
也如此讀公諸疏若不知有


此數難者多閱艱險而見事
明不介嗜慾而赴事敏纚纚
洋洋莫驚急莫滯晦莫寬博
遲迴罔當形執宜乎有俞無
咈旦請夕行歌曰元首明哉
股肱良哉庶事康哉公之謂
也異日史官編纂

國史備載公諸疏爲千古光直
將與都俞比豈特如武侯宣
公徒令後世咨嗟歎息已哉

聖不敢以不敏辭謹僭爲之

序

山西提刑按察使今陞河南
布政司右布政前內翰林國
史院學士楊思聖頓首拜撰



白大中丞撫晉奏議初刻序
古人有三不朽立言其一焉
有著述之言子史是也有時
務之言奏議是也子史作之
千百世上垂之千百世下不

必其行之也奏議者奏一時
之務而見諸事行稍緩其時
不知其務則弗克有濟故貴
乎能識之也傳曰識時務者
在乎俊傑夫何時無務而俊
傑不常有則立言不亦難歟
今讀

大中丞白公奏議諸疏真可
謂俊傑真可謂識時務而能
立言者矣公開國勲臣有百

戰功其忠義素爲

主上所親信及建節晉中目覩
時艱凡爲百姓請命地方興
除利害諸事隨聞隨

請請輒報可甫一載所上二百
餘疏皆通達政體深切時務
夫世之奏議多矣未必事事
能悉民隱卽悉矣未必事事
能必

上聽公何以獨得於此歟惟公

天性豈弟寬嚴竝濟不如柔
不吐剛又平易近人捐去形
骸如家人父子故人樂進以
言而公亦隨事咨詢虛心採
聽所以人情物理靡不周知
問于事有未合思有未得者
輒終日不食終宵不寐必得
必合而後安或半夜偶憶一
事當行急起披衣索火書之
惟恐遺忘其敏于圖治類如

此至于荒糧一事尤所留意
晉自姜逆變後田疇半爲茂
草公爲百姓痛哭請除者數
四又滿兵始以分民之田而
遺其稅繼以王田償民田而
收其租田不逾額而稅租兼
輸民間剜肉醫瘡老弱斃於
催比有司累於考成當事者
心知其苦而莫敢爲之請因
循十餘年公至卽毅然行之

如解倒懸其果於任事又類
此及筆之于疏辭勿取繁期
於達意文勿取靡期於立誠
勿激勿抗期於溫厚和平達
則可通誠則能動溫厚和平

則閱者心開目豁不覺其言
之入此所以朝

上夕行罔或違拂固公之感格

有素亦以奏議之善也使稍

休于利害則顧畏心生不惟

撫晉書
不能言亦不敢言矣公若曰
誠上有碑於

朝廷下有益於百姓他非所計
已古稱俊傑能識時務而立
言者公其人哉僉請壽于梓

見公之所以福晉者如是且
使後讀公之言效公之行而
更以福晉於無窮也雖然此
特晉中一時之務耳他日入
秉

撫晉奏詩
後序
朝政宰天下務方致

君堯舜功德銘鼎爨立三不朽
業寧止一奏議已耶年侍公
久識公之志而樂行其道也
故忘其詞之俚而質言之聊

以記事云

山西分守冀寧道叅政今陞
江西按察使司按察使前內
翰林秘書院學士王舜年頓
首拜謹序



撫晉奏議初刻

目錄

卷一

入境報代疏

催道府州縣新官到任疏

清查解運未完錢糧疏

報擒賊魁李虎等弁撤兵日期疏

報獲脫逃犯弁王守志疏

請免吉州荒糧疏



請豁王所任波累贓銀疏

請免大寧縣荒糧疏

議動官支銀兩僱應牛車疏

報太原地震疏

題覆焦明綱招由疏

叅徐溝等縣隱盜越城不報疏

奏爲恭謝

天恩併報微臣入境交代日期仰祈

睿鑒事切照微臣才本疎庸識更淺陋向

廁風紀之地已不勝有尸素之媿頃

以晉省撫臣陳應泰調浙荷蒙我

皇上畀以撫晉之任臣以蚩力負山自揣

不堪重寄然受

國恩深重矢志捐報又不敢以力綿而

控辭也業於正月二十五日辭

朝束裝就道今於本年二月十八日入境
至平定州隨准前撫臣陳應泰咨送
到

欽給關防一顆令旗六杆令牌六面并吏
書文卷交代到臣該臣恭設香案望
闕叩頭祇領訖伏念三晉爲

神京右臂鴈代巖疆向經逆賊摧殘地
方新有起色臣惟有竭盡愚誠悉力
撫綏以期復元氣而起凋疲無負

皇恩於萬一耳至於文武將吏之臧否及
一切興革釐剔事宜容臣到任後次
第舉行續疏奏

聞所有入境交代日期合先馳

報伏祈

睿鑒施行

順治十三年二月十九日具

題奉

旨知道了該部知道

題爲晉省急缺道府州縣等官亟請

勅部速爲銓授星催赴任以資治理事竊

照三晉重地政務殷繁臣蒞任伊始
所藉以竭智分猷期收臂指之効者
惟監司及府州縣印官是賴也今臣
備查山西分巡河東道蕭應聘於順
治十三年二月內大察以才力不及
見在束裝就道鴈平兵備道柯臣報
陞山東督糧道亦在具文請代矣汾

州府知府王汝賢經按臣高爾位疏
叅降二級調用矣潞安府推官徐兆
慶經臺臣拾遺糾劾矣太原府屬平
定州知州夏世安因大察浮躁降一
級矣保德州知州楊士烜順治十二
年十一月內陞授陝西臨洮府知府
久已離任矣平陽府屬稷山縣知縣
姚延啓及汾州府屬臨縣知縣朱紹
鳳俱於順治十三年二月內奉文行

取矣以上道府州縣等官俱有地方
兵馬錢穀刑名民社之寄僉應亟請
勅部速爲銓補責令星馳任事者也臣更
有請者新缺之官應請補授其已選
之官而未經到晉者更當查催臣查
山西清軍驛傳鹽法道原任道臣周
召南於順治十一年十一月內陞山
東青登萊道彼時卽以福建分守建
南道于變龍陞補爲時已久迄今絕

無到任之期不知何故至於新選有
司如太原府屬陽曲縣知縣已補胡
虞潢榆次縣知縣已補熊光裕太谷
縣知縣已補秦羽徐溝縣知縣已補
方乾繁峙縣知縣已補麻爾賡崞縣
知縣已補齊洪勲興縣知縣已補陳
鎭平陽府屬臨汾縣知縣已補杜景
元浮山縣知縣已補郝中桂洪洞縣
知縣已補趙三長曲沃縣知縣已補

劉國禎汾西縣知縣已補畢昇夏縣
知縣已補鄭四端芮城縣知縣已補
郭嵩絳縣知縣已補鄭始寵潞安府
屬襄垣縣知縣已補鄭僑汾州府屬
石樓縣知縣已補周士章寧鄉縣知
縣已補何遷澤州所屬陽城縣知縣
已補李銘佩遼州所屬榆社縣知縣
已補王家桂和順縣知縣已補雷堪
以上四府兩州所屬新選知縣共二

十一員雖閱邸報俱經部銓有人然
皆到任無日倘或逍遙於京邸逡巡
於道途以致晉省如許員缺咸缺正
官料理當此地方多事之時更值一
切

欽案事件急如星火之候憑誰督責悞政
債事所關匪細爲此一併查明具

題伏乞

皇上俯念晉省重地治理需人卽

勅吏部將分巡河東鴈平兩道及前開府
廳州縣等官員缺速爲銓補併將已
報選授知縣胡虞潢等俱乞

天語嚴飭責令星馳任事不得任意遲延
有違憑限其清軍驛傳塩法道于變
龍久經推補已越年餘杳不到任必
有他故更祈併

勅吏部查明推補庶政務不致廢弛而臣
得藉手以資各官之新劄以共圖殫

精料理也

順治十三年三月十五日具

題奉

旨吏部知道

題爲晉餉徵解愆期從前怠玩可駭謹

查積逋數目特疏題

報仰請

睿鑒事竊臣以謏劣菲材仔肩重任中心
兢兢不啻履冰自知智短力綿惟有
將勤補拙庶幾可以竭盡駑駘期副
我

皇上任使之恩於萬一耳臣自受事以來
日拮据於簿書之中查催一切未完

欽案事件稽覈一切本折起存錢糧及察
文武將吏之臧否地方民情之疾苦
并各營官兵設防之信地事事留心
夙夜匪懈將已二旬餘日方得漸知
次第除各項興革事宜容臣陸續條
奏外惟是清覈錢糧乃第一喫緊要務
今查晉省歲徵地土人丁各項錢糧
除奉

旨蠲免并撥補滿洲圈過民地撥還王田

銀兩外又除存留本省三關太原平
陽潞安汾州等營兵餉及驛站官役
俸薪工食外其應解戶禮兵工四部
錢糧俱係額設惟正之供自應逐年
完解不容逋欠至於每年奉戶部派
撥輓解秦川宣大等處兵餉更係各
鎮計口授食所藉以按月給散者尤
當逐年照數飛輓以濟各鎮急需不
容愆期今臣備查順治八年分應解

戶部正項除撥解各鎮兵餉外尚欠
解部銀叁萬壹千壹百伍拾壹兩壹
錢零九年分除前撥解并十三年奉
文續撥各鎮兵餉外尚欠解部銀柒
萬壹千壹百陸拾壹兩陸錢柒分零
十年分除前撥解并十三年奉文續
撥各鎮兵餉外尚欠解部銀陸萬肆
千捌百玖拾肆兩貳錢柒分零十一
年分盡撥各鎮兵餉原無解部銀兩

十二年分除前撥解并十三年奉文
續撥各鎮兵餉外尚欠解部銀貳千
陸百壹拾肆兩玖錢零以上節年共
欠解戶部銀壹拾陸萬玖千捌百貳
拾壹兩玖錢肆分零而十三年之撥
剝應解部者不與焉又查歲解禮部
羊價藥材等銀節年全完其十三年
分全未解也查歲解兵部柴直銀兩
惟十二年分尚欠貳百肆拾柒兩十

三年分亦全未解也又查歲解工部柴夫等銀九年分未完捌百肆拾叁兩壹錢壹分零十年分未完捌百壹兩柒錢伍分十一年分未完壹千壹百壹拾伍兩壹錢捌分零十二年分未完壹千壹百柒拾兩伍錢肆分以上節年共欠解工部銀叁千玖百叁拾兩伍錢捌分零而十三年亦全未解此查明節年逋欠各部錢糧之確

數也至於備查節年戶部撥解秦川等鎮兵餉除已完不開外順治八年未完宣鎮兵餉銀陸萬壹千叁百肆拾壹兩貳錢壹分零未完易鎮兵餉銀壹萬壹千貳百肆拾伍兩捌錢玖分零九十兩年全完十一年分未完宣鎮兵餉銀叁萬壹千柒百捌兩叁錢捌分零十二年分未完宣鎮兵餉銀陸千捌百陸兩貳錢壹分零未完

秦省兵餉銀貳拾貳萬壹千柒百叁拾叁兩壹錢玖分零又奉部文將十一年分撥剩未完銀續撥秦省十二年分兵餉未完壹拾叁萬陸千柒百壹拾兩續撥大同鎮十二年分兵餉未完肆萬貳千壹百伍拾貳兩壹錢貳分零又奉部文將太原府屬十年分未完續撥四川十二年分兵餉銀貳萬壹千陸百伍拾壹兩捌分全未

完總而計之節年逋欠撥解秦川宣大易鎮兵餉銀通共伍拾叁萬叁千叁百肆拾捌兩捌分零而十三年又奉文撥節年未完銀內解宣薊秦餉共壹拾玖萬捌千兩亦於九十十一年二年解部未完內除解至撥兌本年兵餉尚在催解不與焉臣察覈未竟大爲驚駭不禁汗流浹背夫以臣子受

命一方各有職守顧名思義各當自勵不容曠竅至徵輸糧餉上所以供

朝廷帑藏之需下所以濟士馬飽騰之用

繫

國儲而關軍需寧可以膜外視之乎今
晉省應解戶部餉銀八年起十二年
止欠至壹拾陸萬玖千餘工部柴夫
銀欠至叁千玖百叁拾兩餘惟禮部
全完而兵部止欠十二年分貳百肆

拾柒兩至節年撥解各鎮兵餉亦自
八年起十二年止共欠伍拾叁萬餘
兩又十三年新奉文撥兌節年未完
內解宣薊秦餉銀壹拾玖萬捌千兩
不知從前經徵等官所司何事迭欠
如許又不知從前有錢糧之責者何
故而不力催以致積年逋欠也如云
實欠在民則催科無術者亟應察處
若云已徵在官則係何處侵那倘云

時值荒歉催輓維艱則應蠲應豁已
疊奉

恩綸除出額徵之外矣此臣不能爲從前
各官解也今山西左布政使彭有義
以

輯瑞大典在京俟其旋省臣當與之逐年
清楚逐府逐縣細查斷不使少有侵
挪之弊但目今催餉之檄文如羽而
部差滿洲章京完兒哈見在守催臣

雖係新任既迫於

上供錢糧之不可緩復念切秦川各鎮兵
餉之不可遲晝夜焦勞五內如炙今
臣固不敢以前逋非臣任內之事少
爲推諉亦不敢經此題

報卽冀免戾除一面亟行設法嚴催不遺
餘力外謹將節年逋欠解兌餉銀數
目先此具

題伏乞

皇上睿鑒

勅部查明嚴飭行臣遵奉施行

順治十三年三月十五日具

題奉

旨據奏山西餉銀拖欠如許向來何無察
催着嚴核議奏該部知道

題爲恭

報滿漢官兵勦滅山寇及撤兵回省日期
仰慰

睿懷事案准兵部咨爲密報叛渠潛結情
形等事該本部題覆山西巡撫陳應
泰題前事等因內開該臣等看得晉
撫疏稱逋犯虞胤劉三元勾結賊渠
李虎等聚黨山谷陰謀不軌不可不
蚤爲撲滅應從所請令會太原駐防

章京趙和諾密定方畧設法擒其叛首散其脅從勿令渠魁免脫禍及無辜等因具

題順治拾貳年拾貳月二十五日奉

旨依議速行欽此欽遵密咨到院該前院臣陳應泰卽密商駐防章京趙和諾遣發滿漢官兵於本年二月初九日至沁源縣算盤烏頭等山遇賊對敵殺死賊頭李虎擒獲賊黨羅景等多

賊俱經分守冀南道袁一相會同領兵章京汪旦等審明正法獲李虎等妻妾子女二十九名口及劉三元弟劉三重并賊馬騾驢十七匹頭盔甲鎗刀等項已經前撫臣陳應泰具

題在案嗣後又據分守冀南道袁一相塘報將李虎頭目蘇虎捉獲會審斬訖得獲大小馬二匹刀一口僞總兵水關防一顆等因臣此時方入境受

事恐根株不靖萌孽易生隨飛飭道將再加搜勦去後二月二十五日又據守南道袁一相汾州營叅將李正芳塘報內稱於二十日滿漢官兵在霍山盤嶺山開虎山糜則村山內搜勦將李虎賊黨劉大安喬應元任國盛侯二郝懷輦竇成金盧佐郝登江等多賊當陣斬訖捉獲侯二等賊妻郝氏等十九口得喬應元偽劄一張併馬騾器甲等項據此本年三月初五日又據該道袁一相該將李正芳等塘報內稱沁山諸賊業已廓清餘黨逋匿霍州等處滿漢官兵於二月二十八九及三月初二等日在霍州靈石武鄉趙城三縣搜勦得獲李虎遺黨任國興閻三王時宰無禮兒歪蹄虎王自冬王貴龍皮五因帶傷難解該道將公同章京審明俱斬訖又

獲賊婦武氏等一十一口馬八匹騾
三頭及刀鎗等項據此俱經徹臣節
報兵部訖今又據該道將塘報三月
初九日該沁源快手於交城縣葫蘆
山將李虎遺黨閻友祿拿獲因滾崖
折腿寄監斃獄得獲馬三匹騾駒一
頭等情各塘報到臣據此該臣正在
繕疏題

報聞又准兵部咨爲密報叛渠潛結等事

該本部題覆前撫臣陳應泰題

報官兵入山擒勦李虎等緣由該臣等看
得撫臣陳應泰疏報滿漢官兵入山
殺賊將行間滿漢文武題

請敘錄但查官兵斬獲不過零星原報渠
魁止報殺死李虎餘皆兎脫在事文
武均難論功應

勅該撫將見獲李虎等妻子嚴訊虞胤等
勾結實情併逃竄下落速行捕緝叛

屬劉氏等俱應變價入官馬騾器甲
留營應用劉三重果否與劉三元同
居共謀審明具

奏李鳳翼既供首叛情量減奏

請撤兵事宜相應准從等因具題順治十
三年三月初五日奉

旨依議行欽此欽遵密咨到臣准此除備
行分守冀南道臣袁一相欽遵

旨內事理將李虎等妻子嚴訊虞胤等勾

結下落再行緝捕劉三重果否與三
元同居共謀審明詳報李鳳翼量減
具詳以憑覆核具

奏叛屬劉氏等變價入官馬騾器甲留
營應用外該臣看得李虎一逆乃巨
魁也蘇虎等多賊皆巨黨也嘯聚於
沁源山中意圖不軌盤踞於險要處
所志在負隅奉

旨檄發滿漢官兵搜勦所以爲民除害務

宜靖絕根株今疊次緝剿已將有名
各逆如李虎蘇虎侯二任國興任國
盛并同夥賊黨喬應元等多賊前後
盡行授首得獲婦女馬騾器械等項
俱已節次咨報兵部訖查據該道詳
報惟有虞胤一賊係陝西人原無踪
跡劉三元係平遙人見獲其弟劉三
重已飭該縣多方躡緝喪魄孤魂或
亦不難物色而就縛也但東山一帶

賊氛既靖則官兵久勞於外亟應休
息且時值春農正宜招徠小民及時
耕作理應撤兵以便春農該臣卽會
同城守章京趙和諾商妥於三月初
五日行文守南道將滿漢官兵盡撤
回省惟量留權店汾州官兵一百五
十名駐防要隘以備意外之虞仍曉
示流離小民亟亟歸農各安生理是
沁山一帶地方盡已寧謐而奉

旨擒渠散脅之事業已告竣矣所有撤兵日期及節次續報擒斬賊渠理合備行題報至於山賊既靖勦局已完在事滿漢官員應否俯如前疏所

請量行敘錄以彰

朝廷鼓舞羣工之典統惟

睿裁非臣所敢必也

順治十三年三月二十日具 題奉

旨兵部察議具奏

題爲申報逃人事順治十三年二月三十日據山西按察司呈問得犯人一名王守志招詳緣由該本司按察使楊思聖覆詳看得王守志貪殘惡弁假禁左道爲由洗擄鄉曲是實妖教毫無的據夾弔齊加索詐稍有不遂身手立斷造孽一方民不聊生相激爲變勢所必然無論罹其害者痛心卽聞其事者豎髮守志自知情罪深

重先時而逃及奉

旨正法已爲漏網之魚矣致使寧道受其
罰而捕役受其比及後訪知事久

題銷途乃現身潛至入門盤獲天耶人
耶本司欲嚴提証佐以彰罪蹟事經
兵火死傷病故實無遺類可審應將
守志立寘典刑以昭

國法雖欲援

赦求免奈不符情事何烏能爲彼寬也將

守志取問罪犯議得王守志所犯比
依牧民官非法行事激變良民者律
遵

旨處斬緣係重刑牢固監候轉詳待報處
決等因呈詳到臣據此該臣看得王
守志以寧武克棍而營署利民將務
儼是一方保障也乃不思束兵愛民
而卽恣睢無忌任意貪殘假禁左道
爲名將各屬地方蔣家峪乘機搶洗

刀砍箭傷及去人兩手詐取牛羊劫掠婦女財物罪惡種種皆真向經督撫按諸臣查勘明白已經會

題部覆奉

旨處決不期正在遵行而守志自知罪在不宥卽借事脫逸積年躡緝並無踪跡以致該道受罰捕役受比終不能獲前任撫臣劉以守志爲脫置之兎漏網之鯨必難物色故具疏

請銷以結

欽件今守志以案冷潛回輿搬家口當被盤獲豈真自投網羅良由天道難容自應仍照

前旨處斬庶足以伸

國法而儆奸貪以慰同年蔣家峪被害之衆寃也烏得援貪官免死之

恩赦而寬此魚肉人民之巨憝乎旣經該司審明具招前來相應具

題伏乞

勅下該部再加覆議上

請行臣遵奉施行

順治十三年三月二十四日具

題奉

旨三法司覈擬具奏

題爲吉民傷亡最慘包荒粉骨難支情
極籲天存活子遺事順治十三年四
月初一日據山西布政司呈據平陽
府申承奉本司劄付蒙前巡撫陳都
御史案驗准戶部咨山西清吏司案
呈奉本部送准山西巡撫陳都御史
咨請豁免吉州荒地糧銀緣由前事
到部奉批司查甘結併發送司奉此
查得晉省傷亡荒地蓋因姜逆倡亂

人民離散以致拋荒不過一時非可
與年遠久荒之地同日而論已經前
撫題

請蠲豁本部覆准免其八九兩年錢糧迨
至十年

奏銷業已造入實徵項內無容再議矣
前據吉民張宣化等因前項荒糧派
徵無主勢必加之熟地慮有包賠之
累具控本部移咨晉撫確查去後今

准咨稱行據布政司查得該州原報
傷亡荒地肆百伍拾叁頃柒拾肆畝
玖分零除前後州官招墾過壹百貳
拾叁頃叁拾貳畝貳分零尚有實荒
無力開墾地叁百叁拾頃肆拾肆畝
零該糧折銀壹千肆百壹拾肆兩肆
錢肆分零咨請豁免前來但事關

國賦本部未便遙擬遽爲請豁相應咨
回晉撫覆查明確如果實荒無主速

與具

題以憑議覆可也等因呈堂奉批照行
送司奉此案呈到部擬合就行爲此
合咨前去煩爲查照施行准此擬合
就行爲此仰本司官吏照依咨案內
事理卽將吉州實荒無力開墾地畝
叁百叁拾頃肆拾肆畝零該司覆查
明確如果實荒無主限十日內具詳
本院以憑具

題請豁毋得過限遲違未便等因蒙此
擬合就行爲此仰本府官吏查照原
文內事理卽將吉州實荒無力開墾
地畝叁百叁拾頃肆拾肆畝零該府
確查明白如果實荒無主限三日內
具詳本司立等覆核轉呈具

題施行毋得違限遲延致煩提究未便
速速奉此已經備行吉州確查去後
今據該州申稱該本州知州紀振邊

覆看得吉州係傷殘最苦人稀土瘠
之區也闔州地土強半拋荒所在子
遺十存一二八年二月內奉

旨蠲免傷亡荒糧壹千玖百叁拾餘兩勒
令開墾二年後起科者蓋言有人開
墾則於二年後起科也奈本州民貧
地薄無力開荒除九年前任曹知州
開過叁拾米頃伍拾米畝陸分伍毫
早職十年奉有三年後起科之文亦

再四勸諭續開墾過荒地捌拾伍頃
柒拾貳畝陸分二次共開墾過荒地
壹百貳拾叁頃叁拾貳畝貳分伍毫
該糧銀伍百壹拾捌兩肆分零尚有
無主實荒無力開墾地叁百叁拾頃
肆拾肆畝零該糧銀壹千肆百壹拾
肆兩肆錢肆分零委屬人民稀少血
盡毛乾至今秦蕪滿野萬難開墾者
已經屢查鑿鑿可據不敢一字涉虛

自干

功令懇恩憲慈弘開惻隱具

題請豁殘黎更生之日也緣係覆查荒糧事理卑職未敢擅專擬合覆詳等緣由申詳到府據此該本府知府李月桂看得吉州荒地叁百叁拾頃肆拾肆畝零該糧折銀壹千肆百壹拾肆兩肆錢零遺地包賠困苦堪憐及至限滿例應起科糧石詳稱人亡地

荒無力開墾於是吉民張宣化等恐有包荒遺累之控也既據確查明白具詳前來相應轉請或蒙邀恩具

題請豁再造之典出自上司非卑府敢於擅專也等緣由具申到司據此該本司潘右布政使覆看得吉州傷亡荒地叁百叁拾頃肆拾肆畝零該糧折銀壹千肆百壹拾肆兩肆錢零自順治十年至十二年共計三載人亡

地廢實難開墾以致

國賦空懸吉民傍惶恐有以熟包荒之累是以張宣化等有此哀籲呼蠲之控也既經該府查議請豁前來相應呈請合候本院覆核具

題蠲免施行等因呈詳到臣該臣看得吉州地處山僻土瘠民貧自六年間因姜逆叛亂蹂躪殆遍以致士民傷亡者多故有拋荒地肆百伍拾叁項米拾肆畝零業經前撫臣劉具

疏題

請豁免八九兩年錢糧在案迨自十年開徵起科除開墾過壹百貳拾叁項叁拾貳畝零尚有實荒無力開墾地叁百叁拾項肆拾貳畝零該糧銀壹千肆百壹拾肆兩肆錢肆分零吉民張宣化等慮恐責之見在殘黎包賠是以赴部控籲誠出於民情之萬不得

已也嗣戶部咨行前撫臣陳

已

經查明咨覆戶部請豁後准部咨復
行確查如果實荒無主速與具

題以憑議覆等因今行據司府詳稱吉
州人亡地荒前項地畝委實無力開
墾而十十一年分

國賦空懸若不邀

恩豁免恐見在之子遺無力包賠必致遷
徙倘將熟者續荒更爲不便也既經

該司確查呈詳前來臣謹會同按臣

高 合詞具

題伏乞

勅下該部覆議

請豁施行

順治十三年四月初九日具

題奉

旨戶部議奏

題爲號天急救蟻命以活子遺事順治
十三年四月初五日據山西按察司
呈行據太原府呈據靜樂縣申前事
等因到司據此該本司按察使楊思
聖覆詳看得王所信正法之後應追
還庫贓銀陸百柒拾玖兩叁錢變賣
家產止得壹百叁拾伍兩伍分遂貽
累親弟所佑而佑因事流徙卽拘堂
兄所任而追賠焉止完銀叁百陸拾

肆兩零今任監追三載寸土無遺本
司嚴駁屢追府縣詳稱所任鳩形鵠
面與鬼爲隣卽斃於獄而壹百米拾
玖兩之贓萬無抵償况所任之子生
員王丕顯援

恩赦事例凡有應追入官錢糧家產盡絕
槩行豁免不得株連親族而所任正
其親族也已經一控撫院再控按院
皆批司查報本司以事關庫銀未敢

擅豁且其本縣同隣佑悉具甘結果
無家產可變若稍有追處則印官斷
不肯輕百里之寄而代爲罪犯分過
也相應推廣

皇仁好生之德寬宥豁免而留一綫殘喘
於囚人也等因呈詳到臣據此該臣
看得王所任乃已經正法王所信之
族兄也六年姜賊煽亂所信曾授靈
石縣偽職侵費庫銀陸百柒拾玖兩

叅錢先經

題明在案其銀應照追補庫及將所信家產盡行變賣僅得銀壹百叅拾伍兩零其餘無可着落卽就伊胞弟王所佑行追旋而所佑又解部流徙亦斃矣故遂波及於其族兄王所任也

在所任實係無辜累及情殊可憫經今數載連前所信之銀共止變完伍百兩而所任之家產又變盡而無可

敲朴矣尚該銀壹百柒拾玖兩叅錢嚴加追比終屬無益惟有骨立待斃耳疊經批駁司府嚴查業已不遺餘力今據司府詳稱取有鄉隣里老以及印官甘結請豁前來臣細加詳核在所任果屬無辜之累欠銀勢不能完似應遵照

恩赦豁免以廣

皇上浩蕩之洪恩也

順治十三年四月十五日具

題奉

旨刑部議奏

題爲詳請蠲免荒糧以甦民命事順治
十三年四月初三日據山西布政司
呈內開看得大寧縣荒地捌佰米拾
項貳拾肆畝伍分該糧折銀肆千貳
百壹拾伍兩伍錢伍分零又加增銀
肆佰米拾壹兩伍錢零驛站銀貳百
叁拾肆兩陸錢零荒苦情形屢經確
勘前詳備悉無庸再贅祇緣請蠲年
分未晰遂蒙洞鑒下詢今據府縣詳

稱荒地之累自順治七年荒亂頻仍
至今十三年地荒人亡賦稅虛懸委
不堪生是以吳知縣代民求蠲歷年
之荒亡又經該府覆查前來似非虛
謬除逃亡人丁另飭該縣搜查幼丁
頂補外相應呈請合候本院覆酌具
題等因呈詳到臣該臣看得大寧一縣
乃彈丸小邑也年來疊罹荒殘以致
閭閻士民淪亡渙散前經知縣吳興

祚具詳哀籲爲民請命司府詳議委
官踏勘實係人亡地荒並非虛謬故
前撫臣陳 已敘述凋瘵情狀會
疏題 請豁免荒地錢糧在案祇緣
荒蕪年分未經開明故奉部覆

俞旨再行確查今據司府詳稱前項荒地
自順治七年荒旱頻仍至今十三年
尚屬人亡地蕪

國賦空懸民苦日深委難存活除新亡

人丁臣嚴飭該縣搜查幼丁補額外
既經該司呈詳前來臣謹會同督臣

馬 按臣高 合詞具

題伏祈

皇上軫恤大寧荒殘最苦

勅下該部覆議將荒地錢糧蠲豁上

請行臣等遵奉施行

順治十三年四月十五日具 題奉

旨戶部議奏

題爲遵

諭陳言以備採擇事順治十三年四月初

八日據山西驛傳道呈蒙前任巡撫

陳都御史案驗准兵部咨車駕清吏

司案呈奉本部送兵科抄出該本部

題覆戶部咨山西清吏司案呈奉本

部送戶科抄出該本部題覆山西等

處提刑按察使司分巡河東道副使

蕭應聘題前事等因奉

旨該部議奏欽此欽遵抄出到部送司奉
此相應議覆該臣等看得各驛車牛
勢所必需取給民間誠屬騷擾查晉
省四十五驛每年額設官支銀壹萬
壹千叁百肆拾叁兩叁錢壹分陸毫
例供廩糧之費廩糧所費無多應

勅該撫責成驛傳道查照地方衝僻酌定
用車多寡將官支一項通融撥發置
買車牛以供公務不得虛文塞責貽

累民間每年卽以官支銀爲修車飼
牛之資置買完日具疏

奏報等因題覆奉

旨依議行欽此欽遵抄出到部蒙批行送
司奉此相應移咨案呈到部擬合就
行爲此合咨前去煩爲查照本部覆
奉

旨內事理欽遵施行准此擬合就行爲此
仰本道官吏查照部覆奉

旨及察咨文內事理置買車牛完日冊報
本院以憑覆核

奏報施行蒙此又蒙總督馬侍郎案驗
准兵部咨同前事亦案行到道蒙此
又准布政司照會蒙巡撫陳都御史
案驗亦同前事等因到道准此隨備
行太平潞汾四府澤遼沁三州查照
地方衝僻酌定用車牛多寡將官支
一項通融撥發置買車牛詳議妥確

造冊呈報以憑彙詳轉報去後今據
各議覆前來該提調學政帶管驛傳
道僉事孫縉看得晉省額設官支銀
壹萬壹千叁百肆拾叁兩叁錢壹分
陸毫奉文止照勘合火牌應付其餘
一槩裁禁故官支一項尚有餘剩也
今議將前銀置買車牛以供不時差
撥誠爲軫恤民瘼至意但據各府議
詳本道再四詳酌誠有萬難行者如

所議置車一輛用牛二隻計置辦車
牛之價每驛衝者止置四輛僻者置
三輛二輛不等其車夫飼牛食料每
輛約計歲費銀壹百貳拾餘兩晉省
四十五驛總以三輛計之約一百三
十餘輛歲計總費食料銀壹萬陸千
伍百餘兩是所用之數併浮於官支
之數矣其不便者一也至滿洲差撥
軍需押運歲止數次而動需數十輛

平日空閒坐耗食料臨差之時每驛
又非三四輛足以充用者勢必仍累
民間其不便者二也若每年牛隻倒
斃則需買補車輛損傷則需修葺前
項食料等費尚多不給憑何設處以
爲補牛修車之費乎其不便者三也
况晉地山路巖嶮多輸轅不可施行
之地此車牛不必置買誠有如各府
所議矣應以十三年爲始凡遇用車

每輛給民腳價銀壹兩農忙加銀叁錢印官當堂給發不假吏胥之手按季登報歲終開銷庶官支不致虛糜小民亦免苦累此爲經久可行之法等因呈詳到臣據此該臣看得驛遞原無設備牛車之例祇緣晉省係川陝往來孔道間有滿洲家口及運送軍器等項非馬騾可以駝載部撥牛車運送此亦一歲中間或有之事驛

遞旣無牛隻應用車輛勢不得不派取于民間然而閭閻小民終歲南畝惟藉耕牛是耕牛者實民命所關一遇差撥用其牛必用其車而又并用其人不但廢其農事且派貼盤費重載傷牛遇有悍差威逼越站索錢鞭撻無所不至以致牛瘠車損財罄人病此誠民間最苦之事巡東道臣蕭應聘議請各驛設立牛車誠有見而

然也部議令動官支一項錢糧查照
地方衝僻置買牛車奉有

俞旨此誠我

皇上軫恤窮簷浩蕩之仁凡屬臣子孰敢

不仰體

德意亟亟置買以供公務而甦民困乎但
據各道府之詳議反覆圖維實有萬
難施行者不必論晉省四十五驛酌
量衝僻以定牛車多寡總以三輛約

計需車一百三十餘輛官支一項有
限不足爲造車買牛之費且凡遇用
車輛之差或三二十輛或五七十輛
原非數輛可以應付勢必仍累于民
况用車之差非常有之事空閑無益
徒滋糜費且晉地山路巖嶇之處居
多非一槩輪轍可以馳驅此牛車之
不便置買無庸再議者今該道議以
十三年爲始遇用牛車每輛給民脚

價銀壹兩農忙之際加以叁錢卽動
官支一項給發不經胥役之手按季
登報歲終彙銷在小民不致苦累公
務得以有濟而亦不虛

皇上諄諄愛民之盛心矣此事之最便者
也旣經該道詳議前來臣謹會同督
臣馬 按臣高 合詞具

題伏乞

勅下該部議覆上

請行臣等遵奉施行

順治十三年四月十五日具

題奉

旨兵部議奏

題爲地震事順治十三年四月十五日
據太原府申前事內開據本府陰陽
官湯銘盤報稱本年四月十四壬戌
日丑時忽然地動從坎至震而止等
情到府申報到臣據此該臣看得天
主動而地主靜蓋地乃坤象所以承
順天施而生物也宜靜而不宜動動
則失其常矣三晉自姜逆蹂躪之後
連年荒歉民不聊生臣自蒞任以來

所屬川縣或請蠲豁錢糧或請設法賑濟紛紛見告殆無虛日每遇公出則羸士饑民擁馬呼籲而求賑恤者真不啻觸目而酸心也至于五臺寧武一帶饑疲更甚縣官董以威向鄰邑募措糠粃以救之情尤可憫咸望今歲二麥豐登少濟殘喘乃不意自春徂夏亢陽不雨風霾日見以致二麥枯槁不能發生臣見在率屬修省虔爲祈禱於四月十四日丑刻臣正焚香告

天爲民請命倏轟轟有聲自北而起戶牖皆震臣如站立舟中戰慄不已知爲地震矣此皆

上天垂戒罪在臣子而臣係撫治通省者負罪更重除一面飛飭文武將吏恪盡厥職善撫災黎嚴愆武備仍率屬倍加修省以圖銷弭外理合題

報伏乞

睿鑒施行

順治十三年四月十六日具

題

題爲窩通大寇賂官讐証爲

國隱憂伏乞

勅部提剿以靖地方以救民命事順治十三年四月初八日據山西按察司呈問得犯人一名焦明綱招詳緣由該本司按察司會同守巡冀寧道看得事可以叩

聞而請者非當下不可白之寃必易世不能釋之怨未有已則無寃人且無怨

奔馳千里挺而走險以爲背城一戰
可得志於梓里此焦明綱之刁而惡
也如土寨綱所有也積穀非綱所有
也以非我所有者修我之所有應爲
未雨之防而作綢繆之計何慮不及
此久假不歸羣起而攻坐之以法自
來伊禍於人何尤輒乃駕詞罔

上不曰搆叛卽曰投誠不曰觀兵卽曰窩
盜甚以僞總兵搶驛馬等語鋪張其

事且誣私蓋龍樓置造旗鎗爲不經
之說而以陸千金賄囑縣官爲聳聽
之詞謀之不臧抑至於是而謂知有
王法者哉前具由詳顛末悉載今奉憲
批會同守巡兩道親鞫誠惠愛元元
不欲存荆棘以敗嘉禾也及逐訊皆
虛張騰芳等同詞不二合擬誣告總
徒以儆刁風將明綱問招呈詳巡撫
白都御史蒙批據詳會審焦明綱卽

閹之詞盡虛則罪在誑

君誑縣官以陸千之贓不實則係挾制官
府汚人名節律有明條恐未可僅以
誑告人死罪未決者律律之也如此
巨憝法不可縱仰司再行確擬詳報
繳蒙此該本司按察使楊思聖覆看
得焦明綱目中既無

王章筆下焉有官長惟知羅織以聳一
時之聽豈慮庭鞫難逃三尺之公玷
汚名節何語不巧害人身家何事不
誑誅其心原無一面可開論其詞幸
而

九重未達擬以挾制官長誑以曖昧事者
應發附近充軍其於明綱亦自謂僥
倖也將明綱取問罪犯議得焦明綱
所犯焦明綱若奏張騰芳富可敵

國私益昺翰五龍樓心懷不軌荼毒生
民窩國大盜鈎連大寇姜瓖爲外應

稱僞總兵等官私造旗鼓鎗刀等項
及焦騰芳常毓瑜爲盜張騰芳等合
坐以謀叛斬罪今虛焦明綱合依誣
告人死罪未決者律杖一百流三千
里加役三年比照已徒而又犯徒總
徒四年照例免其徒杖定發附近衛
所充軍終身候詳允日拘妻僉解招
達兵部知會供明張騰芳等各查發
寧家照出焦明綱係軍罪取收管繳

報餘無再照等因呈詳到臣該臣看
得焦明綱係先經斥革之劣衿也性
同豺虎惡類鴟梟其豪霸一方魚肉
鄉曲者匪伊朝夕矣本村有土寨一
座內貯餼糧乃衆村居民避亂之所
向立明綱爲寨長凡有運糧入寨者
每石抽存三升以資修寨之用兼備
賑濟之需此誠地方之公事向以明
綱具有人心故衆盟而重托之豈意

寨塌欲修明綱頓渝前議將積穀三百餘石鯨吞不吐以致各村士民李鐸等羣起而索之具告於按臣批行提學道究追爲明綱者稍有良心宜其悔艾而不遑也夫何目無法紀竄逸都門捏張騰芳等以叛逆重情誣縣官以受賄枉法意興一網打盡竟爾繕疏投司當

天威咫尺之間

國法森嚴之地明綱竟昧昧行之而不疑不懼誠可爲膽大包天目無

王章者幸通政司臣以虛實未明咨行臣等查審尚未輕賣

宸聰蓋司臣閱疏之際早已燭其虛誕而未必可信矣今按其詞而歷經勘訊如構叛投誠觀兵窩盜搶驛等款盡屬信口誣罔而無憑至污縣官范繩祖受賄縱盜之事尤屬誣誕不經而

無影兩造具陳真情畢露明綱始僞
首無言矣總之明綱以蛇蝎之心行
魍魎之事惟圖擇人而食報復張騰
芳李鏘等索糧之讐而不自知其非
故以斥衿而猶稱生員妄行叩

聞自陷欺

君犯上之罪也按律遣戍猶有剩辜旣經
該司問招呈詳前來臣覆核無異謹
會同督臣馬 按臣高 合詞

具

題伏乞

勅下該部議覆上

請行臣等遵奉施行

順治十三年四月十九日具

題奉

旨刑部核擬具奏

題爲縱盜出入城垣文武隱諱不報特
行查叅以重封疆事竊照晉民稟賦
剛強性多兇悍少有不足卽糾覓爲
盜輕視死生每以身家等之鴻毛也
自姜逆叛亂之後民心少輯地方小
康然而餘孽未靖伏莽甚多且連歲
荒歉奸宄叢生凡有城社之寄者咸
當晝夜砦防不便徃安瞬睫致生意
外之失脫遇賊警更當隨時勦捕不

便隱諱疎縱致釀將來之患臣蒞任以來疊經申飭期保無虞乃聞所屬各縣有先經盜賊數十越城出入劫官有據而隱諱至今不行申報者殊不可爲法也該臣行據道府查覆如太原府屬徐溝縣於順治十三年正月二十六日夜二鼓時分有賊十七人自晉祠鎮起到城牆外預先暗進城四五人縣衙後牆謹靠北城牆

用藤繩吊下入衙內先將縣官陶文炳赤身縛住擡至牆外原無家眷有縣官女僮萬姓收拾行李欲次早起身回籍將銀器尺頭等物盡行拿去又將內書辦胡姓係北京人縣官與工食銀壹百兩衣物在外被賊拿去將頭上砍了一刀將手砍去一指有賊在城上口稱閒人不要動若動將縣官殺了你們一城都該死因此百

姓衙役俱不敢動四鼓時賊仍自北城而去不知下落又如太谷縣本年二月初四日夜有賊十一二人從衙後牆下挖一窟進入內牆推倒牆上棘刺响動有家人姓董起來馬槽添草看見牆上有入叫喊一聲驚散逃走縣官郝應第喚代捕司獄黃學魁看驗牆下有窟城上別無踪跡又如清源縣於順治十二年四月初三日

夜二鼓時分有賊十四五人暗進城中從後衙西牆越進將知縣戴玄圍住幸衙內有磚樓一座家眷在上賊挾制縣官將衣物自樓上丟下盡行拿去四鼓時賊自西城跳下而出不知去向其城門倉庫印信獄囚俱各無虞俱隱匿未行申報等因詳覆到臣與臣所聞無異據此該臣看得各縣印捕等官有守土之司設防官兵

有捍衛之責既不能嚴防必備于無
事之先又不能緝捕逸賊于行劫之
後任憑大盜十數越城而入劫財飽
颺復越城而去甚至縛官傷人竟無
救援亦無追捕任夥賊出入于雉堞
之間如入無人之境且皆諱而不報
甘心被劫惟冀免戾倘日後處處效
尤以啓賊盜覬覦之心釀成大患貽
悞封疆可勝言哉况盜賊敢于行劫

縣官卽非小寇以縣官被劫尚爾隱
諱則村疇小民必至任賊魚肉而不
問矣徐溝清源兩邑相距省城僅八
十里太谷一縣距省僅一百二十里
在省各衙門俱寂然無聞甚非地方
之福也爲此據實題

報伏乞

皇上睿鑒

天語嚴飭將失事不報文武官吏

勅部查明從重議處庶疎玩官吏知所儆
戒有兵民疆土之責者知所察核盜
賊亦知所斂戢矣

順治十三年四月十九日具

題奉

旨徐溝等縣大盜越城劫財該印捕官隱
諱不報好生可惡俱着革了職該督按
嚴提究擬具奏各盜仍嚴行緝獲該部
知道

撫石日奏議

樂

題釋株連寃民張高等疏

報獲偽逆張二娃等疏

報獲平陽大盜吳胤芳等疏

糾劾猗氏縣陳堯疏

請李虎等家屬免解疏

請守東道及將備緝盜免議疏

報中軍賈國珍焚燬公署疏

題爲糾劾所以懲貪黷讞擬期于示至

公謹陳批駁之例以遵

命令事竊見我

皇上勵精圖治念念在於安民然而治

國安民之要首在懲貪祛暴削蠹除奸

蓋地方得一廉吏視民如子自無縱

蠹箕歛之事而民卽安矣倘有貪殘

暴橫以衙役爲心腹視小民爲魚肉

者督撫按諸臣留心諮察一有所聞

撫晉奏議初刻

目錄

卷二

題原叅衙門不便批駁招詳疏

請免永寧州荒糧疏

報平陽大盜焚劫疏

續叅太谷縱盜越城匿報疏

劾柯臣郭奇勲疏

請豁郭仁麟贓罪疏

卽丞亟密行司道等官廉其穢狀飛
章馳

奏以拯斯民于水火務期劾一貪墨之
吏而通省士民稱快者方爲至當及
至奉

旨勅令督撫按諸臣究擬則必發按察司
轉行府廳各官承問照欵研鞫贓真
証確律例昭合方行招詳而督撫按
諸臣又必細加覆核倘與原叅不符

或入已贓私坐派衙役者卽嚴行批
駁另行究擬一駁再駁必期毫無遁
情議擬愜當方行回

奏在承問各官凜遵

功令自不敢斷讞失平以致奸貪翫法
在督撫按諸臣亦不容承問者受囑
徇私擅爲出入也但糾繩貪墨固所
以爲民除害申

朝廷之法然亦須允服被劾者之心俾自

知罪戾受法心甘方稱平允蓋原叅衙門向日廉訪穢狀卽以上

聞去貪如去病惟恐不速原未經先審而後劾及至逐款嚴詢害証畢集事事求真不可懸坐斷斷不能事事與原叅相合故凡係糾劾章疏係督臣所劾者奉

旨勅撫按究擬係撫臣所糾者奉

旨勅督按究擬係按臣所叅者奉

旨勅督撫究擬而原叅者不與焉足見

皇上早已洞燭其中隱情誠恐原叅之官有心苛求反非法之平也乃奉

旨雖如此而在外招擬例係通詳原叅衙門亦照例嚴駁駁而又駁必求與原叅相合在奉

旨承問者雖經核明允

題又必候原叅衙門批允方可繕疏不但與所奉之

有背且致被劾者中心不服怨讟橫生
似若承問者遵原劾之批駁有心而
入罪每以原劾官向日一腔爲民除
暴之心反成有心陷人之跡亦無怪
乎其然也以臣管見今後凡係糾劾
大案原劾衙門雖有通報招詳惟候
奉

旨承問者批駁不得一槩駁行庶足以信
明旨而服被劾者之心如果有徇情縱庇

故爲出脫者原劾官知之旣真又不
妨補牘再劾將承問與批允題覆之
官一例重處此誠法之最優者也臣
識疎材謏濫膺晉撫之任有刑名之
責謹就所知特疏題

請非止爲晉省而言似若各直省俱當如
是也伏乞

皇上鑒照如果臣言不謬

勅部議覆施行

順治十三年四月二十二日具

題奉

旨該部議奏

題爲疲州疊殘獨重荒亡未復生耕等
事順治十三年四月二十一日據山
西布政司呈據汾州府申據經歷司
呈承准本府照會承奉本司劄付蒙
巡撫白都御史批該本司呈據汾州
府申據孝義縣申奉本府帖文承奉
本司劄付蒙前巡撫陳都御史案驗
准戶部咨山西清吏司案呈奉本部
送據汾州府永寧州申稱永寧節經

人傷地荒前曾查確共荒地捌百捌拾貳頃壹拾捌畝零今奉催提錢糧歷經數載地瘠民稀承種無人其荒地錢糧俟招有人種之日另行報明再爲起課緣由到部奉批司查送司奉此查得地土荒蕪錢糧自應蠲免案查前任撫院劉 於順治八年間題免該州亡丁壹千捌百柒拾捌丁荒地捌百捌拾貳頃壹拾捌畝零隨經本部題覆奉

旨開除荒地招人承種二年後起課在案但該州前項地畝數年以來豈盡無人開墾相應移咨該撫確查該州荒地是否真實委官踏勘如果係真荒無人承種開墾自當具題

奏請定奪可也等因呈堂奉批行送司奉此相應移咨案呈到部擬合就行爲此合咨貴撫院煩爲查照施行准

此擬合就行爲此仰本司官吏照依
咨案內事理即便確查永寧州前項
荒地是否真實速委廉幹官員親詣
踏勘如果真荒無人承種開墾查明
并委官不致扶隱印結具詳呈院以
憑具題

奏請定奪毋得遲違扶隱未便等因蒙
此擬合就行爲此仰本府官吏查照
原文內事理即將該州荒地速委廉

幹官員親詣踏勘如果實荒無人承
種確查明白并取委官不致扶隱印
結呈馳詳司以憑覆核轉呈施行勿
得遲延致煩催提未便等因蒙此擬
合就行爲此備仰孝義縣官吏文到
即便親詣永寧州履畝確查該州傷
亡荒地捌百捌拾貳頃壹拾捌畝零
是否真實荒蕪無人承種取該州印
結并該縣不致扶隱印結送府以憑

轉報奉此本縣遵照帖文內事理於
本年二月二十二日單騎前赴永寧
州督同原管經承里老地方人等按
冊逐段履畝踏勘實係真荒無人墾
種取該州印結見在據此該知縣李
世泰看得永寧居叢山峻嶺之中石
多土少自六年逆賊變亂踞城一載
人民殺戮僅存三分之一是以地多
拋荒無人墾種蒙前巡撫劉都御史
於順治八年具

題奉有蠲免俟認種二年後起科之

旨而該州逐年招墾已開種壹百肆拾叁
頃有零而實在荒地柒百叁拾捌頃
柒拾餘畝雖該州竭力招徠奈人丁
稀少力不能及耳今奉委勘卑職躬
親履畝查勘果與原報之冊無異蒿
草盈地實係真荒取具該州印結并
卑縣印結理合申報等情到府據此

該本府知府王汝賢查看得永寧荒地屢經請豁毋容瑣贅今孝義縣知縣李世泰親詣踏勘見其殘蒿滿地衰草盈阡實係真荒毫無虛謬各具不扶印結前來擬合轉送等緣由申詳到司據此該本司署印守寧道右叅政王舜年覆看得永寧州原報傷亡荒地捌百捌拾貳頃壹拾捌畝捌分除節年招墾已開種過地壹百肆拾叁頃有零外今止實在荒地柒百叁拾捌頃柒拾陸畝玖分貳厘零該根折銀肆千壹百陸拾肆兩陸錢伍分貳毫零既經該府委官孝義縣知縣李世泰躬詣履畝踏勘果係真荒無人開墾取有該州并委官不致扶隱印結申詳前來相應呈請合候本院詳酌具題

奏請定奪施行等因蒙批該州荒地既

已履勘明白自應

題覆但恐其中或有以熟報荒之弊深
爲不便仰司再委鄰縣印官或府佐
確勘詳奪繳蒙此擬合就行爲此仰
本府官吏卽將永寧州所申傷亡荒
地有無以熟報荒之弊該府再委鄰
縣印官或府佐官限文到三日內作
速確勘明白取委官不致扶隱印結
確實具詳本司立等覆酌轉詳施行
勿得遲延及朦混不明致煩催駁未
便速速奉此查得永寧鄰縣寧鄉缺
官臨縣行取起程在卽汾陽附郭事
繁無暇府佐同知朝

覲未回通判石樓代篆寫遠推官陞任起
程在卽別無可委相應照會本府經
歷王斌卽便單騎親詣永寧州將原
報傷亡荒地捌百捌拾貳頃壹拾捌
畝捌分除節年招墾已開種過壹百

肆拾叁頃有零今止實在荒地朱百
叁拾捌頃柒拾陸畝玖分叁厘零躬
臨履畝確查有無以熟報荒之弊限
文到起程踏勘明白具不致扶隱印
結據實詳府立等覆核轉詳施行承
此卑職於本年四月初三日遵文前
去永寧州踏勘荒亡地畝看得永寧
山岡遼濶地廣人稀石多土薄自六
年賊陷城破磐踞一載人民屠戮所
遺傷亡荒地捌百捌拾貳頃壹拾捌
畝捌分該糧銀肆千玖百伍拾陸兩
捌錢貳分陸厘蒙前巡撫劉都御史
具

題戶部議覆奉

旨蠲免俟認種二年後起科該州節年開
墾過荒地壹百肆拾叁頃零查係實
在荒地柒百叁拾捌頃柒拾餘畝該
州雖奉文招徠已非一日但緣丁寡

民貧無力開墾今奉委查勘卑職隨同州官及該州里老人等單騎履畝遍行踏勘委無以熟作荒果無一人墾種滿眼蒿草傷心極矣悉與原報之冊相符今將卑職不致扶隱甘結同該州印結回報到府據此該本府知府王汝賢覆看得永寧傷亡荒地捌百捌拾貳頃壹拾捌畝捌分蒙前巡撫劉都御史於順治八年

題蠲疏云二年後起科該州節年招墾過壹百肆拾叁頃零自應照開墾年分而二年後起科者也毋容贅及其實在荒地柒百叁拾捌頃柒拾陸畝玖分叁厘零八年至今尚全荒閑該州懇請蠲豁誠非一次蒙委踏勘業經數番今者覆奉部咨先經孝義知縣李世泰躬親履畝實荒已真毫無虛謬憲檄復勘責令經歷王斌遍詣

郊原盡蓄棘草繪圖難悉不惟目覩
悲酸抑且耳聞益加倍慘從來該州
地瘠民貧苦不可言又值凋殘官民
奚堪加此傷亡之累也既經踏勘情
真具有不致扶隱印結請祈垂念疲
州荒亡達院咨

題豁免實在荒地米百叁拾捌頃米拾
陸畝有零之糧銀庶官民均戴洪慈
於無既等緣由申詳到司據此該本
司署印右布政使潘朝選覆查看得
永寧州傷亡荒地原報捌百捌拾貳
頃壹拾捌畝捌分除節年開墾過地
壹百肆拾叁頃有零外今實在荒地
米百叁拾捌頃米拾陸畝玖分貳厘
米毫米絲該糧折銀肆千壹百陸拾
肆兩陸錢伍分貳毫肆忽米微玖纖
叁沙荒苦情形業經委官踏勘前詳
備悉無容再贅祇緣其中恐有以熟

報荒遂蒙本院批駁確勘今據該府覆委本府經歷王斌履畝親踏果係無人開闢之土並無以熟作荒之弊委屬真荒原非虛謬既經該府取具該州并委官不致扶隱印結申詳前來相應呈請合候本院覆酌具

題施行等因呈詳到臣該臣看得永寧一州設居山隅地多砂磧民貧土薄素稱疲敝之區六年間復遭賊寇蹂躪

城殺戮過半遂致地土拋荒捌百捌

拾餘頃業經前撫臣劉

疏請奉

旨蠲免八九兩年錢糧自十年開徵起科

其荒地除節年招撫開墾外尚有實荒地柒百叁拾捌頃柒拾陸畝玖分零無人開墾該糧折銀肆千壹百陸拾肆兩陸錢伍分貳毫零迄今未完國賦空懸該州申請戶部咨行確查臣嚴檄藩司委官踏勘恐有以熟報荒

之弊復批駁該司再加確勘去後今
據司府詳稱該州蒿草盈郊荆茅滿
目民貧丁寡舉眼淒其委屬真荒毫
無虛謬既經該司取具永寧州并委
官踏勘不致扶隱印結呈詳前來除
印結咨送戶部外臣謹會同督臣馬
按臣高 合詞具

題伏乞

勅下該部議覆將永寧州實荒地畝所該

粮折銀兩蠲免上

請行臣等遵奉施行

順治十三年四月二十五日具

題奉

旨戶部議奏

題爲夥盜焚掠迭告將吏勦捕無能謹
特疏具

題仰祈

皇上嚴勅議處以期靖除盜源以安地方
事竊照三晉自勦除姜逆之後地方
雖覺小寧然而漏網餘孽在在潛伏
伺隙而思逞者實繁有徒至若平陽
一府界接秦豫其屬邑有距省千餘
里者更係第一衝要之區疊障崇山

草木蕪鬱素爲盜藪臣自蒞任之始
案查前據分守河東道塘報據芮城
縣申稱本年二月初二日一更時分
本縣灣兒村被強賊一百餘人各執
弓箭刀鎗明火擁至生員李得興家
將興父李寧伯李學芳亂刀砍傷衣
服首飾驢頭盡劫一空村隣李房兒
等救護被賊將李房兒殺死等情在
案臣閱卷卽嚴飭該道將多方勦捕

去後于三月十五日又據該道塘報
據夏縣申稱本月初六日三更時分
縣南十里小呂村被賊三四十名入
生員李中選家燒燬房屋二座衣物
搶掠一空刺傷救護鄉勇李世恩竟
向東南平陸大路而去等情四月十
三日又據該道塘報據聞喜縣報稱
三月二十九日二更前後本縣南支
村被賊入庄燒燬房屋一所殺死生

員支王封民人支永粹牛逢時支啓
芳支孔芳中傷生員支秀芳民人支
永亨楊採祥擄去婦女支氏二口赴
去驢三頭等情四月二十一日又據
該道塘報據蒲州申稱本月十二日
三更時分本州大全里黃生員家被
盜九十餘人名執器械明火入家搶
劫財物打傷生員黃廷芳黃惺黃僚
守門人楊臻丁俊等情各塘報到臣

據此該臣節次接報卽節次嚴飭該
道將一面督率官兵星馳追剿一面
責成各州縣多方躡緝務將前賊盡
數捕獲不得縱其遠逸去後雖續據
該道將呈覆有稱擒獲賊窩者有稱
得擒賊黨者有稱追剿斬級三顆奪
獲器具什物林深不能窮追者多係
支吾悠忽未能收搗巢掃穴之實祇
見此處方飭勦捕彼處又告焚劫皆

緣各將領平日既不能嚴加巡防建威以銷萌及至有事又各以分汛自限推諉慢事而州縣各官有民社之寄者明知地方有賊又多諱疾忌醫不行預先報聞遂至各賊之羣聚數十肆行劫掠殺人放火搶擄婦女頭畜視爲尋常之事也臣已屢次申飭嚴限勦捕不啻頽禿無奈各將吏之玩愒如故今據平陽副將許占魁報

稱緝獲賊細一名李成供稱各賊俱陝西過來賊首張弘領一百二十餘賊吳掌盤領八十餘賊牛三領六十餘賊等情則非零星小賊明矣如不速行設法撲勦任其豕突無忌倘再糾集多兇流毒地方可勝言哉從前失事文武相應從重議處嚴加責成者也臣謹會同督臣馬

合詞

題叅伏乞

皇上睿鑒

勅下該部將平陽副將許占魁蒲州遊擊
鈕一元平垣營遊擊楊洪及蒲州芮
城夏縣聞喜印捕等官俱嚴加處分
責令戴罪勦捕庶怠玩知儆而寇氛
可戢矣至于分守河東道臣薛陳偉
雖任事方新而四處失事俱其所屬
應否一併議處統惟

睿裁施行

順治十三年四月二十九日具

題奉

旨據奏夥盜焚掠迭告該管文武各官所
司何事許占魁等着分別議處具奏該
部知道

楊晉奏請

卷二

其

題爲續叅縱盜越城行劫隱諱不報情

由并請

睿鑒從重處分以杜將來欺朦僨事以彰
國法事竊照府州縣設有城垣所以閑
外患而衛民社也倘容盜賊越入卽
係失守法不容寬臣前備查徐溝太
谷清源三縣縱盜出入行劫縛官傷
人不行申報致賊飽颺而去竟無緝
捕已經具疏

題叅今本年四月二十三日續據布政司詳蒙臣憲票查飭前事又查得順治十二年十二月十一日太谷縣被賊入城將縣衙內姝子逼拷劫去資囊壹千兩等因臣以太谷縣令乃新陞鎮江府知府郝應第也本官以才守兼優而超陞郡守前報十三年二月初四日已經盜賊越城挖窟幸被家人知覺驚散何去冬又有此事未得的確被劫情由不敢草率入

告隨嚴行該縣確查仍責令確知其事衙役一名前來以便質訊去後嗣據帶管該縣事清源縣知縣戴玄回稱去年十二月十一日並無盜賊出入風聲不敢隱諱遵卽差役田美質文赴臣質詢等情隨該臣批太谷縣去臘被賊越城劫財該司前報甚明何該縣稱絕無此事乎此該縣因清源本

縣失事亦隱而未報故竝將太谷亦代爲之隱乎抑係該司所聞未確也仰司將來役田美嚴鞫與前報所據質對明白卽日詳覆勿任該縣支飾也等因去後今據該司呈稱本司卽問來役去年臘月你太谷縣被賊入城搶劫縣官你可知道據田美始供竝無此事本司嚴訊方供郝知縣彼時原有賊入衙不知失了多少銀子

見有郝知縣妳子楊氏常川在衙并主庫吏段戶房都知道等情隨卽行提妳子并王庫吏等去後今據申解前來本司隨問庫吏王朝賢據供盜賊于去年臘月內入城打劫縣官是實只聞得管家們說失了些銀器衣服拿些銀子去了不知有多少銀子賊從縣城東北角進來還從東北角去了又問書辦段福與王朝賢所供

無異及問妳子楊氏供稱小婦人原在郝知縣衙內黑夜聽的有賊進來便踢開門將小婦拿住小的說是箇妳子不是縣官家裡人賊便拿住他的丫頭們逼拷去了後來說失了衣服銀器銀子不知失了多少等情供吐到官爲照太谷縣于去年十二月內被賊越城劫奪縣官資財審據庫吏王朝賢等口供已有確據但劫去資財多寡皆稱不知此亦情理之可原者彼時縣官既將此事隱匿不報上知焉肯將失去資財故爲倡說耶強賊越城審已是實資財多寡無容窮詰等因備覆到臣據此該臣看得縣官寄百里之命所以禦侮安民村疇失事尚有責任况以縣治禁城縱令寇賊出入直進縣衙拷其婢媵劫其資財乃竟自忍疼痛諱疾忌醫去

臘十一日一劫至本年二月初四日復越城而進此正因去臘飽颶而去未見勦捕故賊膽愈張無所忌憚也兩次失事而兩次不報既已不報則不便于緝捕是該縣養癰以貽患矣臘月方劫賊尚垂涎不舍二月復劫則該縣非琴鶴相隨者可知矣且以縣官而收本地女人以爲乳婦亦非法紀今該縣躡陞江南鎮江知府固

不知何所取之也清源縣知縣戴玄在本縣于去年四月內被賊越城拱手以送資財亦隱而不報今因太谷缺官委令就近帶管臣以失事行查又輒敢代爲欺隱誠所爲欺朦成習提振不醒者直以臣之檄文視爲兒戲也且預囑來役扶同蔽隱若非藩臣提其經承及妳婦訊之幾又爲所欺矣若此欺蔽成風以致城邑失事

院司道府俱聾瞶而無所聞任憑賊
寇飽掠來無以禦去無以追萬一釀
成燎原作何收拾防微所以杜漸倘
不嚴加究處貽患于將來匪淺也既
據該司續查審報前來臣謹據實具
題伏乞

皇上下大奮乾斷

勅部一併嚴加處分庶有守土之責者不
敢仍習欺朦以饋大事也

順治十三年五月初二日具

題奉

旨太谷縣兩次失事俱隱諱不報好生可
惡郝應第着革了職並代爲欺隱戴玄
該督按嚴提究擬具奏郝應第係何人
保舉吏部察明議處該部知道

題爲特糾穢劣監司及貪橫民牧以肅
吏治以儆官邪事竊照晉省值寇患
歲凶之後生民凋疲之時帑井蕭條
伏莽未靖所賴以表率將吏整戎飭
備爲一路之屏翰者惟監司一官是
藉而所以撫輯災黎培養元氣爲百
里之怙恃者又惟良縣令是望也故
察吏所以安民猶之愛嘉穀而必亟
去其蟲不容忽也但臣蒞任之始正

值

計處之時宜其搜剔已盡斜効可以少後
然又恐有外蹟似廉而暮金未却或
有巧于粉飾而實政全疎又或有工
於彌縫而芟除未及倖爲

大計所漏仍復恣睢無忌者不可不更加
嚴察也臣窮兩月餘之諮諏合據司
府等官之揭報先得不肖監司如鴈
平兵備道柯臣貪酷縣令如岳陽縣
知縣郭奇勲者俱貪穢彰著不便一
日再容於地方也謹爲我

皇上陳之

鴈平兵備道副使柯臣事蹟

一奉

旨裁去餉司歸併本官聽吏書安象升賀
士賢霍貴等將所屬解州安邑
等處批差解役張映斗等共約
收過銀壹拾伍萬餘彼象升等

嚇索常禮每百兩貳錢得銀叁百兩烹用解役張映斗康弘揚等及調取過庫簿可証

一本官訪得崞縣糧房書手朱應文惡蹟多端要行法究應文懼怕密稟縣官暗送銀壹百兩免究朱應文崔後庵証

一本官順治十一年起至今止將所屬東北二路平刑茹越小石等營逃亡緣事兵丁截日還官每名有三五日十數日不等各扣月糧共約貳百餘兩解交本官至今未報抵餉指各營把總胡官楊一洪東盈庫書江美併收簿証

此一官者居心不正賦性多乖善政無聞而惟工漁獵飭備未見而祇事狼貪索收銀常禮之規

侵截日還官之餉且以衙惡而
不行法究受賄囑卽行從寬不
幾養奸以爲暴乎所當照貪例
革職併有名衙蠹提問追擬者
也

平陽府岳陽縣知縣郭奇勲事蹟

一本官十三年正月初旬指稱漏
報門單差快手解起蛟拿鄉約
李應第王應增嚇銀伍拾兩快
手解起蛟過付官役分肥入已

本人証

一本官指稱人命差快手解起蛟
嚇趙如德銀伍拾兩官役分肥
本人証

一本官十三年正月初旬指印赤
曆并易知單每一里要紅錢銀
伍兩共一十八里共要銀玖拾
兩戶書呂鼎收送官吏分肥總

書盧王道証

一本官于十二年十二月初二日
妄將貢生陳天定生員陳玟趙
玉璽趙邦鈿段文華任四維等
指稱犯夜拘捉諸生擅行責禁
共罰硝磺陸千斤本縣紳衿憫
念無辜義舉保領分認代賠玉
璽含冤控告該縣延至二十六
日復捏稱打開門禁通申各衙
門該縣申文及諸生証

一本官指稱丈地將生員趙之晉
不存學校凌辱鎖打本人証

一本官賦性暴躁聽訟審詞不容
辯理先行責治民多冤抑怨聲
載道

此一官者稟性躁妄行事譁張酷
以濟貪惟知朘削公行奸而行
暴日計苞苴暮入視學校如草

亦任意摧殘親胥役爲腹心分
烹不一甚至聽訟而不容分割
違禁而濫罰硝磺民情多怨物
議沸騰所當照貪酷例革職提
問并有名衡蠹一併究擬者也
臣謹據實具

題伏乞

勅下該部轉行該衙門將鴈平兵備道柯
臣岳陽縣知縣郭奇勳卽行革職提
問庶吏治肅而官方知所儆惕矣臣
更有

請者地方不寧皆由道府州縣不得其官
臣謬膺

簡命例有入境之効然三晉地方遼濶所
屬雖止四府有十五州七十一縣距
省有隔一千一二百里者足跡旣不
能盡到耳目亦難以卽知固不敢循
入境之徃例僅以一二塞責亦不敢

以

計察稱善者卽附和以從寬固不敢避叢
怨而少爲瞻顧亦不敢執偏見而自
定媼妍必以所聞所見合之司道府
廳之開迭訪之道路之公評國人皆
曰不肖者方登啓事今見在確查有
聞卽以入
告以期祛殘遠惡俾晉省悉更賢良之吏
方足以報

皇恩而愜臣願也併乞
睿鑒施行

順治十三年五月初八日具

題奉

旨柯臣郭奇勲俱着董了職併本內有名
蠹役該督按提問追擬具奏該部知道

題爲賊孽占據要地

王師攻困宜急請

賜密勅速滅賊氛以定封疆事順治十三

年四月初十日據山西按察司呈問

得犯人一名郭仁麟招詳緣由該本

司按察使楊思聖覆審看得郭仁麟

李芬甘心僞職按律自有嚴法但兩

犯俱悔過投誠與胡寅等朝見

王駕仁麟給有免死硃票先據沁州供

証繼據潞安刑廳查字跡手押相同
復據巡南道移票在案又經本司前
按察使四詳前院矣其硃票之確有
可據也無疑既與胡寅等同朝應與
胡寅等同沾浩蕩者也芬雖未給免
死票帖然亦在投誠內况無錢糧干
係理應一視同仁查順治八年八月
內奉

皇母恩詔一款各處土寇有脅從悔禍縛
獻渠魁及賊首翻然向化率衆受撫
者前罪均行赦免仍與論功是二犯
與

赦例相合也又無疑獨是仁麟侵庫銀捌
百餘兩比追變產不能盡完屢屢駁
覆延遲時日今陸續止完肆百壹拾
壹兩而家產已盡其餘實無點金之
術矣似又與盡絕免追之

赦例相符總之此二犯者授偽無幾縲綬

數年鵠面鳩形與死爲鄰開其一面
俾之老死牖下統候憲裁將仁麟等
取問罪犯議得郭仁麟李芬所犯俱
合依謀叛但共謀者不分首從律皆
斬決不待時緣係重刑牢固監候會
審詳決照出郭仁麟李芬俱斬罪郭
仁麟名下原侵使庫銀捌百貳拾叁
兩壹錢陸分貳厘零據沁源縣查得
仁麟家產房地等項共估變賣銀肆

百壹拾壹兩該縣陸續嚴追完銀肆
百壹拾壹兩取獲實收在卷餘無再
照等因呈詳到臣該臣看得六年逆
姜播亂通省如狂間有不被其脅從
者則盡被其屠戮矣郭仁麟李芬皆
沁源子衿彼時祇知苟全目前之性
命未經慮及後來之實禍仁麟受澤
州僞牧李芬卽受本州之僞教矣未
幾大兵南下麟等聞風竄歸繼而良

心不民悔過投誠率衆謁

王賜照免死而一時同投之李師沆胡寅等業經前按臣劉達疏題俱蒙

皇上寬宥黜責保釋矣其仁麟等未得同時

赦免者緣仁麟侵費官銀捌百餘兩經久不結故耳今據司道府廳州縣承追各官僉稱仁麟羈禁六載家產盡絕僅變完銀肆百壹拾壹兩封貯沁源

俱追完貯興縣庫聽文起解取實收收管繳報其腳價盤費銀陸拾兩審係公費并王吉受白新喜地價銀叁拾兩俱各免追餘無再照等因呈詳到臣據此該臣看得原任興縣革職知縣袁四維貪婪不法經前撫臣陳應泰具疏

題叅奉

旨究擬而四維復行逞刁誣捏辯疏叩

聞奉有如係虛捏加等治罪之

旨隨該臣等行據司道公同確審四維受
贓有據捏辯皆虛律無可加故仍擬
受財不枉法之律擬絞具

題仰聽

睿鑒今三法司遵

旨覆核以招內受羨餘虧行價律不至死
且受孫璋金銀一款供詞未確駁行
覆審確招具

題爲緝獲截劫強賊事順治十三年五
月初一日據按察司呈該本司按察
使楊思聖覆詳看得張高張麻胡王
光棍夙與張明教有讐唆賊高只誣
扳屢經駁審未結者因事係強盜重
情三命攸關旣無兵械贓物又無証
佐確據難憑一賊之誣遂入三人之
罪情有可矜此時雖有隣佑保結張
高等務本良民而承問者亦未敢輕

爲出入及夥賊良心萌發于邊知府
公庭衆口一詞唆誣供吐情真則張
高之爲良民無疑而明教之讐陷已
實明教別案擬罪高只等已奉

旨正法無辜陷擬是宜解湯王之網矣惟
候憲臺矜豁等緣由一呈詳巡撫白
都御史蒙批張高等三名旣審明的
係讐扳准卽保釋寧家仍候按院詳
行繳一呈詳巡按高御史蒙批張高

張麻胡王光棍乃大盜高只等原案
照提賊犯今據詳稱妄扳雖里隣路
光祥張惟學等出名具結云三犯旣
係良民彼時獲高只等之際何不在
家務農事關部覆嚴緝賊犯未便輕
釋該司確查續獲月日仍候撫院詳
行繳蒙本司案仰本府卽將張高等
續獲月日作速確查明白詳司以憑
覆核轉詳聞又蒙本司案驗蒙巡撫

白都御史憲票案查本年二月二十六日據該司呈前事內詳賊犯高只等一案內張高張麻胡王光棍三名的係讐扳緣由該本院卽批張高等三名旣審明的係讐扳准卽保釋寧家仍候按院詳行繳去後今本院細查原案在張高等三名委係讐扳贓仗無據具有隣佑及縣官印結互保理當開釋無疑但張高等係高只案內照提人犯應俟本院會同按院具

題俟部覆有

俞旨之日方可釋放也等因票行本司案仰本府卽將張高等三名暫行羈候俟具題奉

旨開釋毋得遲錯該本府知府蔡祖庚遵照批駁詞語覆審看得張高等讐誣扳犯三名其贓仗無據甘結有憑前招屢訊歷歷明白法當省釋自不容

贅但因事關

題覆奉憲駁查敘明高只初供方便請旨開釋已經遵具細開入詳伏候憲裁解網弘恩非本府所敢專也等緣由呈詳到司據此該本司按察使楊思聖覆詳看得張高等係高只等案內讐扳人犯雖有隣佑印結若非查明始末原供未便輕

題開釋今奉憲查其原案口供悉已詳

敘明白理合具詳伏候具

題開釋等因呈詳到臣據此該臣看得張高張麻胡王光棍三名乃已決賊犯高只等案內誣陷之冤民也緣張明教挾讐不解遂賂囑高只之橫板陷張高等于不赦之條屢經司道府廳再四訊鞫高只等兩次截刼並未據高只之活供口詞畢真各隣里之

保結鑒鑒可據則張高等的係良民
而爲張明教讐唆陷害也明矣明教
匿名誣人已經另案歸結張高等三
命久滯囹圄所當亟行開釋以廣
皇上祝網洪仁也既經該司呈詳前來臣
謹會同按臣高 合詞具
題伏乞

睿鑒勅部議覆行臣等遵奉施行

順治十三年五月十五日具

題奉

旨刑部核議具奏

題爲特報官兵奮勇搜剿殄滅逋寇仰

乞

睿鑒事順治十三年五月二十一日據寧

武道僉事潘超先塘報內稱本年五

月十九日據利民營中軍守備苗之

秀報稱卑職奉文跟隨本路李叅將

入山搜剿逋逆高三等賊于四月初

一日奉寧武道差令降丁王銀帶領

賊首張二娃妹夫田一倫趙友伙前

往定襄孟縣找探逆賊消息隨據王銀等報稱探實僞副將張二娃僞遊擊牛髻髻在孟定交界山內往來潛伏相隨夥賊卑職一聞此信隨具報本道外郎同寧武副標營把總賈應祿各分兵一股併傳鄉民蘇學士戎道等跟隨晝伏夜行共搜四日未見踪跡忽于五月十五日夜二更時分在山內林密之中聽得賊叫張副爺

跟我來等語職等隨尾聲跟至地名戎家庄大石堂內天已黎明職等督兵奮勇向前當將僞將張二娃僞遊擊牛髻髻併散賊胡登賀胡全等俱行殺死其散賊首級已經懸示山內各庄外今將僞將張二娃僞遊擊牛髻髻長髮首級二顆并得獲弓二張箭二十一枝鳥鎗一杆腰刀四口長鎗一杆理合一併解驗等情到道塘

報到臣據此又據寧武營副將申宏
諭利民路叅將李遇芳各塘報同前
事等因據此該臣看得逆渠高鼎等
賊飄忽于山西直隸兩界深山幽谷
之中意在伺隙而動且出沒搶掠兩
處受害匪伊朝夕矣年來兩省官兵
合剿餘黨業已搜斬殆盡惟是高鼎
與張二娃俱係渠魁奸狡百出踪跡
難覓尚在逋誅本年四月初四日准

兵部咨爲山寇作亂已久等事該本
部題前事等因內開請

勅該省督撫相機設防嚴行緝勦務使逋
寇就擒等因順治十三年三月十四
日奉

旨是依議欽此欽遵該臣隨嚴行各該道
將相地設伏多方躡緝盡力撲勦去
後今據該道將報稱前因是久逋天
誅之賊首張二娃等又已授首不但

已剪高鼎一臂臣逆料高鼎必不能
獨力爲崇將來非歸命投誠必又被
各要隘之官兵物色而獲之也從此
鴈代五臺一帶士民可以望安枕而
無憂矣除所斬首級及得獲弓箭刀
鎗俱令該道驗明仍將有功官兵量
行給賞鼓勵外緣張二娃係奉
旨緝勦有名叛首既經擒斬相應題
報以慰

膺懷其有功守備苗之秀把總賈應祿均
應紀錄以勵後效者也臣謹會同督

臣馬

合詞報

聞伏乞

勅部查核施行

順治十三年五月二十三日具

題奉

旨兵部知道

題爲恭報擒勦潛謀不軌巨盜及積年
窩盜大奸仰乞

睿鑒速勅正法以安民社事切照平陽蒲
州一帶與秦豫兩省聯疆崇山疊嶺
夙稱盜藪臣蒞任之後節據守東
道塘報蒲州芮城聞喜夏縣等處大
盜橫行疊遭焚掠而各營官兵未能
實力剿捕臣一面嚴飭搜勦一面具
爲夥盜焚掠迭告將吏剿捕無能等

事一疏奉

旨據奏夥盜焚剝迭告該管文武各官所
司何事許占魁等着分別議處具奏該
部知道欽此欽遵臣復行嚴飭間今于
順治十三年五月二十七日據分守
河東道左叅議薛陳偉呈稱云該
本道看得吳胤芳係積年逆賊久連
天誅之巨寇也屢投叛黨屢受偽職
且攻城池掠關寨放嚮馬擄婦女以

及晝挑旗夜舉火并殺人劫財無事
不爲無地不到罪惡滔天已非一日
矣生長秦中結連豫晉糾合偽叅將
薛應全偽遊擊仝本庵偽守備姚標
等并一起大盜郭中馬賴猗等窺伺
蒲東一帶地方因有依山傍河之便
遂屢肆鴟張狼奔之舉憑長河爲便
道而去來無定依深山爲伏莽而出
沒不常據稱暫借盜劫之財以備招

人買馬之用內蓄逆志謀爲不軌觀
其身藏偽旗偽甲之式且偽稱故明
字樣已確乎爲被犯之左券矣若漸
積日久逆計稍行則地方之受其荼
毒者可勝問哉今幸仰仗

朝廷洪福并憲臺指責一旦生擒就縛並
活拿賊黨殺死賊徒與緝獲巨窩等
衆數十餘人雖名爲盜跖之行實隱
萌叛逆之志而夜劫李得興等四家

之財物猶其罪之末者也今本道公
同馬知州止按衆賊事犯本律吳胤
芳并薛應全等大盜二十五名審供
旣確應依強盜殺傷人放火燒人房
屋不分會否得財俱照得財律皆斬
隨卽奏

請審決梟示巨窩米展字等四名研審情
真應依強盜窩主造意共謀者行而
不分贓及分贓而不行者律皆斬所

當一併梟首藁街尚憾其罪有餘辜也再照巨逆太寇煽亂多年今既授首一朝不惟遠近之人心稱快實關地方之治亂非淺蒙本院念切封疆檄行擒剿審確具

題正法并將有功人員亟查確敘乃鼓勵將士勉勵後効至意本道查核得此一役也甫聞警報遂統領本營官兵王承祚等星馳會剿而擒斬多賊者則平陽營副總兵許占魁也若隨搗賊穴奮勇當先殺賊六名活擒賊首吳胤芳并夥賊馬忠等四名者乃蒲營把總霍自勝也屢獲多賊斬殺多級者乃平垣營遊擊楊洪蒲州營中軍蔡國典標營把總吳標名也若晝夜防禦狡賊并一切軍機策應者則標營中軍張秉忠也再查本道檄行州縣等官有事于勦賊奏功者則

又有解州知州鄒蘊賢蒲州知州馬翰如平陸縣知縣崔偉夏縣署縣事經歷胡向極此四官者或密擒窩主或緝拿賊犯或供應軍糧或嚴爲盤緝其勞績俱難泯沒相應一併據實呈報伏候憲裁分別

題敘至于本道雖督調各營將士嚴飭剿緝卽晝夜連籌密授方畧亦俱屬職分當然萬不敢言勞言功也若夫各營殺賊有功兵丁并陣戰帶傷兵丁各姓名俟查明另造清冊呈報本院賞恤外至于搜獲各賊刀鎗綿甲什物馬匹應發營備用所有起獲贓物衣服器飾等件另造清冊一本內經失主認明者例應給主無主者變價并所獲銀兩一併貯庫賞給有功統候憲裁計開公審明確賊犯依強盜殺傷人放火燒人房屋不分曾否

得財俱照得財律斬例應梟示犯人
二十五名吳胤芳薛二姚標郭中馬
賴猾馬忠楊跛子吳登雲吳沒耳子
馬得功劉進才李玉臣陳四李文祥
尚一禮王成張茂盛姚光聚景自玉
閩服孝荆養培方名山全本庵韓吉
勝郭柱子公審明確窩主依強盜窩
主造意共謀行而不分贓及分贓而
不行皆斬犯人四名米展宇郭貞觀
荆帝墟周希湯等因呈詳到臣據此
該臣看得吳胤芳係積年巨盜逆闖
漏網之遺孽也勾結群兇鳴張于秦
晉之間明火行劫殺人奪財已非一
日矣至其蓄謀不軌暗聚匪類以冀
伺隙而動則所獲旗式具存不刑自
吐且供稱約集秦中賊夥意欲於四
月初八日搶會攻城確確有據誠晉
中之隱患也羽賊薛二姚標郭中吳

沒耳子馬得功劉進才李玉臣陳四李文祥姚光聚景自玉荆養培方名山仝本庵韓吉勝郭柱子尚一禮王成張茂盛閭服孝馬賴猾馬忠楊跛子吳登雲等俱係秦豫晉三省之群兇附胤芳而肆焰者今歷審其行劫芮城李得興夏縣李仲選聞喜支王封蒲州黃廷芳等家放火殺人蓆捲資財橫肆慘毒分贓歷歷有據供吐鑿鑿可憑至于米展宇郭貞觀荆帝墟周希湯等四犯皆積年巨窩坐地分贓運糧濟賊而胤芳等群賊往來潛跡於其家致使地方無由物色且周希湯不獨窩盜更善於泗水往來渡賊皆其所爲前各賊在晉劫掠之後遇有官兵盤緝各賊不敢由正渡而逸希湯卽用皮混罔大葫蘆渡賊過河以致楊蝎子等免脫俱自供窩

、贓通賊甚真者以上共二十九犯均當立行正法决不待時者也所獲贓物除有主者失主認明候領外其無主者合應變價并得獲銀兩容臣查明一併入官報部其搜奪刀鎗弓箭什物馬匹俱應留營以資給賞官兵此一役也將平蒲積年巨患一旦掃除從此地方稍得寧謐矣其有功各官如守東道薛陳偉運籌得宜指縱有法平陽營副將許占魁督兵擒剿調度多方蒲州營把總霍自勝活擒賊首斬馘功多平坦營遊擊楊洪防剿有勞以及蒲營中軍蔡國興張秉忠把總吳標名等均當分別紀錄但臣前因平屬地方前項鄉村失事慮搜剿不力將道將等官據實糾參今各官知臣具疏卽凜凜

功令竭力搜剿擒獲多賊業靖根株可

謂失之東隅收之桑榆者矣應請

皇上鑒宥勅部免議功過相準以勵後効者也既經該道將各賊親供的確口詞開具招由呈詳前來除原獲吳胤芳偽旗紙式存案備查外臣謹會同督臣馬

合詞具

題伏乞

皇上垂鑒

俯念平蒲重地見獲賊犯吳胤芳等皆係狴犴巨盜不便久禁囹圄致有意外之變立

賜乾斷卽勅正法施行

順治十三年閏五月初三日具

題奉

旨吳胤芳等着速議具奏有功各官一併察議該部知道

題爲縣令貪鄙有據謹特疏糾叅以肅
吏治事切惟安民必先察吏而察吏
正所以安民况州縣印官與民最親
又非他吏可比必得才識兼優而清
慎自持者方能撫綏士民以寄百里
之命也臣自蒞任以來鰓鰓以察吏
爲急務罔敢少懈所有鴈平道柯臣
岳陽縣知縣郭奇勲俱貪婪不肖已
經臣特疏糾叅奉

旨提究矣今復見諸于行事之乖張更據
司府各官之揭報如平陽府猗氏縣
知縣陳堯者善政無聞敲吸有據且
舉動悖戾任性妄爲此誠一日不可
再容爲民牧者謹爲我

皇上陳之

計開

一本官因

大計後自十二年十月起至今九個月本

縣原額縣馬貳拾伍匹每匹正
支工食銀貳拾捌兩共銀柒百
兩其日用草料聽信兵書李逢
春尅扣銀壹百餘兩官吏分肥
其縣馬仍着百姓喂養馬夫陳
彥儒傳彥東里長王天勝等証
一十二年十一月內本縣人馬管
子因孔起楨行兇將馬管子父
毆死具告本縣本官向孔起楨

要銀伍拾兩央心腹書辦荆開之過送開之得謝禮拾兩荆天貴荆帆并本人証

一十二年十月內將本縣百姓何大前假指隱匿逃人票差快手荆舍章將大前拘拿到縣大前着慌央心腹快手潘三剛過送銀叁拾兩免究二人得謝禮銀貳拾兩店主郭在田荆成字并

本人証

一十三年四月內本縣生員令狐章因爭小忿將令狐湊呈縣及審理未問屈直將湊罰穀銀叁拾兩托刑書喬胤隆收送原差快手李昇并本人証

一本官貪愛美酒日取香酒五斤每斤價銀肆分令管家金大驗嘗好歹每日向酒行索禮銀壹

錢一年約取一千餘斤該價銀肆拾餘兩分文未發其酒行怨聲載道支皂張太青酒行荆如明馮養俊等証

此一官者性生惡薄行復卑污以衙役爲腹心恣情漁獵藉聽訟爲壟斷肆志狼貪借名隱匿逃人而得賄賂卽免尅扣馬匹料草乃責百姓公難此誠民牧中之蠹賊所當照貪例革職提問并有名衙蠹一併究擬者也臣謹據實具

題伏乞

皇上睿鑒

勅下該部覆議如果臣言不謬將猗氏縣知縣陳堯卽行革職并本內有名衙蠹一併提問追擬庶貪吏知儆而國法丕彰矣

順治十三年六月初九日具

題奉

旨陳亮着革了職併本內有名蠹役該督
按提問追擬具奏該部知道

題爲叛屬變解兩行謹特疏題

請仰祈

睿裁以便遵奉事切照逆賊李虎劉三元
等糾克結寨盤踞于沁源山中恣肆
焚劫幾至燎原已經各該文武諸臣
督率官兵竭力搜剿將李虎及賊黨
李威蘇虎等盡行誅戮惟有渠逆劉
三元遠竄迄今尚無下落已經節次
具

題在案案查順治十三年三月十二日
准兵部咨爲密報叛渠潛結情形等
事該本部題覆前撫臣陳應泰題前
事內開其所獲叛屬劉氏等二十九
名口俱應變價入官馬騾盈甲留營
應用等因奉

旨是依議行欽此欽遵備咨到臣臣隨即
飭行分守冀南道臣袁一相遵行變
價去後嗣據該道冊報前獲已斬賊

犯李虎等家屬原止一十九名口塘

報可查竝無二十九口係前院題

報差誤也等因該臣卽案查節次塘報果

止一十九口其多報十口委係前撫

臣陳應泰繕疏之誤隨行該道卽將

見在一十九名口遵

旨變價在案今於本年六月初六日復准

刑部咨爲密報叛渠潛結等事該本
部題覆臣題前事內開丑小子暨妻

段氏原係被擄之難民應免入官釋放其叛犯家口先經兵部覆准變價入官但叛犯妻子無變價之例仍應解部入官可也等因奉

旨趙希賢等俱依議本內滿字遺落未翻又丑小子暨妻段氏該撫屢審原係被擄之難民難婦等語着添補嚴飭行欽此欽遵備咨到臣准此除趙希賢等俱遵奉飭行起解外該臣看得

沁山叛犯李虎等家口查據道將塘報原止一十九名口而前撫臣陳應

泰題

報恠忽遂誤開二十九名口塘報在案可稽也其一十九口之中除丑小子及妻段氏二名口奉

旨釋放又續報病故老婦一口止實存一十六口前准兵部咨令變價臣已飭行該道遵照估變已據汾陽縣申報

共變價銀貳百朱拾伍兩臣正在一
面駁估咨部間適准刑部咨文又令
解部入官不但已經變價之人口未
便取回而復行解部且查一十六口
叛屬之中內係已斬叛犯李虎之妻
妾子女八名口未獲叛魁劉三元之
妻妾子女僕婢亦八名口昨臺山積
叛高鼎歸命投誠正以妻子俱在骨
肉關心故憬然自悟而向化也奉

旨查取給發遐邇嚮風今劉三元尚在脫
逃彼知妻子俱變價於本地未必不
效高鼎而興骨肉完聚之念如一經
解部則無所縈絆必致甘心負固而
絕其向化之心矣故臣之愚見似應
照兵部前議之爲便也然兩奉
俞旨微臣不敢擅專爲此特請

睿裁伏乞

勅部再加酌核行臣遵奉施行

順治十三年六月初九日具

題奉

旨該部議奏

題爲夥盜焚掠迭告將吏剿捕無能謹

特疏具

題仰祈

皇上嚴勅議處以期靖除盜源以安地方
事順治十三年六月二十一日據山西布按二司呈據平陽府呈蒙守東
道案驗准按察司手本順治十三年
閏五月二十二日蒙巡撫白都御史
案驗本年閏五月二十日准吏部咨

欽定四庫全書
卷二
該本部覆考功清吏司案呈奉本部
送吏科抄出兵部外抄山西巡撫自

題前事等因順治十三年五月

初九日奉

旨據奏夥盜焚掠迭告該管文武各官所
司何事許占魁等着分別議處具奏該
部知道欽此欽遵抄部送司除武職聽
兵部議覆外案呈到部查得地方失
事分守河東道薛陳偉雖任事方新
難免疎防之咎照例罰俸六個月仍
令催緝至於芮城夏縣聞喜蒲州各
州縣疏內無該管印捕官職名應
勅下該撫查明速奏另議等因奉

旨是依議行欽此欽遵抄部送司相應移
咨案呈到部移咨前來隨行本司備
行到府行據四州縣各備敘失事情
節開具各印捕職名前來擬合轉報
到司據此該本司按察使楊思聖覆

看得地方盜賊縱橫全係守土之責
如芮城等州縣疊見失事奉

旨查取各印捕職名今據該府查造職名
冊并敘失事始終情由前來相應據
實轉報等因呈詳到臣據此該臣看
得蒲州芮城等州縣接壤秦豫且多
重山疊嶂逼近黃河蓋四通八達之
區夙稱盜藪官斯土者自宜竭力綢
繆嚴加緝捕以保無虞何乃慢不經

心以致鄉村焚劫疎玩之咎誠不能
爲守土者寬也前臣據實題

報已奉

旨將守東道臣薛陳偉罰俸六個月其副
將許占魁等各降二級督剿尚有印
捕等官前疎未及者臣以鄉村失事
與城郭不同當重在汛守之武職也
及至部覆確查今據兩司備開職名
前來如芮城縣係革職知縣張天維

與別案擬罪典史王之標也夏縣係署印經歷胡向極與見任典史杜宗煥也聞喜係見任知縣劉珏與驅逐典史許汝楠也蒲州係見任知州馬翰如與斥逐吏目王有晟也此皆當日失事之官自當一併議處以警怠玩固無他議者然臣更有

請焉盜賊充斥地方文武不能立刻殄滅厥罪固無所辭然經臣

題叅之後道將州縣等官俱凜畏

功令竭力搜捕剿撫兼施不遺餘力巨

魁吳胤芳等悉已就擒業經臣另疏具

題在案其餘賊夥李福等悉就招撫已

經臣量爲賞賚分發各營安插內有

被擄脅從者俱已審釋歸農惟有賊

首張弘牛三脫逃未獲隨移文陝西

緝拿去後今准秦省督臣金礪咨開

張弘已經陝西長安縣捉獲監禁至
於牛三一賊據陽城縣申報亦經就
獲目今崔苻肅清地方寧謐剿撫已
無遺類則道將州縣等官可謂能收
桑榆之效者矣伏乞

皇上鑒原俯將該道將前議降罰

勅部議請開復州縣印捕等官免行議處
庶文武各官愈知奮勵圖效卽微臣
更得以藉

朝廷賞罰之威靈而鼓勵群工矣既經該
司查明前來相應具

題伏乞

勅下吏部議覆施行

順治十三年六月二十六日具

題奉

旨該部議奏

題爲營將焚毀公署謹據實題

報仰請

初部處分事案據平陽府洪洞縣申稱順
治十三年二月十六日有撫標中軍
遊擊賈國珍住宿本縣察院公署於
本日夜起更時候失火本縣卽督同
糧補各官阜快鄉夫撲救因火勢甚
大從後臥房燒至後堂共燒燬臥房
三間換房捲棚二間中廳三間茶廳

捲棚三間原設床桌器皿等物俱已盡燬事干失火理合申報等因據此該臣卽嚴行馳東道確查并估議賠補去後今據分巡河東道副使劉捷詳稱遊擊賈國珍前因赴任路經洪邑偶宿察院公署陡遭回祿之變燒燬臥房捲棚及器皿等物至於房屋作何修葺器物作何賠補行據該府查議別無堪動錢糧今估議共應用

銀叁百壹拾壹兩米錢伏乞裁奪等因詳覆到臣據此該臣看得洪洞地當孔道舊有察院公署一所原以供應過往滿漢官員駐宿之地臣標中軍遊擊賈國珍自秦赴晉道經洪邑而擅居公署似已越分何復慢不經心以致失火將要地駐節之公署焚燬十有餘間一切床桌器皿盡付灰燼疎忽之愆卽百喙無以自解彼時

臣亦值初到地方之際不敢草率入
告故特牌行該道查勘今據確議備詳前
來則火由內發別無他故所當責令
本官照估賠補修葺無容他議者也
除臣一面責令本官遵照將前估銀
叁百壹拾壹兩柒錢卽解交洪洞縣
查收修理外事關營將焚毀公署相
應具

題伏乞

皇上

勅部議處施行

順治十三年六月二十六日具

題奉

旨賈國珍着兵部議處具奏

藥

明倫彙編 家範典 孝親 卷六 二十四日 具

撫晉奏議

射

彙報水雹災傷疏

題覆方澧等招由疏

覆袁四維叩 閣情罪疏

奏爲遵例自陳不職仰聽

皇上處分以信京察

大典事順治十三年六月十九日准吏部
咨考功清吏司案呈奉本部送吏科
抄出該本部題爲題明京察則例事
內開一款一一二三品京官及在外
三品以上督撫俱自陳不職等因奉
旨這京察各款着照議行欽此欽遵備咨
到臣准此該臣如梅伏念

525384
D20 84

撫晉奏議

目錄

卷三

遵例自陳不職疏

報河保兵丁被蒙古掠去疏

題守寧道不便轄忻州定襄疏

議裁屯道兼併驛傳道管理疏

二次請豁永寧州荒糧疏

覆張次仲叩 閹情罪疏

朝廷之任官也因材而器使臣子之受職也量力而承事倘重任不得其人必有僨轅之虞受職不量其力必有覆餗之戾攷諸往昔比比皆然也臣以愚魯謬蒙

任使向叨軍旅之事尚無寸功足紀今仔巡撫重寄安望一籌可施故極知叨非其分不敢冒膺然以

成命難辭黽勉從事蒞任以來若履冰淵

蓋以任重若山誠非蚤力可負也今值京察

大典許令自陳不職正臣量力披肝仰祈睿鑒之日伏思各督撫之不職似莫有過于臣者謹以臣歷任不職有據者爲我

皇上備陳之竊臣以

輦轂舊員久沐

朝廷參養之恩未効犬馬涓埃之報向隸

鑲白旗下未樹寸功及任本旗牛录
益深曠溺乃自我

皇上親政之後於順治十一年正月內謬
蒙

特簡求長于短拔臣于閑散之中曲成器
使授臣以督捕右理事官之職臣自
知力弱不能釐剔逃亡盡心緝捕倖
邀

浩蕩洪恩得寬尸素之戮此臣任督捕時

之不職也本年十月內復蒙

皇上滌垢掩瑕不以臣爲不才陞授都察
院左僉都御史服官年餘不能振綱
肅紀因循糜祿罔知平反祥刑此臣
任僉都御史時之不職也臣兩任京
秩俱不稱職于順治十二年十二月
內復蒙我

皇上畀以晉撫之責彼時臣聞

命驚惶莫知攸措然以感激

熱風集 卷三
三
深恩妄意捐此頂踵以効犬馬遂不自量力而就道矣今任事已經半載自揣未有分毫善政可以上副

睿懷而下濟民生者臣之不職一也三晉之民值姜逆之亂脂膏已竭而又繼之以師旅因之以飢饉戶口凋殘逃亡過半臣不能盡力招徠登斯民于衽席以望流離歸業生理完復臣之不職二也逃亡既不歸業地土因而

荒蕪臣不能設法招墾以致

國賦有虧束手無策臣之不職三也解部錢糧關係

上供各鎮兵餉急如星火祇因人亡地蕪臣不能竭力催解日事誅求終無實濟臣之不職四也晉省近饑小康然而災眚屢見四月內亢陽不雨五月內水雹爲殃夫災不虛生緣政而起推所從來係臣失職臣之不職五也

此由臣之志欲前而力不能心有餘而才不足猶之駑駘之馬非不願與騏驥並騁而限于才力之不逮皆臣不自量力之罪也臣謹遵

旨自陳伏乞

皇上軫念三晉重地將臣不職之愆卽賜重處彰大法於天下以爲臣子不職者之戒則

察典不信而百工知所勸懲矣緣以自陳不職字多逾格并乞

鑒宥臣可勝激切戰慄屏營之至

順治十三年七月初六日具

奏奉

旨白如梅歷任稱職擢撫晉疆着殫心料理不必引陳該部院知道

題爲查訪隱匿掠去兵丁據實申報事

順治十三年七月十一日據山西岢嵐道副使馬燁會呈前事內稱該本道看得河保營與蒙古僅隔黃河帶水分疆畫界恐滋邊釁屯兵設將防禦最爲嚴密也今閏五月二十九日忽差軍丁二十人潛渡打草被蒙古掠去二丁細查軍冊李志興係鄆加月舊名任尚義的係命培正一則隨

母改嫁俗呼李姓一則異父兄弟亥
豕傳訛倉卒密訪遂有疑似之錯嚴
駁再四家屬供証確據此外竝無被
掠之人矣該營將備等官已知掠去
情形自宜據實飛報乃携餅酒瓜煙
三次渡河向倒內等索要二丁本道
申文報憲後署中軍千總沈之芳猶
隱匿真情竟以兵丁渡河種地杳無
音信等語捏報豈非掩耳而盜鈴耶

王叅將分閫統攝不能約束軍丁反
令越邊難辭違禁之條沈之芳不諫
止於差遣之先又隱匿於被掠之後
藐法欺縱百喙難辯矣把總鍾麒防
守梁聘孟越境失兵扶同朦蔽均不
能免於法紀也事關職官軍務本道
不敢輕擬伏候憲裁等因呈詳到臣
據此該臣看得河保營乃極衝邊地
與蒙古僅隔一河中外雖係一統然

有疆界之限彼此俱不容越擾致生
事端故設立兵將以資防捍良有以
也今該營叅將王光前不思邊防爲
重而乃私差夜役趙連芳撥兵二十
名於閏五月二十九日出邊採草以
致蒙古將兵丁鄂加月俞培正二名
掠去無踪復私遣兵丁攜帶酒餅之
類三次渡河講討終不可得夫以採
打馬草私役兵丁違禁縱兵越河致
兵被掠已屬不法且以如此重情輒
上下扶隱不報及至該道訪聞嚴查
而署中軍事千總沈之芳把總鍾麒
防守梁聘孟等猶不據實回復更私
遣兵丁三次赴彼索討釀邊釁而損
國威莫此爲最該將及千把等官俱不
知邊防爲何事可謂目無法紀者矣
若不

題叅重處將來釀患不淺至于邊外蒙

古總屬

朝廷教化之中何得將掠去兵丁竟不發
回任意支飾亦當一併查處者也臣
謹會同督臣張 合詞具

題伏乞

皇上

勅部查議將河保營叅將王光前亟行議
處其千總沈之芳把總鍾麒防守梁
聘孟聽臣等究明以軍法懲治更祈

嚴飭該部將兵丁鄔加月俞培正行令西
蒙古查明是何部落掠去放還歸營
庶

國法彰而軍紀肅矣

順治十三年七月十五日具

題奉

旨王光前着從重議處餘着察議具奏兵
部知道

題爲遵

勅行查事據山西布政司呈蒙巡撫白都御史批據分守冀寧道右叅政王舜年呈查得頒發本道

勅諭內開專轄陽曲壽陽平定樂平徐溝太谷榆次祁縣并忻州定襄孟縣每遇防秋移駐忻州但忻州定襄凡一應錢糧地方事宜俱不申報本道惟恐地方有事按

勅責成不便隨行忻州定襄卽查歷來果
係某道所轄仍將某道

勅書抄錄送道轉呈兩院存案庶日後責
有所歸等因去後續據忻州定襄回
稱查得本州縣係屬寧武道所轄隨
將寧武道

勅諭抄錄一紙擬合申送等因據此擬合
轉報存案庶責有所歸等因具呈蒙
批忻定係寧武道所轄之地何守寧

道

勅內載有防秋移駐字樣乎

勅諭開載職掌攸關仰布政司確議詳報
以憑酌量咨

題

勅稿併發繳蒙此卷查順治三年十二月
二十六日蒙前院申都御史案驗爲
移請駐劄信地以遵

功令以便料理道務事准吏部咨文選

清吏司案呈奉本部送准山西巡撫
申 咨開據布政司呈准分守冀
寧道王叅政咨前事覆詳到院爲照
忻州原屬寧武道轄與守道無涉查
守道所轄陽曲等處歷來駐劄省城
今奉

勅書文憑內有駐劄忻州但忻州旣爲寧
武道所轄而守道似難移駐且忻州
從未設有衙舍况該道舊屬地方俱
在省東南若舍舊址而移駐忻州不
若仍舊貫爲便煩請覆查裁示希咨
回照遵守等因到部蒙批選司查明
說堂奉此查得分守冀寧道冊載管
轄陽曲壽陽平定樂平徐溝太谷榆
次祁縣并忻州定襄孟縣每遇防秋
移駐忻州是以部憑新

勅俱駐忻州駐劄相應咨回照舊等因呈
堂蒙批移咨照舊送司案呈到部擬

合就行爲此合咨前去煩爲查照轉行該道遵奉施行准此擬合就行爲此仰本司官吏照依咨案內事理卽便轉行守寧道一體遵奉施行蒙此隨移守寧道遵行在案今該道復有此請總爲

勅中仍有駐防忻州等字故也應否咨

題改正伏候憲裁等因呈詳到臣據此該臣看得

朝廷設官分職畫疆而守則職業攸關一切地方事務各有責成功罪係焉不容推諉也查山西分守冀寧一道向駐省城稽覈省標各營兵馬錢糧其所轄州縣係陽曲榆次徐溝祁縣太谷壽陽孟縣平定樂平九處至於忻州定襄靜樂三州縣則在省城之北逼近寧武乃寧武道所轄之地非守寧道可得而問也今守寧道右叅政

王舜年所奉

勅書內載有忻州定襄字樣且云如遇秋
防移駐忻州不但責成非該道所轄
之地且忻州竝無衙宇向無移駐之
例煌煌

勅諭職守所繫委不便於因循牽混以開
日後推諉之門所當亟行改正以便
永遵于世世也既經該司呈詳前來
相應具

題伏乞

勅下該部覆議上

請定爲畫一施行

順治十三年七月十八日具

題奉

旨吏部察議具奏

題爲敬陳理財管見仰祈

採擇事順治十三年七月初十日據山西
布政司呈准按察司牒呈該按察使
楊思聖查看得設官分職各有攸司
量地掄才獨專統屬當日已斟酌位
置似于地方無損益者第時局旣更
制作應躬或居官者曠職而尸素不
慚縻祿而債轅滋矣多一人則多左
右之飽飽左右則饑蒼黎之腹甚且

長才而止獨理公餘頗暇拙士而踞
衝繁惟日不足此當事目擊時艱故
以裁併爲用人酌可否爲

國計定盈虛也然裁併於他省則宜而
於三晉殊有未便者每一道各居一
路凡在屬縣聽其控制水旱凶災惟
道是策兵火盜賊惟道是咎方慮鞭
長難及而起肘腋之慮則兼理一說
所不能裁併之議是不可行也今本
司再三籌度論形勝覈才品酌量繁
簡緩急絕無一道可裁者也伏候裁
酌轉報等因到司准此該本司左布
政使彭有義看得

朝廷設官分職有一衙門卽有一衙門之
職掌一衙門之事務未有曠閑無事
者也近因財用不敷議裁守巡各道
誠爲裁冗省費之盛舉職等敢不詳
加確議但三晉幅幘遼濶延袤千有

餘里惟設邊腹九道各駐扼要之地
均有稽覈兵馬整飭防禦以及巡守
地方之責似乎缺一不可况糧道督
理通省糧儲驛道清理合屬驛遞事
務頗煩歸併爲艱誠有難以輕議裁
併者既經臬司議覆前來相應呈請
合無請祈本院俯念晉省各道廖落
非他省冗員可比俯爲具

題照舊庶地方無曠廢之虞而事務不
致叢脞矣等因呈詳到臣據此該臣
以議裁道員關係封疆匪細不敢擅
自主持隨備咨督臣詳酌會商去後
本年七月十七日准督臣咨開爲照
晉地幅輳頗廣各道均有緊要職掌
藩臬二司議之詳矣但奉

旨確議裁留歸併似不容不于無可裁併
之中曲爲斟酌本部院初至地方尚
未悉晉中情形應否裁併諒久在貴

院洞鑒中必有卓識遠謨希卽王稿會
題可也相應咨覆等因到臣准此該臣
看得裁冗節費雖理財之要着因時
酌地須計議之得宜前憲臣條
奏議將守巡驛傳糧屯等道俱行裁併
部覆以地方所關仍令各督撫按查
其地方平險職業繁簡酌定具
奏奉有依議速行之

臣臣敢不悉心籌畫以副

明命隨行據布按二司詳稱晉地邊腹九
道均有整飭兵馬防禦之責缺一不
可而糧屯驛傳二道管理通省事務
俱有緊要職業所繫難以裁併回復
前來臣復移會督臣張從長詳議
則云似不容不于無可裁併之中曲
爲斟酌誠仰體

皇上理財之盛意與臣所見相同也臣
得而詳言之晉省爲山右重地幅員

遼濶西聯秦豫北接沙漠額設邊腹
九道內三關三道控扼巖疆有邊垣
兵馬錢穀之寄今中外雖係一統邊
備仍不容弛此斷斷難以議裁者至
于腹地六道俱有分轄府州縣分及
稽覈兵馬錢糧之責處處要衝離省
有千里五六百里不等不但值此地
方荒殘之後亟藉各道分猷以資整
理即使承平日久而崇山疊障奸宄
易生脫有他虞鞭長莫及此俱斷斷
難以議裁者今臣確酌于無可裁併
之中而曲爲詳籌省城原設驛傳糧
屯兩道驛傳司通省之郵政清覈驛
站錢糧歲約壹拾伍萬有餘事非簡
易亦難議裁惟有糧屯一道其所轄
屯糧僅叁萬有餘備辦客兵糧料草
束已奉

旨責成右布政矣則糧道之事頗稱簡易

今若歸併驛傳道兼理而將糧屯道一缺卽行裁汰允屬至便而可行者也臣謹會同督臣張

按臣高

合詞具

題伏乞

皇上睿鑒

勅下該部議覆施行

順治十三年七月十八日具題奉

旨吏部議奏

題爲疲州疊殘獨重荒亡未復生耕等事順治十三年七月初八日據山西布政司呈該本司左布政使彭有義查看得永寧州介在萬山叢中久罹兵燹地荒民逃蓋有日矣前撫於八年間

題免荒亡奉有二年後起科之文該州多方招墾民窮無力以致荒者愈荒國賦無輸從前查驗已確荷蒙

嚴旨覆令道臣確查敢不益加詳慎今該道親詣州境履畝踏看則稱滿目蓬蒿鞠爲茂草委屬真正荒亡竝無纖毫假飾具有不致扶同甘結前來本司覆核明白相應呈請合候本院軫念民瘼亟請

題豁以救殘黎可也等因呈詳到臣據此該臣看得地方凋殘以致黎庶逃

亡田土荒蕪

國賦有虧題

請蠲豁此乃萬不獲已之事倘未經駁勘明確孰敢草草上

聞任令怠玩官吏藉口而拖負錢糧也伏查永寧一州僻處山隅素稱瘠薄之區疊罹兵燹之慘人亡地蕪滿目荆榛業該前撫臣劉爲民請命奉旨蠲免八九兩年錢糧有二年後起科之文自當遵奉而行無奈該州人民死

亡甚衆流徙未歸竭力招墾卒無應
者前報之荒至今如故臣不得不再

請

皇恩亟行蠲豁而部覆恐開效尤之端議

照

前旨起課誠虞官吏有藉口妄報扶同欺
隱者耳奉有若係真荒自應照例蠲
免之

旨仰見我

皇上明燭逃亡之屋視民如傷之至意也

今臣等遵

旨行司嚴責該道親詣察勘委係實實真
荒與前勘相符並無扶同情弊取有
該州及該道踏勘印結備造荒地花
名文冊前來臣等覆核無異相應遵

旨明白具奏除原冊印結咨送戶部查核

外臣謹會同督臣張

按臣高

合詞具

欽定四庫全書
卷三

題伏乞

皇上軫念民瘼

勅下該部覆議將永寧州荒地錢糧卽行

蠲免上

請行臣等遵奉施行

順治十三年七月二十二日具

題奉

旨戶部核議具奏

題爲爲國除害賄殺無辜

勅部行提嚴究眞僞立剖奇冤俯賜昭雪

以甦獄斃事順治十三年七月初十

日據山西布政司左布政使彭有義

分守冀寧道叅政王舜年分巡冀寧

道僉事馮嘉會會呈蒙巡撫白都御

史案驗准刑部咨山西清吏司案呈

奉本部送刑科抄出原任靜樂縣知

縣張次仲奏前事等因奉

旨張次仲被叅問擬未經題結復越禁瀆
陳殊干法紀着該督撫按一併確審具
奏如係虛捏加等治罪該部知道欽此
欽遵抄部送司奉此除將賫本人張
士英發兵馬司遞解外相應抄錄原
疏移咨督撫按確審等因案呈到部
擬合就行爲此合咨前去煩爲遵照
旨及咨文內事理即將張次仲所奏情節
併本內有名員役一併確審如虛加
等治罪限二個月具

奏施行准此案仰該司官吏查照奉

旨及咨文內事理作速會同守巡兩道卽
將張次仲所奏情節併本內有名員
役秉公逐一確審如虛加等治罪定
限一個月通詳以憑覆核會

奏毋得含糊延徇未便等因蒙此又蒙

督按兩院案驗同前事該本司左布
政使彭有義會同守寧道叅政王舜

年巡寧道僉事馮嘉會審明會看得
犯官張次仲因貪婪而蒙叅審情真
以擬絞乃不俛首服辜輒敢下水拖
人及審其所奏之款悉屬李室審結
之事其中虛實雖不相侔而通逆謀
叛情倪畢真既經另案擬斬無煩爲
之深究惟是疏內有賄通問官硬坐
贓私等語又不得不求諸確實歷經
府廳嚴訊司道會審皆屬猜疑之言
並無確據之情似難以仇口而誣人
名節矣總之次仲欲求脫罪故飾詞
妄瀆法宜加等然已擬絞無復再加
其子張士英聽父指使違禁叩

關亦屬不法但兵馬司未經遞到無憑究
擬既據府廳會審前來相應呈請合
候憲臺覆核具

題等因通詳蒙巡撫白都御史詳批張
次仲因貪婪而被叅擬絞李室係蠹

惡而究明擬斬是貪惡俱當伏法今
次仲以問擬不服具疏叩

閣奉有一併確審之

旨蓋因次仲疏內云李室挾恨賄金捏送
按院致叅復賄通問官暗坐贓銀重
擬也今遵

旨承問須先究明賄通實蹟有何憑據何
得以猜疑之事輕責

宸聰次則當訊其原叅審實各款何款不
實再加確質方可以副一併確審之
旨而服次仲之心至若單列李室惡蹟更
須備查李室原案何款已經究明入
招何款尚未查究備開前件逐款確
訊方便本院會審覆核具

題今細閱招詳將次仲辯疏不服情節
未經細鞫而賄通原叅及問官確據
未行實吐且敘招前後紊亂而讞詞
又浮泛不切甚爲草草仰司再行從

公會審細心研鞫限五日內通詳毋
徇毋縱繳蒙此又蒙巡按高御史詳
批張次仲所

奏李室惡蹟果盡屬審結之事但次仲
疏稱李室行賄楊廉使及陳王二刑
官係何人過付係何月日有何証佐
務要訊明豈容次仲游移之詞含沙
汚人名節伊子張士英違禁叩

閣法所難寬事關會

題該司道嚴審確實速報仍候督撫詳
行蒙此又蒙總督馬侍郎批仰候撫
按覆核會

題繳等因批行到司又蒙巡撫白都御
史憲票准刑部咨山西清吏司案呈
奉本部送刑科抄出山西巡撫白

題前事等因奉

旨三法司核擬具奏欽此欽遵該本司理
事官敖哈同署司事員外郎李之芳

核擬呈堂該本部會同院寺覆核無異會看得張次仲一案未經該撫題覆先令子張士英賁本叩

聞奉有該督撫按一併確審具奏之

旨欽遵咨行去後此案應俟督撫按覆到之日臣等一併核擬具奏可也等因具

題順治十三年五月二十六日奉

旨依議欽此欽遵抄部送司奉此相應移

咨煩爲遵照

旨及咨文內事理查照施行准此仰司官吏遵照覆奉

旨內事理卽將張次仲等一案作速從公一併會審明確依律具招呈詳以憑會

題毋得延緩施行等因該本司左布政使彭有義會同守寧道叅政王舜年巡寧道僉事馮嘉會將張次仲等一

干犯証帶至寧化府公同逐款細心
研審各犯口供俱附各款外該本司
看得訊盜憑贓訊事憑証此從來不
易之理張次仲先後兩案一併研審
証佐被害口供鑿鑿有據竝無纖毫
岐異而次仲則強項不屈惟據一已
之是遂謂衆口之非觀其群起攻鳴
詞不容情則靜邑士民果於次仲何
冤何仇耶况當日次仲被衆原出於

司道府廳公揭于李室風馬牛不相
及者今何混扯揅連以爲狡飾地也
然室已另案擬斬家產籍沒入官卽
有未盡之私當亦無所用其追究而
罪亦莫可以加矣再如賄通問官一
節幾經嚴訊絕無影響而仲則尋風
逐波指東話西滿口飾賴終無確實
然其咆哮之狀溪噬之奸猶令訊者
畏縮總之次仲身負大辟不自然艾

惟欲鼓簧弄舌與求少脫法網殊不知明明律例赫赫王法誠有難以寬假者仍照原擬無枉無縱伊子張士英既以遞解到縣卽當解省聽勘該縣付之次仲不知縱之何往屢經追究奸避不出爲次仲者真可謂閔不畏法矣除勒令該府訪緝另結外相應呈請等緣由連人呈解巡撫白都御史該本院於本年六月初八日會

同巡按高御史并集司道府廳各官公同覆審畢詳批仰照另牌行繳又蒙巡撫白都御史憲牌前事據布政司會同守巡兩道呈解張次仲等到院除原叅張次仲共十一款俱傳呼証佐細加質詢與前審無異者不開外內惟任德告趙干城以致罰干城磚貳萬灰貳拾石折銀壹百兩一款次仲辯稱所罰磚灰係修城之用已

詳明寧武道見有票文可驗並非私自濫罰且止折銀叁拾貳兩而無壹百兩之數等情本院看得濫罰磚灰固係違禁然係公家之用如果有道文似不便槩坐次仲之賍致令呶呶不服也此應卽取寧武道原票驗明一併送閱者一也又如擅責生員王聘等一欸內要証王友英郭大寧未到理應該司道再行拘審者二也至于次仲疏稱李室賄金通神捏送按院糾叅昨按院覲面公審據次仲供稱原無受賄亦非屈叅止因問成死罪不得不叩

閣等語又疏通同問官助惡滅官錢可通神一欸據次仲供稱原無過付見証只是將我問成絞罪所以疑心今日犯官也不必辯了等語是二事俱係誣捏業已明白矣若夫次仲辯疏所

開李室惡蹟俱經按院具疏

題叅在前則非庇李室而苛次仲明白
易見但原辯共十七款內如李室等
歷欠錢糧叁千柒百餘兩藐抗不納
一款又村民劉盛牧駟誤踐地苗生
擒打死一款尚未明確所當再行確
寃者也除原詳批發外擬合就行爲
此仰布政司即便會同守巡冀寧兩
道照牌事理將本院會同按院親審
張次仲前項未明各款再行拘齊會
審明確序招妥當會詳以憑本院覆
核會議具

題毋遲滯毋徇庇毋游移也等因到司
蒙此備蒙本司覆行太原府再行嚴
審確詳報蒙此又蒙本司信牌據經
歷司呈抄蒙巡按高御史詳批張次
仲一案昨與撫院司道會審之際次
仲揭李室不軌室已擬斬曾經本院

具

題矣至於承問各官受賄豈容無確據而恣意誣讞餘欵果無遁情該司公同兩道細訊妥招張士英務獲竝擬速報仍候督撫詳行等因到司牌仰本府蒙此該太原府知府蔡祖庚遵照駁牌再三細加研審看得張次仲奏辯情由疊審在案無容再議惟罰趙千城磚灰一欵前此未見道廳之

申則此罰爲次仲入已之贓無說今再鞫卽據有道廳之申然止云罰備磚灰修城并未嘗云及折銀則此叁拾貳兩之贓歸之何處縱次仲強飾自謂買備磚灰然與原申詳文已自相矛盾且又千城口供有備銀交庫之說則次仲終難辭染指之咎矣伏乞憲裁等緣由申詳到司據此該本司左布政使彭有義會同守寧道蔡

刑部奏稿
卷三

三十三

政王舜年巡寧道僉事馮嘉會會看得此一案也幾經研審歷蒙駁勘其賄通問官諸情以及疏開各款率多欺飾誣枉悉在憲臺洞鑒中矣惟有一二款稍介疑似是以覆煩憲駁及遵行府廳確訊則稱罰磚灰雖有申道之文而趙千城實有折銀交官之供况屢審已確似難聽其狡飾至刑責生員信有其事然不過本犯之餘蹟無足深究者而李室抗糧一款查無叁千柒百之多合戶所欠者惟有貳百肆拾餘兩見在勒限嚴追未可盡爲李室一人罪也再訊李室打死劉盛一款並無影響而証佐不敢妄指訊者亦不敢將無作有矣旣經該府詳審前來司道覆審無異相應呈請合候憲裁覆核具

題等緣由呈詳巡撫白都御史蒙批據

詳覆訊原駁各款俱是矣但擅罰磚
灰一款既稱折銀交庫的屬次仲漁
獵原無他說然前日會審云有寧武
道票文可驗今該府覆訊又云有申
道詳文見在或票或詳何不取而呈
驗且云文內止罰磚灰並無折銀則
當日寧武道如何批行一目了然今
詳內仍是含糊臆度不取原文送閱
其意何居如此大案須事事確有的
據不便少留疑隙仰司將此款作速
再行確查明白三日內詳覆以憑酌
量會

題行速速繳蒙此該本司左布政使彭
有義會同守寧道叅政王舜年巡寧
道僉事馮嘉會會看得張次仲擅罰
磚灰雖經申詳寧武道批允而本官
實折銀交庫屢經研審趙干城之口
供鑿鑿謂次仲之無染指誰其信之

故該府廳看語云道詳不足憑也今
蒙憲批確訊職敢不矢愼但情固如
是不能爲本犯寬解非敢有所含糊
而留疑隙耳所有該道詳文擬合一
併呈驗等因呈詳到臣據此該臣看
得臣子食

君之祿而貪殘敗檢則

國有典刑不容飾法以從寬如果受人
之誣而讞擬不協則寃所當鳴自應
辯理以昭雪斷無有貪酷昭彰穢蹟
有據如張次仲尚敢以叅寃不服而
越禁賣陳肆妄無忌者臣等奉有一
併確審具奏之

旨仰見我

皇上因次仲辯疏內有糾叅十一款款款
虛誣問官硬作主持暗坐賍銀擬絞
等語故必將前案一併覆審庶可以
服次仲之心以定其越賣之罪足徵

日月照臨無微不燭也然次仲原辯疏內
將前次承問司廳各官任意誣讎自
是不便復令前官究問遂備行布政
司左布政使彭有義分守冀寧道王
舜年分巡冀寧道馮嘉會公同確訊
復經臣等細心批駁會同按臣高

秉公親審衆口一詞証據鑿鑿原
叅各款事事不誣前定爰書並非過
當則擬絞不枉水落石出而無所掩

飾矣當臣等會審之時就次仲強項
不服者堅執按臣之叅必係李室挾
仇私揭殊不知官吏不肖必先據府
廳之開揭復按司道之公評斷無有
憑一士民之暗揭可以卽登啓事者
况李室亦經按臣別案問擬李室旣
不能揮金以全自己之身家性命其
不能揮金而害次仲也明矣再就次
仲之嘒嘒不服者云別案犯官俱不

問死罪獨將犯官擬絞所以疑心問官受賄及究其過付憑據毫無實指殊不知讞獄憑証擬罪憑賍今次紳之罪按賍應絞孰敢藐

朝廷之律令而徇縱之今以疑似之心卽誣承問官之受賄以受叅之故又疑李室之賂送無端虛捏誑瀆

宸聰特愈深其奸狡之罪戾耳至若辯疏所開李室各款先該按臣具

題見經部駁奉

旨覆審容臣等另案究結在李室自有應得之罪總不可以蓋次仲被叅之愆次仲係自作之孽于人何尤而乃一味咆哮任情潑噬也卽此益足以見其向日服官之恣睢無所不至矣虛捏既眞理應遵

旨加等治罪但本犯業已擬絞無可再加應照原議發落者也再照其子張士

英代父叩

聞部覆止令通解回晉原無可擬之罪自
應免究既經該司道會詳前來臣謹會
同督臣張 按臣高 合詞具

題伏乞

勅下該部覆議上

請行臣等遵奉施行

順治十三年七月二十七日具 題奉

旨三法司核擬具奏

題為彙報水雹災傷事順治十三年八

月初二日據山西布政司呈本年七

月初四日蒙巡撫白都御史案驗本

年七月初三日准戶部咨山西清吏

司案呈奉本部送戶科抄出巡按山

西監察御史高 題前事等因該

本司左布政使彭有義查看得天災

流行無時不有水雹叠告民奚堪合

故百姓一見災降不勝驚慌州縣有

司牧之責不得不急切痛陳也但時
當盛暑之際夏秋田禾雖被傷殘猶
得佈種晚田茲據各該印官俱已勸
民補種不敢望求蠲免而州縣亦不
敢朦朧混報無容議矣惟是沁州處
萬山之中地瘠民疲百姓窮苦至極
值此兵燹之後俱稱無力播種非相
率思逃卽束手待斃情實堪憫行據
汾州府通判劉文德履畝踏勘造有
分數確冊前來似應急爲

請蠲免此極殘之孑黎可也旣經各道回
復前來相應呈請合候憲裁覆核具
題等因呈詳到臣據此該臣看得小民
盡力南畝終歲勤劬所以望有秋也
民命攸關

國賦所繫故凡遇有災稔則必查明題
報仰請

皇恩豁其賦稅以拯濟之如果被災深重

仍議賑恤以存活之此不易之理也
三晉連年荒歉民困已極今歲幸得
雨暘時若可望有秋乃不意于五月
內遼代沁三州及武鄉五臺二縣節
次申報水雹之災臣據報驚慌深爲
戚戚隨一面批行各該道府查勘然
又思時方仲夏二麥雖傷尚可補種
秋禾以望西成倘一經題

報則必奉

旨查勘以致被災之地候勘不敢補種拋
荒一載

國賦既虧災民因而絕食且晉省連欠
節年錢糧甚多考成法重臣正在嚴
督完解倘以零星雹災槩行上

聞州縣印官必藉口民飢不行帶徵小民
亦必藉此觀望不肯輸納矣故臣不
敢草率入

告而督令該州縣印官量給籽種催令補

種業已咨部明白節據各州縣回報
俱稱盡行補種青苗在野刈獲有日
不敢妄冀蠲豁取有印結在案矣不
期按臣未經查明急行具
題總亦仰體我

皇上愛民之至意也今部覆奉

旨行臣等確查分數題明臣不敢卽據前
結題覆復行布政司確查去後今稱
前報災傷州縣實已補種不敢妄求
蠲豁是臣督令補種之舉似有益於
民生復無損于

國賦也惟有沁州一區處萬山之中民
貧而地瘠且受災兩次其第二次之
災在於閏五月二十三日已踰小暑
節令卽有補種亦無濟于事矣其被
傷旣真情殊可憫所當亟懇

皇上下沛仁慈卽行蠲免以恤此州疊年
困苦之災黎也旣經該司查明分數

詳報前來除原冊咨送戶部查核外
臣謹會同督臣張
按臣高

合詞具

題伏乞

勅下該部覆議上

請行臣等遵奉施行

順治十三年八月初六日具

題奉

旨戶部知道

題爲特糾正署州官那移冒支正項大
干法紀道官徇隱可駭一併

上聞仰祈

睿鑒嚴加處分以裕

國用事順治十三年八月初五日據山
西布按二司會呈問得犯人一名方
淫招詳緣由蒙巡撫白都御史批據
詳方淫任內那借錢糧已經鞠明指
稱差役使費借動官銀有劉天賜等

承認補庫俱是矣但原叅擅借大糧壹萬米百餘兩今各里供稱或借備五臺米豆草束或備送蒙古家口因公務事急而借用者今借備米豆草束某次該銀若干當以某項補還往返腳價應何項攤賠蒙古家口車牛應作何抵償既係公事斷無累民之理詳內通未明白聲說至各里所借使費貳千陸百有奇據供因造冊盤費等項使用此係各里私自借用出自何人償補若攤派里下必係奸里借名科歛亦須確究明白不便以認還二字可置不問若夫劉順昌將交代不明之故先已申司亦當敘入招內庶便具

題仰司會同按察司再行確訊將撥補借動認還款項俱明晰造冊妥詳以憑覆核仍候督院詳行速速繳依蒙

牌仰本府查照批駁情節再加覆核
申詳到司據此該本司左布政使彭
有義會同按察使楊思聖會看得代
州那移一案屢審固已得情惟因錢
糧欸項未經分晰明白致蒙憲臺覆
駁茲據該府逐年逐項俱已登荅造
冊欸欸均有着落追舊欠以補借項
無容議矣至於運送五臺糧草所費
腳價舊無開銷之例而造冊紙張諸
費借領各有其人自當按名追還無
令攤派里甲者也官役之罪悉照原
擬洵無枉道而劉順昌原申已經敘
入是在憲臺覆核具

題可耳等因呈詳到臣據此該臣看得
州縣額派錢糧各有正項每年徵收
自宜逐項正支正解庶倉口得以清
楚而無濶也代州革職知州方濬不
遵

明禁通同胥役張紳等輒將節年錢糧那
新解舊任意通移今查明除正支正
解外尚那借捌千壹百捌拾捌兩零
雖經

題參之後已獲批廻但有原借正項倉
口未經補還應照各年逋欠銀數追
完還補者也至指稱使費借動銀貳
千陸百餘兩雖因運送五臺米豆及
送蒙古家口并造冊紙張解銀路費

等項使費乃係各里里長私自借用
並非與各衙門差役使費者已據里
長劉天賜等供吐明悉自應於各里
長名下照數追出以補正項者也惟
是方濫職任州牧而那借錢糧日無
法紀雖無侵漁之事監守之責難辭
滿徒非枉張紳李承惠劉汝藩董詩
俱以主守而不正收正支那移出納
計贓流徙于法允宜其劉天賜薛光

刑部奏
卷三
雨李寵劉爾訓王國祥薛元正馬計
艾劉永慶孟守通程繼武劉之奈劉
爾誠孫連張應必等俱係里長而擅
借官銀各擬杖懲足蔽厥辜也至于
署官劉順昌者接管之初卽行申報
見有司案可憑那借情弊原與本官
毫無干涉所當原情還職以邀

皇上浩蕩之洪仁者也既經兩司查明備
細造冊問招會詳前來除原冊咨送

戶刑二部外臣謹會同督臣張

合詞具

題伏乞

勅下該部覆議上

請行臣等遵奉施行

順治十三年八月十二日具

題奉

旨刑部核擬具奏

題爲欺

國害官異常大變乞

勅親訊黑冤立剖俯賜昭雪以彰

皇仁事順治十三年八月初十日據山西

布政司左布政使彭有義會同分守

冀寧道叅政王舜年分巡冀寧道僉

事馮嘉會會呈蒙巡撫白都御史案

驗准刑部咨山西清吏司案呈奉本

部送刑科抄出原任興縣知縣袁四

維奏辯前事等因奉

旨袁四維被參問擬未經題結復越禁竇陳殊干法紀着該督撫按一併確審具奏如係虛捏加等治罪該部知道欽此欽遵抄部送司奉此除將賁本人袁新吉發兵馬司遞解外相應抄錄原疏移咨督撫按確審等因案呈到部擬合就行爲此合咨前去煩爲遵

旨及咨文內事理卽將袁四維所奏情節

併本內有名員役一併確審如虛加等治罪定限二個月具奏准此案仰布政司查照奉

旨及咨文內事理作速會同守巡兩道將袁四維所奏情節併本內有名員役秉公逐一確審如虛加等治罪定限一個月通詳以憑覆核會

奏毋得含糊延徇未便蒙此又蒙督按兩院案驗等因該布政司左布政使

彭有義會同守寧道叅政王舜年巡
寧道僉事馮嘉會齊集公所逐款嚴
加覆訊各犯証供吐無異據此會看
得袁四維居官貪婪因事受財既蒙
糾叅擬絞實乃自取之譴於他人何
尤焉胡乃含沙射影飾詞妄

瀆及經府廳疊訊司道覆勘前案所叅之
款於諸証所供之口纖毫不爽則本
犯之原無誣枉也明甚惟疏稱楊廉
使索要銀伍百兩之說不惟風影無
據而所指之劉一佩通無其人卽本
犯詞屈理窮良心不昧亦稱知之不
真係伊侄袁新吉捏寫則執法者之
清白雖涅而不淄矣至於賄通孫學
道之情據疏雖有指証細訊皆屬猜
疑夫筑筑書生貂裘何得千金何輸
卽有賣房之貳百金悉爲殯塋其父
及賄俛四維之費而又安有多金以

復送學道更何爲也至其額外多進紅案竝無其名劣等提優考簿又皆無據况百姓原進在額數之內而賈希誼又原考居五等似難以仇口而誣人名節耳總之事因孫璋而起私由學道而發以故積恨之深砌詞捏聳蓋亦自深其罪狀再訊疏內單款非遠年莫稽之故事卽張帽李戴之虛詞不知本犯被叅與興邑士民何預而乃東捧西扯將通邑之人恨不一網打盡則其刁悍潑噬誠可惡矣惟劉相國劉璠父子作惡乘亂受僞或假票而催攢糧芻或具領而擅動倉糧真乃無天無日愍不畏死者審供旣確票領有據按以謀叛之律駢斬籍沒夫復何詞但彼當日曾赴固山額真墨軍前投誠給有印票一紙又當爲之別論是在憲臺請

旨定奪職等未敢擅議袁四維所奏雖未
必盡實而劉相國父子受僞有據相
應免其加等仍照原擬可也孫璋等
恃矜抗糧法難輕貸各擬杖懲洵無
枉縱至袁新吉違禁叩

閣律應擬戍但據伊供稱投入旗下難以
憑信應否減免聽候大部查確酌奪
等緣由具招通詳蒙巡撫白都御史
詳批據詳原叅袁四維各款俱覆審
無異而賄通臬司學道俱屬捕風則
逞奸反噬昭然明白奉有如係虛捏
加等治罪之

旨今仍照原擬是否允協卽云劉相國之
父子受僞是真然與原叅五款無涉
不能蓋其被叅越賣之愆况相國當
日之謀叛雖真既有固山額真印票
卽屬投誠之人當另作一案究詳以
便特疏請

旨定奪未便於此案內卽作招首以致碍
難會

題也若夫袁新吉雖違禁叩

關係四維所使部文止行遞解未令擬罪
不必苛求事關大案不厭詳慎仰司
再會守巡兩道將四維辯疏各款再
行確審其劉相國向年謀叛投誠情
節另具詳由俱妥確具文通詳以憑
本院會審具

題偽牌領狀併發仍候督按兩院詳行
繳蒙此該本司牌仰本府遵照牌內
批駁情節卽便再加確核各另具妥
詳限次日送司以憑覆核據轉慎勿
撻扯一詳致干再駁未便等因於本
年六月十六日牌行到府該本府知
府蔡祖庚遵照批駁詞語覆審各款
犯証所供與前無異除將袁四維奏
計劉相國劉璠受偽謀叛一款事關

重大違蒙批示摘出另詳外看得袁
四維性貪而狡行僻而好言僞而辯
原叅各款屢勘情真實奏支詞研窮
盡假以興縣之令殘虐興縣之民已
屬不堪乃又因旣墮之醜連累多人
讐孫學道之發其賍私恨楊臬司之
按以大法誣賴無端讐口反噬疊經
推鞠畧無風影判然淄素黑白分明
似此虛捏自宜遵

旨加等治罪但按加減罪例加入死者依
本條註云加入絞者不加至斬今四
維罪已至絞法無可加相應仍照原
擬孫璋等通糧隱丁殊屬不法除行
縣查追姑從責戒以儆將來劉相國
劉璠受劄從僞兼有投誠印票緣由
遵奉憲批另敘具詳矣至袁新吉供
投旗下亦未奉部文擬罪相應免議
統候憲裁定奪等緣由於本年六月

初九日申詳布政司該本司左布政使彭有義會同守寧道叅政王舜年巡寧道僉事馮嘉會會看得袁四維居官貪婪存心狡險既以萋菲之口誣譏問官復以鬼蜮之詞捧扯無辜訊審並無冤枉告欵率多子虛則其欺

君妄瀆罪固不容於誅但本犯已服繯首之條惜無再加之律仍照原擬無任無縱其姪袁新吉違禁叩

聞審既涉虛法應重擬既係四維主使似難爲之苛究耳劉相國劉璠父子受僞雖審供情真而投誠有據已經另詳請

旨定奪無容再贅惟是孫璋孫世達連抗國課法亦難寬所當依律杖懲仍追欠糧可也緣係奉

旨勘問事理職等未敢擅專伏候憲臺覆

審具

題等緣由通詳蒙巡撫白都御史詳批
此案已經本院會同按院親審原叅
五款之內惟取各舖戶貨物一款尚
未明確其袁四維辯款除劉相國另
案具

題外其餘俱與該司道前審相同仰將
趙雲盛及各舖行一款再行查審明
白速詳督院請示會

題行偽牌票領俱發回繳蒙巡按高御
史詳批犯官袁四維

奏辯款多重大內稱孫璋備銀千兩貂
裘一件認孫學道爲同宗楊梟司差
書辦劉一佩索銀伍百兩應嚴究係
何月日何人証佐其濫取童生據詳
興縣多進紅案並無其名昨本院同
撫院會審之際而四維又供撥發永
寧河曲二邑速行縣查至於孫璋孫

世達抗通

國課數百金法難寬縱劉相國劉璠父子受姜叛偽職攻堡開糧逆跡昭然況偽劄可據雖有固山墨給印票非請

旨行查真偽孰敢遽信其未到孫世斌萬氏等速提及未妥各款該司同兩道細訊務求得情確擬事關會

題勿視泛常仍候督撫詳行蒙總督張

尚書詳批據詳袁四維捏誣臬司學道賄賂事情毫無証據惟劉相國父子實受偽職及覆訊四維原款無異似已得情但事關

欽件不厭詳明仰再逐一秉公研審勿或徇縱以留疑端勿得含糊以滋辯竇須人人輸服方可據以入

告也至如案內馮明禎從賊支糧係何時逃遁何不緝究當日支過糧草王象

積匿不報上必有情弊何云無賄白
姓係十二名內其孫承紀等五名何
未訊及孫世達等隱丁若干卽宜究
追何但云行察孫幼啓抗糧霸娼自
當提究何稱另結孫世選等有無侵
吞糧草亦須察明何得以僞官支放
一事混回干証趙世彩等可否不到
孫在奎等霸娼毒害情由可否止以
劉福兒回塞以上各款尚多未晰袁

新吉前引爲民後引充軍事例不無
矛盾作何歸一仰一併研審立具妥
招速報蒙此該本司左布政使彭有
義會同守寧道叅政王舜年巡寧道
僉事馮嘉會會審看得袁四維叩

聞一案關係綦重職等詳審敢不虛公屢
經研訊毫無遁情卽本犯自知理窮
每至會勘之時蓋已俛首結舌無復
置喙緣原疏開款繁多其中証佐間

有未到或本犯事外棒扯不及行查者未免少涉疑竇憲臺惟恐中有枉縱逐爲駁詰誠乃詳慎至意茲據該府轉行河曲永寧二州縣確查竝無改換額外一生而諸款又盡屬子虛然府詳已逐爲勘明無復職等再贅惟是本犯告辯劉一佩索賄情由所指住居有地店主有人不得不爲提訊及三面對質嚴刑推究而四維忽以

爲有忽以爲無口供閃爍情詞莫定抑且名諱不投讞者何敢據以定案乎總之四維自畏縲首之律故爲不情之詞縱使罪無可加而亦無可解仍照原擬庶足蔽辜袁新吉違禁妄瀆律應擬戍但部文只于通解未令究擬且供係旗下之人相應聽候大部議奪可也其餘悉如前詳統候憲裁具題等因會詳到臣據此該臣看得縣令

職司民社貪殘暴橫則白簡所不容
寬既已掛名彈章遵

旨究追則

國法自所難貸乃有興縣革職知縣袁
四維者大可異也本犯賦性貪婪舉
動乖張以致前撫臣陳 特疏
題叅所以爲民除害拯興邑之民於湯
火之中也既已奉

旨提審自應靜候處分乃一味放縱任意

反噬未經審結輒行叩

閣滿牘虛詞盡屬欺誑此等奸狡目中不
知有

君尚何法紀之知畏耶臣等奉有一併確

審具

奏之

旨仰見我

皇上因四維辯疏有妄害廉官捏列五款
等語也臣等緣四維將承問各官誣

詞捏砌不便復令臬司究問遂備行
布政司左布政使彭有義分守冀寧
道王舜年分巡冀寧道馮嘉會公同
確訊復經臣等細心批駁會同按臣
高 秉公親審將原叅各款逐一
覆核如收糧加耗買物短價審事受
賄各款証口鑿鑿並非誣枉至若四
維所辯孫世馨等賄囑學道孫籀及
楊兵備差役索賄等項情詞屢行嚴
訊茫無確據卽質之四維之曰亦惟
俛首而無他說也其所以曉曉致辯
者惟云前撫臣之叅必係學道開送
又云問成絞罪不得不辯故捏此無
影之詞以上賣

宸聰耳殊不知開送貪吏穢跡非學臣可
得自主而讞獄憑証自有

朝廷之律令也至於劉相國劉璠受僞情
節既有投誠印照且係遠年之事臣

已另疏具

題請

旨發落其孫璋孫世達等連根隱丁應俟
查明確數另行追究總俱不能蓋四
維原叅五款之罪亦不能蓋四維越
禁瀆陳之愆祇益彰其暴橫恣睢下
水拖人之伎倆耳虛捏既真理應遵
旨加等治罪但本犯業已擬絞無可再加
應照原議發落者也再照袁新吉賚

本赴京出於四維所使自應免究既
經該司道會呈前來臣謹會同督臣

張

按臣高

合詞具

題伏乞

勅下該部覆議上

請行臣等遵奉施行

順治十三年八月二十五日具

題奉

旨三法司核擬具奏

除前因由來對帳會同辦理
本使臣等因由來對帳會同辦理

撫晉奏議

御

卷四 目錄
覆李室等招由疏

報和順蝗災疏

請改撥兵餉疏

題爲欺

國害官異常大變乞

勅親訊黑寃立剖俯賜昭雪以彰

皇仁事據山西布政司會同分守冀寧道

叅政王舜年分巡冀寧道僉事馮嘉

會會呈據太原府申蒙布政司信牌

蒙巡撫白都御史案驗准刑部咨山

西清吏司案呈奉本部送刑科抄出

原任興縣知縣袁四維奏前事等因

撫晉奏議

目錄

卷四

題劉相國父子投誠疏

覆石琦京詳疏

請查宗產委四刑官疏

題李浹李源失城恢復緣由疏

題陸時雨潛逃無踪疏

題楊臬司三宜三漸疏

奉

旨袁四維被叅問擬未經題結復越禁賣
陳殊干法紀着該督撫按一併確審具
奏如係虛捏加等治罪該部知道欽此
欽遵抄部送司奉此除將齎本人袁
新吉發兵馬司遞解外相應抄錄原
疏移咨督撫按確審等因案呈到部
擬合就行爲此合咨前去煩爲遵

旨及咨文內事理卽將袁四維所奏情節
併本內有名員役一併確審如虛加
等治罪定限二個月具奏准此擬合
就行爲此仰本司官吏查照奉

旨及咨文內事理作速會同守巡兩道將
袁四維所奏情節併本內有名員役
秉公逐一確審如虛加等治罪定限
一個月通詳以憑覆核會

奏毋得含糊延徇未便蒙此又蒙督按
兩院案驗同前事等因備牌行太原

府提審蒙此又蒙本司信牌前事蒙
巡撫白都御史批該本司會同守巡
兩道呈詳犯人劉相國等招由前事
蒙批據詳原叅袁四維各款俱覆審
無異而賄通臬司學道俱屬捕風則
逞奸反噬昭然明白奉有如係虛捏
加等治罪之

旨今仍照原擬是否允協卽云劉相國之
父子受僞是真然與原叅五款無涉

不能蓋其被叅越賈之愆况相國當
日之謀叛雖真既有固山額真印票
卽屬投誠之人當另作一案究詳以
便特疏請

旨定奪未便於此案內卽作招首以致碍
難會

題也若夫袁新吉雖違禁叩

關係四維所使部文止行遞解未令擬罪
不必苛求事關大案不厭詳慎仰司

再會守巡兩道將四維辯疏各款再行確審其劉相國向年謀叛投誠情節另具詳由俱妥確具文通詳以憑本院會審具

題偽牌領狀併發仍候督按兩院詳行繳等因到司牌行本府遵照牌內批駁情節即便再加確核各另具妥詳限次日送司以憑覆核據轉慎勿捧扯一詳蒙此該本府知府蔡祖庚遵

照批駁詞語除將原四維一案并四維所

奏孫璋等抗糧情由另詳外遵將袁四

維

奏許劉相國等謀叛單款摘出審明看

得劉相國當姜賊倡亂之時甘心不

軌受劄從僞甚且假票催糧擅動官

庾有戶書馮舜生等口供確証家人

馮明禎糧單現存又領兵攻打李家

四寨子加銜藩司偽牌偽領現據此等舉動雖據供爲賊所脅而按律明彰

國法似無容貸但相國曉曉置辯云

王師恢復之際曾赴固山額真墨投誠執有印票可憑雖已往之惡跡難贖而將來之悔萌似又可原也蒙憲駁審另具詳由謹遵研訊詳報伏候憲裁定奪繕

題請

冒非本府所敢輕議也等緣由申詳到司據此該本司左布政使彭有義會同分守冀寧道叅政王舜年分巡冀寧道僉事馮嘉會會看得劉相國劉璠父子受僞事在姜逆叛亂之時袁四維因其被叅叩

闕遂捋扯以入辯疏之內但其事干叛逆秉識者不得不爲追究及經三面質

訊而僞票有據糧單可憑按以謀叛之律宜當置諸重典第當

王師恢復之初本犯卽赴軍前投誠給有固山印票安插又當爲之別論惟在憲臺請

旨定奪非職等所敢擅議也今遵批示另摘呈詳伏候憲裁酌奪具

題等因會詳到臣據此除袁四維一案

另疏具

題外該臣看得律設大法首嚴叛逆從僞旣真罪在不赦雖然其有能悔過遷善傾心投誠者卽屬向化之氓

朝廷已久開自新之路殊不便以遠年之事而復行追究也如劉相國劉璠父子於順治六年姜逆叛亂之際被逆黨萬鍊等之迫脅身受僞職隨營劫寨擅動官糧証口僞割咸有確據固宜立賞重典以正

國法者矣但彼時

王師一到隨即歸命投誠見有固山行
縣安插之印票可據安居本籍迄今
已歷七載既不躲避他鄉又無梗化
之跡既已原宥於七年之前安可至
今日而突行寃處也况六年三晉之
亂全省如狂先被追脅而後即同化
者不止劉相國父子二人即如近日
臺山久叛之高鼎尚蒙

皇上恩准招撫多方安插相國等係久邀
恩詔蒙

朝廷寬宥生全之德者似難復議追寃致
啓向化者之疑今袁四維以貪婪被
糾叩

聞妄辯遂撫拾相國父子於事內欲蓋其
被參之愆誠屬風馬牛不相及也除
固山印票咨送刑部查驗外既經該
司道會詳前來臣謹會同督臣張

按臣高 合詞另疏具

題伏乞

皇上鑒裁

勅下該部議覆施行

順治十三年八月二十五日具

題奉

旨刑部議奏

題爲京詳之經制一復刑獄之寃滯自
疏乞

勅部查酌畫一以期明允事據山西按察
司呈問得犯人一口朱氏緣由該本
司按察使楊思聖覆審無異看得朱
氏以烟花下賤恃寵專房石琦壘惑
惟讒是甘袁氏懦弱拱手聽令石宗
鼎畏威至於助虐家政悉由伊爲司
晨者久矣冢婦李氏被疊毆三次凌

虐亦非一日王氏等確供有據至於製盒豐盈不過借釁兼李氏母家未送壽禮而又過費愈觸朱氏蛇蝎之毒蓋此流湫賤一旦得寵擅作威福苛責無所不至徃徃如是原非顧惜也兇器有坑板尺棒傷痕有心坎耳根繩跡乃偏左有而氣額無俱前招讞載甚悉茲蒙覆鞠委無遁情其李氏爲朱氏所斃無疑矣合照原擬絞抵將朱氏等問招於順治十三年八月二十二日一呈解巡撫白都御史詳審蒙批據招本院復親行訊鞠李氏之死由於石琦誕日母家未曾送禮故朱氏卽借端橫湫始而毆繼而勒摧弱質於辣手無他疑矣但石琦儼然丈夫袁氏明明正室而石宗鼎居然一齠年男子何故任朱氏之肆毒旣無顧惜復無救援甘心坐視李

氏之命立斃於烟花小星之手乎豈
朱氏有孟貴之勇而不可制乎部駁
云與李氏何嫌忍令娼妾毆勒深爲
有見也此段情由尚未追究明白况
石琦不能齊家亦有應得之罪事關
回

奏未便草草仰司再行確訊妥招詳報
以憑具

題無再遺有滲實也繳批詳到司一呈

詳巡按高御史蒙批據李氏之死傷
痕有據朱氏俛首其毆斃無疑部駁
朱氏以青樓何惜整盒之豐恐有曖
昧該司再一親訊仍候撫院詳行批
詳到司依蒙該本司按察使楊思聖
將朱氏等一千人犯行提到官覆加
嚴審據王氏供稱小的原係石琦家
上灶奴婢朱氏五月二十一日二十
二日將李氏連打數頓李氏未死又

於本月二十三日因定攢盒又打幾
下又供石琦去姦李氏不從石琦就
將李氏踢了兩腳朱氏又打一頓李
氏因此死了原是實情審據大兒供
稱石琦因姦他兒妻李氏未曾得手
朱氏就拿棒槌將李氏打死又將小
的們關在後院房子裡邊次日小的
們出來看見李氏脖項勒着絲帶又
在門子上掛着是實審據袁氏供稱
石琦原去姦兒妻李氏因爲不從朱
氏就將李氏打死是實審據李子秀
供稱四月初四日小的女兒到小的
家裡說朱氏使小的女兒與石琦托
飯朱氏就出來了石琦就要姦宿哭
泣告與小的後小的到他家不好打
他將他家狗子鎖住罵他來李子秀
與石琦石宗鼎當面質証審據石宗
鼎供稱小的如今二十歲了朱氏將

小的母親還難爲裡何況小的媳婦
子各等情供吐到官據此看得朱氏
毆斃李氏一案其致死之因前俱以
製盒豐盈爲辭已經成獄竟未供明
及蒙部駁本司初審憲臺親鞫尚爾
埋頭及憲駁詳愼然犀洞燭本司再
行親審細研刑訊而始得其根因甚
哉石琦與朱氏真皆禽獸也先因琦
逼姦李氏李氏守正不從琦反逞兇
竟以脚踢嗟嗟翁媳何人淫惡至此
真狗彘不食餘矣尤可異者朱氏爲
琦小星宜入門見嫉蛾眉不肯讓人
者爾乃先令李氏托飯與琦卽抽身
而出又因其不從而行箠楚反爲之
牽絲助興從中撮合者何歟再爲細
究緣朱氏與琦相得甚驩無不順從
且勾引淫泆烟花常態故寧以比翼
之鴛欲讓爲同跨之鶴耳至其毒毆

又竟以老鴇拷粉頭之辣手施於二
八之弱媳宜其不旋踵而斃痛哉李
氏也至一家坐視不救琦既不正矣
則袁氏等孰能救乎李子秀始而不
告姦者亦以朱氏應抵家醜不必外
揚耳今既覆審供明朱氏一絞無疑
石琦行姦有據而尚未成合依律邊
衛遣戍者也伏候憲裁將朱氏等取
問罪犯議得朱氏等所犯朱氏合依

尊長毆卑幼之婦至死者律絞緣係

重刑牢固監候會審

題決石琦依親屬犯姦至死罪者若強
姦未成依律問罪發邊衛充軍候詳
允日拘妻僉解招達兵部知會照出
朱氏係絞罪石琦係軍罪餘情前案
開明今不再照等因呈詳到臣據此
該臣看得李氏之死於朱氏之手也
固由石琦之寵而縱之然石琦之嫡

妻尚在石宗鼎又未他往以整盒細
事何任令朱氏得奮其惡毆勒至於
畢命而莫之救乎其中固有可疑部
駁允爲至當然讞者幾經推敲不能
得其實情良由袁氏不忍暴其夫之
短石宗鼎又不便彰其父之惡卽李
氏之父李子秀亦以家醜不可外揚
故遂通相隱忍歷審而未供明也及
至京詳部駁奉

旨行臣等詳審確擬臣據司詳親提面鞫
隔別研訊祇見袁氏與石宗鼎之情
狀似若有隱忍而不便出諸於口者
逆料其必係因姦致死之情矣於是
覆行臬司細加追究方將石琦之調
姦子媳朱氏之從中撮合一一供明
嗟嗟李氏旣遭此禽獸之淫翁復遇
此兇狠之賤婦因守正不從先受石
琦之踢復借贖盒過費而當朱氏之

毆親姑懦弱夫主幼愚立斃捶楚之下未見護惜之人潔身九泉含冤萬種殊可傷痛若非部駁覆審幾使兇淫漏網貞女莫知矣今據招証口鑿鑿則縲朱氏而戍石埭庶足以懲淫亂而慰幽魂也既經該司問招呈詳前來臣謹會同按臣高合詞具題伏乞

勅下該部覆議上

請行臣等遵奉施行

順治十三年九月初九日具

題奉

旨三法司知道

題爲宗產須徹底清釐特

請破格寬假併陳清釐之着仰懇

嚴旨責成以期毫無欺隱以佐軍需事據

山西右布政司呈爲遵

諭敬陳職掌清查明季藩產事內開准左

布政司咨蒙巡撫白都御史案驗准

戶部咨戶科抄出該本部題前事內

開明季宗藩勲戚及叛逆各犯俱有

庄田產業此賦役全書所不載者而

藩府冊籍又經兵火無存多被勢豪
強佔官役侵隱臣部屢經行查又於
十二年三月具題請

勅各督撫責令右布政使清查去後今據
各省造報前來臣等逐一查核如河
南省王府甚多該省冊報地土房屋
數目甚少且每畝估價止一錢或五
六分不等承種地畝每畝除正賦外
止納租一二分山西省有每畝止納

租伍升山東省有未經變價竟編入
民產納糧房屋尚多無租湖廣省每
畝輪租不過一分江西省王府每府
止報地十餘畝甚至一二畝并藩宗
叛逆竟不開報房屋且上等熟田估
價僅止一兩江南勦逆腴田每畝止
變價銀一二兩不等各省地方更有
無價之房無租之地若不開報欺隱
尚多卽先經行文估變價值包納租

課又復玩延拖欠此等情弊必係勢豪衙蠹悍將驕兵佔踞而地方有司瞻徇顧畏督撫按又慢無稽核方今軍需匱缺前項產價難容朦隱再請勅各省督撫按專遴精明廉幹道臣或推官一員設法清查要見某藩某產坐落某州縣地土若干房屋園地等若干某勳某叛逆坐落某州縣地土若干房屋園地等項若干以前估變數目曾經何官確估變過價銀見經存貯何處見在承種是何姓名輸租甚薄者確議量增未經變價竟編民產者查明輸租俱要逐款分晰有能首出者卽寬以從前隱匿之罪至于舊遺房屋恐年久不脩多有傾壞應從公酌估變價所遺地土招人承種除正賦外酌租多寡按畝輸租不得藉口荒蕪再滋欺隱通限文到三月內

造冊彙報以憑覆核充餉敢有抗違
卽據實

題參以憑從重治罪其經管道官推官
果能清釐有法錢糧增益者臣部查
明議叙紀錄以示激勸如因循徇隱
違限不完查參議處督撫按奉行不
力仍前瞻徇臣部別有報聞一體參
處所有清查各官職名先行報部查
核可也理合具

題順治十三年五月二十一日題本月

二十三日奉

旨各省明季宗藩勲戚及叛逆產業報數
旣多隱匿輸租又復參差弊端不一
殊可痛恨依議嚴行確察如過限不
報爾部卽指叅處治欽此欽遵抄出
到部擬合就行爲此合咨前去煩爲
查照本部

題奉

旨內事理欽遵施行案仰布政司官吏照
依咨案遵奉

旨內事理卽將晉省明季宗藩勲戚及叛
逆房地等項議遞精明廉幹道官或
推官一員查照部文設法清查務要
盡數清出通限文到三月內彙冊報
院以憑咨部充餉如有抗違自干叅
罰未便蒙此本司查得廢藩王田以
及勲戚叛逆遺產委屬繁多茲蒙大

部條議責令精明廉幹道臣或推官
一員徹底清查誠乃慎重至意廢藩
田產非特太原一府而潞汾平澤之
間均有今議責令守巡各道各查各
屬造冊移送右轄綜核清釐彙冊造
報等因蒙批如議速移右司及各道
知照行繳蒙此移行到司本司遵照
轉移各道逐一徹底確查去後又蒙
本院憲牌仰本司官吏卽將明季宗

藩勲戚及叛逆房地等項遵照部文
協同各道設法確查要見某藩某絕
宗某產坐落某州縣房地園窠等項
各若干某勲戚某叛逆地土房屋各
若干報出者若干欺隱者若干其報
出者以前估變數目曾經何官估變
價銀若干解過若干存貯若干見存
房地係何人住種輪租其納糧甚薄
者確議增加俱要逐款分晰明白其
隱匿自首者免罪至於舊遺房屋恐
年久不脩多有傾壞應從公酌估變
價務要公平不得虧價限文到日火
速彙冊送院以憑覆核咨送毋得再
遲等因蒙此該布政使司右布政使
加一級潘朝選看得清查明季藩產
并勲戚叛逆產業一案部題奉

旨查勘原限文到三月內造冊彙報但奉
行之時緣晉省推官乏員而議定守

巡各道就便確查本司綜核彙冊及
本司奉文以來節蒙本院檄催本司
屢次移催各道清理確查去後不啻
至再至三今止准守南道造送確查
過真冊到司見在綜核查算內有估
變價值太廉議徵租課太薄與夫總
撒數目不投尚須復查妥確方敢彙
造其餘各道有據州縣冊送驗未經
親察有報所屬並無坐落明藩勲戚
田產止送叛產文冊者有至今屢催
未准造冊前來者今值限已屆期各
道文冊尚在駁查未到本司無憑綜
核此案關係奉

旨敢不細心查勘孰敢潦草塞責乎即使
各道文冊齊至其中未必不無舛錯
若一經駁勘晉屬州縣幅幘千里往
返動經月餘此誠萬萬不能遵限完
結者况事屬繁難委難依期造竣本

司不得不爲請寬限也除一面飛催
各道查造外相應呈請合無請乞本
院俯賜咨部稍寬限期庶此案得細
心詳查綜核彙造也等因呈詳到臣
據此該臣看得宗產一項自我

朝廷定鼎之後于元二年間卽奉文清查
已將欽賜王田載入賦役絕宗房地
責令辦納租課入我版圖祇緣其中
仍多隱漏故于順治五年間又經前

任右布政使林德馨巡守各道王昌
齡等竭力清查續冊報部矣但晉省
各府明時封有親郡等王并散宗居
住枝派繁衍房產甚多雖疊經清查
仍多朦蔽臣自蒞任之後訪知其槩
正在大破情面徹底清查適准部咨
前因奉

旨責委廉幹道臣或推官一員設法嚴察
通限三月內造冊彙報臣遵照卽行

藩司議委緣各道俱有地方專責不
便董委一人四府推官彼時見任僅
有太原平陽二員又在審理緊要

欽案亦不便于差委故備行通省守巡兵
備各道各查各屬俱造冊送右布政
使潘朝選綜核彙報臣復絡繹嚴催
緣地方遼濶清查不易不能依限告
竣業已達部咨請寬限今又經月餘
雖據有開報或估價太廉或議租太
薄仍屬草率其積年欺隱尚未清出
殊不便以限期已逾而塞責

題覆致將明宗如許產業久爲豪強侵
隱而莫可問也今據右司覆請寬限
誠出于萬不得已臣于此而更有

請焉隱佔宗產非係地方奸惡卽係輦處
豪強臣等之查核愈嚴若輦之朦隱
愈密今欲徹底清釐若僅據各道轉
據各州縣查造則州縣之奸胥通同

隱產之豪右扶同欺蔽終不能盡數清出也今臣謬議俟造冊報完之後再委各府推官逐處躬詣清查仍出示曉諭有自行出首者援

恩詔免罪被人首告者審實之後追其歷年租課繩以重法其首實之人卽將所追之租一半充賞一面密訪向日各宗府管事人役追其底冊查究自是水落石出而不能欺隱矣但幅輿邊遠往返需時倘有舛悞必須查駁仰懇

皇上破格寬限庶臣得以竭力稽查期于侵隱盡吐矣如各府推官不能實力奉行經此清查之後仍有遺漏或經臣訪聞或被人告發卽當從重處治仍祈

天語預行嚴飭庶各官凜惕

功令得以雷厲風行而不敢悠忽從事矣

臣謹會同督臣張

按臣高

合詞具

題伏乞

睿鑒

勅部議覆行臣等遵奉施行

順治十三年九月十三日具

題奉

旨戶部議奏

題爲變出非常禍遭最慘謹比例痛陳
始末仰乞遵

旨代題以廣

皇仁以勵孤忠事據山西按察司呈該本
司按察使楊思聖覆詳看得姜逆猖
獗晉中全省震騰州縣瓦解非獨芮
城河津二縣爲然而二縣縣令則實
有異人者今奉院批查議隨查得芮
城原任知縣李浹該縣以彈丸小邑

聞變卽簡練鄉勇多方守禦不意奸
細李奇品等開門領賊致芮城失陷
挾帶家丁護印潰出重圍家丁被害
渡河請兵隨營嚮導催僨芻糧遂殺
偽薛勤王等而芮城以復又查得河
津原任知縣李源該縣以瓜期膺薦
已當考滿聞逆黨張三等實爲賊細
卽練兵備械請蒲營移鎮方期協禦
不意蒲營掣回兵逃賊阻亦抱印赴

秦請兵嚮導追賊北山獲張家壁等
而河津旋復此二官者未失事先俱
不乏陰雨綢繆而無柰變生肘腋內
外交訐孤立無援以致不保其崩解
情形既有可原及失事後或效秦庭
泣請或效關中運饋挺身嚮導保印
恢復其孤忠盡瘁又復有可嘉較之
棄印委城望風鼠竄者眞失事雖同
而立功實異矣且蒙各院題叙卷案

可稽據士民口碑印結可憑况同時
請兵各官如猗氏知縣于時榮等俱
已邀

恩復職矣則浹源者同功一體何獨俾之
向隅耶既該道府查確并印結前來
相應轉請憲臺入

告以均沐

浩蕩期爲桑榆之收者也等因呈詳到臣
據此該臣看得縣令出宰百里有守

土之義不幸而值變亂不能嬰城固
守擯斥猶有剩辜然果有情勢可原
或失事之後旋著恢剿之績如原任
山西芮城縣知縣李浹原任河津縣
知縣李源者其失守雖與衆同而著
功實與衆異此又不可不原其情而
竟泯其功也三晉值姜逆猖亂全省
揭竿以致城池失陷黎庶蒙殃州縣
各官聞風投竄彼時欲求如二官之

秉節忘身率衆對壘及至智窮力竭
又奔赴隔省請兵旋能恢復以安民
社者實鮮有其人也緣二官籍隸東
魯故山東撫臣耿燁爲

國憐才咨臣查叙臣備行司道查議前
來咸謂二官向日之失事實係賊勢
燎原之際外無應援之官兵內值叛
宦逆衿之接應內外交訐獨力難支
懷印奔秦請兵恢剿身充鄉導催餉
芻糧失事雖同功與衆異前任秦督
臣孟喬芳之

題疏歷歷可考且二官係丙戌開科進
士分宰前邑服官清慎兩邑士民迄
今猶憐而念之取有公保甘結申送
前來允當照于時榮等之例邀

恩復職以鼓後效使守土之羣工咸知盡
瘁于封疆不至望寇氛而逃竄矣臣
復案查順治十二年十一月內准吏

部咨爲遵

旨敬陳一得等事內開城池失守地方官俱應照例議處或天末危險之地有一二情勢可原者該督撫代題酌議具奏奉有依議之

旨欽遵在案今李浹李源正與情勢可原之例相合既據該司查議前來除印結咨送吏部外臣謹特疏具

題伏乞

皇上勅部議覆施行

順治十三年九月十六日具

題奉

旨吏部察議具奏

題爲請

旨審查虛冒以足

國用事據山西按察司呈該本司按察使楊思聖覆詳看得陸時雨虛冒兵餉逸逝在先提問在後汾州府知府王汝賢始不行羈候後不能緝獲已經議處降級後據該府以

欽案限迫而時雨不能卽獲權請以時雨之子陸進代招到司查無代招之例

隨通詳各院蒙各院切念

欽案難結批允一面代招一面緝拿俟時
雨一到便可速結不得已爲權宜之
計耳本司遵卽轉發先將陸進大概
審問去後查原叅時雨虛冒內開有
假稱撒撥守汛虛冒兵丁叁拾名家
人冒糧伍名點名不到兵丁壹拾肆
名共冒有肆拾玖名今據該府查審
將家人冒糧伍名各照年月多寡坐
追其防兵叁拾壹名原在汛地衆口
可憑事故兵丁拾叁名臥病在逃皆
有實跡前來隨經本司轉詳各院蒙
各院駁詳間思家人食糧卽係隨主
親丁况據府查經守道驗收似不應
坐乾沒然原叅旣屬虛冒又似應照
追耳至事故兵丁開除俱有年月分
守兵丁各兵解來現在似無虛冒而
原叅又甚昭然總之本弁在逃未經

親質無憑查考定爲確案正在覆詳
駁勘間又蒙憲行以子代招終非舊
例未爲妥便遵卽停招請憲檄移甘
肅提本弁到日確擬差奉司快役及
府役星夜齋文接催不啻數輩道里
遙遠本弁或在或逃杳無音信而

欽案又已久懸正在惶惧不寧適蒙憲檄
下催本司再四思維事在兩難以子
代招原非舊例或姑通變權宜以結

欽案則當據前詳確擬呈招或以

欽案慎重不容輕易則當案提時兩獲日
另結合無詳請憲臺具

題候

旨定奪庶便遵行等因呈詳到臣據此該
臣看得審查虛冒所以剔營弊而肅
軍紀委要務也但分委點查固當出
其不意不可使之豫知致生倩抵之
弊然有分防事故亦當確查明白豈

可一味苛求惟以見在應點者爲實在而將分防事故確確有據者盡開虛冒以失將士之心也順治拾貳年伍月內奉

旨密查營鎮虛冒一案該前撫臣陳應泰分委各道單騎密查具疏

題叅如沁州千總張篤慶隰州守備張四維吉州千總李興龍各虛冒不等俱經臣間擬明白部覆奉

旨結案矣惟有石樓營守備陸時雨者於未經提問之先報陞甘肅大松堡都司一聞提問遂爾棄其妻子懷劄潛逃屢緝未獲業將汾州府知府王汝賢

題叅降調矣隨移文甘肅行提准甘肅撫臣周文燁回稱時雨並未到任且大松堡已另推有吳豪其人矣迄今一載無踪則本犯之生死誠不可得

而知也今將其妻子久行羈禁無益於事故司府各官議欲權宜以其子陸進代招以結

欽案然而代招並無此例臣不敢草草具題所當

請明於

睿裁者也臣於此案而更可異焉石樓經制官兵叁百叁員名原參除實在外有假稱撒撥守信兵丁叁拾名家人

冒糧伍名點名不到壹拾肆名通共肆拾玖名今疊經司府查審內有事故兵丁劉文舉等拾名陸續聞報扣除冊案可憑又有兵丁高友等叁拾肆名向日俱設防要隘於壹百柒捌拾里之外不能飛身應點隣佑地方確確有據高友等當提審之時奔赴臣衙門號稟稱冤云此二項俱非虛冒明矣惟其家人王進祿等食糧伍

名向日業經詳明守南道驗明收支者亦非私自乾沒然則陸時雨既未犯不赦之條不知何故而忍棄妻子遠逝無踪也此臣之所不可解也今欽案日久未結而陸時雨之生死難知虛冒之情罪已明而犯屬之久禁堪憫况

恩詔新頒時雨似合應赦之例或如司府所議權以其子陸進代招

題結或仍照提嚴緝結案或念時雨虛冒僅止家人伍名隨主勅勞與乾沒不同援照

新赦免其追擬總出

皇上浩蕩洪仁非臣所敢擅議也臣謹會

同督臣張 按臣高 合詞具

題伏乞

勅部議覆施行

順治十三年九月二十一日具

題奉

旨該部議奏

題爲謹陳一得之愚懇酌三宜以杜三
漸事據山西提刑按察使楊思聖呈
前事內稱本司謬掌刑名顧職思義
謹求稍可建白之策薄全總憲之名
特陳三宜并申三漸統冀鑒裁飭此
三宜杜此三漸庶幾使各知所守而
職得以益加策勵黽勉守位不致唯
諾隨衆無所建明矣其一宜曰反坐
之律宜嚴也刁民欸訐多牽証佐不

過欲飛此一紙彙報衆怨費其家于
往來道路之間斃其命于監禁歲月
之久各院雖屢申明禁而故轍依然
者則以反坐之律不嚴也夫誣人以
罪必巧有詞雖遇明斷已受其累卽
反坐之律必行而被告之受累已足
與原告之受罪相準况寬反坐之律
以爲原告之招者乎今唯嚴飭反坐
律在必行庶幾

朝廷頒誣告之刑書稍爲扶弱抑強之實
濟訟不必禁而自熄矣其二宜曰悖
旨之法宜嚴也天下值鼎革之時晉地經
亂逆之後仇結者多有指名當事者
易爲動聽舉十年之事痛如目前因
頃刻之嗔事援隔代獨不思

詔旨煌煌皦如白日曰有以赦前事告者
卽以其罪罪之今竟有以赦前事告
甚有以一赦二赦三赦前事告者使

民不以仇訐爲無端反以

天言爲不信聽其告而不加罪是與敢爲告而不知罪者同心然奉

赦而誅原告又與徇賄而縱人罪者同跡或被告素有富名原告巧爲粧點則執法者爲甚難今唯申悖

旨之罪庶幾生靈沾

皇恩之浩蕩矣其三宜曰不結之案宜豁也當

國家措餉維艱之日正人臣捐糜思助之時積贓豈容漏網追比自合推敲但追贓之家非蠹役卽豪強彼取之易者用必奢故所蓄必不厚怨之衆者獄必大則所費亦已多業有千金至納贓時不足五百納有十兩其傍用處已足千錢旣傾廬而破產又累友而及隣是以屢有

題請之旨開豁免之恩然而下之奉行

未能取信上之查駁未能無疑復費
催提仍成懸案或絞斬者本無滅家
之罪乃因贓而滅其一家或流徙者
本無殺身之辜乃因贓而斃于杖下
官吏徒費心于紙筆庭堦益多事于
桁楊累考成猶小傷

皇恩實大今唯于贓之必不能完者亟賜
題結則案無滯牘而獄無枉濫矣其一

漸曰府廳以成招爲職事有定斷獄

主初招總此人也一月之內生死殊
塗總此贓也十日之間多寡懸絕彼
原以二駁三駁爲例遂不以可增可
減爲嫌先其半以試端留其半爲後
地恐將來有探喜怒以定獄借喜怒
以鬻獄者此府廳失職之漸也其二
漸曰臬司以平反爲職招旣由下不
能事事親提解復由下不能人人應
手限期旣促批駁復頻職雖兢兢竭

慶克完此新舊

欽案矣恐將來有不以批駁爲恥遂亦不以詳自慎可否聽上出入聽下將臬司視爲郵遞文書之官此臬司失職之漸也其三漸曰凡事難啓其端猘犬踰牆嚙不擇人自有瀆

閹之舉及各案諸囚已皆引領觀望今其計雖不行而污穢承問之官復費數番審鞫拖累無辜證佐已足以快其心矣人至欲死何所不爲將必有焚其瀆

閹之舉而鑒其不行之由或別端巧捏或借塗夤援或牽貪污之官而伴清白之吏委曲求萬死一生乃商量爲一發百中雖

睿主當陽無微不燭在執法之官業已喪膽而銷魂矣此誣訐必行之漸也等因備詳到臣據此該臣看得臬司一

官古稱觀察管理通省刑名平反獄情昭雪冤枉且以振揚風紀糾察奸貪而芟鋤豪猾職綦重也如用得其人則民自無冤而案無留牘如用不得其人則律令廢弛而法紀不振所關又非淺也然而用得其人矣倘或有抑之撓之而不能竟其祥刑弼教之才則得人與不得人同耳山西按察司臣楊思聖原由翰苑詞臣出司

刑名重任識獄敏練已見明允多能執法惟嚴毫不徇情少縱臣自蒞任之始正值

計察之後一切未完新舊

欽件案積如山有應臣查駁

題銷者有應按臣主稿具題者半載以來所完不止三百餘件則其長才偉抱誠係出人表表者今以晉民習俗澆漓訟成風每違

無言奏議 卷四
恩詔許告

赦前之事故請嚴反坐之律復請嚴悖
旨之法二款誠皆抑強扶弱之實濟也至
于一應贓私除貪贓侵盜外其餘果
係家產盡絕力不能完槩與豁免不
許株連屢奉

詔旨今有久定爰書因贓懸案積年追比
至臧家殺身而終歸無益者故請速
爲

題結以布

皇仁此三宜之允應嚴飭者也若夫府廳
各官承問要案畏首畏尾未免任人
意旨倏增倏減不肯執法秉公以致
鉄案難成故該司有府廳失職之漸
之請也臬司之權不歸一則法難獨
持出入盡由于批駁可否每出于違
心以致平反無效故該司有臬司失
職之漸之請也誣訐之行良由被劾

奸貪罔知法紀自知獲罪已深卽便
恣情狂瀆如近日叩

關之舉每每見告無端誣讎希圖脫罪雖
蒙

皇上洞鑒然而執法之官未免因此畏懼
更恐將來有尤而效之愈出而愈奇
者故該司有誣訐必行之漸之請也
以上三宜三漸皆關刑名最重此係
該司因時條議申

國法而防奸狡之要着若不特請

天語嚴飭終屬無濟旣據該司具詳前來
臣謹據實具

題伏乞

皇上睿鑒

勅部逐款議覆上

請嚴行飭禁庶奸頑知儆法紀凜肅矣

順治十三年九月二十四日具

題奉

旨刑部議奏

題爲攢殺二命橫饕剿滅事據山西按察司呈問犯人一名李室招詳等因呈解到臣據此該臣隨移文按臣高爾位親詣公所會同逐款覆審明白看得李室係一方巨惡三晉窮奇向以青衿而加納鴻臚途恃宦勢以逞雄靜邑其倚藉族大丁多兄弟濟惡磊私債而折人恒產藐法紀而魚肉鄉隣無所不爲蓋已積有年矣前靜

樂章職知縣張次仲計其惡蹟三十
七款李存桂子又計該縣衙蠹楊檣
等三十九款兩計事件或係謀叛人
命重情或係侵冒貪贓大蠹咸似罄
竹難以盡書者業經歷次研審厥罪
俱明故按臣卽據以具
題誠以事關巨惡大惡欲早殛豺狼以
安良善也及法司奉

旨核擬以人命須定致命傷痕謀叛應勘
共謀確據覆疏請

旨駁行臣等逐款詳審誠屬其詳其慎之
至意該臣等備行藩臬兩司及冀寧
守巡兩道公同確訊復經臣等細心
駁勘又經臣會同按臣秉公親審款
款皆明前招擬李室以謀叛之律者
因其私藏軍器跡似不軌也今細審
匿砲是真叛無確據固不便懸坐叛
律以處之惟是打死人命一款向由

鞏我誠之混供未確今覆審當日因
牽室之犬食鞏氏之油犬被鞏家打
死室遂鎖拿鞏我朴鞏我益至家磚
棍交加立刻打死以償犬命見提二
屍檢明致命傷痕有據殺人者抵况
二命乎至查不容丈地一款備查李
室每年該糧一百八十四石七斗零
而冊內止造一百三十一石有零每
歲隱匿五十三石以十二年計之則

共隱

國賦六百四十餘石既已草菅人命而
復欺隱

皇糧卽此二款李室之罪已無所逃于一
斬矣則擬室以故殺之律允無地議
也若夫違禁取利侵霸藏器等款法
已從重無可加坐李坊李塚助惡不
阻鞏我誠頂名妄供一杖難寬至于
衙役張光正等詐贓咸有証據與說

合之宋德升冒領之呂油等俱已覆
審明確分別絞流徒杖均不枉也其
楊檣李楨已于犯官張次仲

欽案內寃擬無容再科其有罪未到郝弘
高洪謨康海趙其等仍行該管各官
嚴緝獲日贓罪另結以上除李室原
霸房地并隱漏糧石槩應照追外各
犯贓罪共銀米百壹兩伍錢照數追
完入官聽候解部既經該司問招呈

詳前來臣謹會同督臣張玄錫按臣

高爾位合詞具

題伏乞

勅下該部議覆上

請施行

順治十三年九月二十九日

題奉

旨三法司核擬具奏

題爲蝗災極苦百姓呼號日不聊生乞

鑒

天災爲民

請命事據山西布政司呈該本司彭左布政使查看得和順縣僻萬山之中連歲叠遭凶荒小民已不堪命今又被飛蝗傷食田禾民心驚訛該縣有牧民之責不得不爲申請也該道委官履畝踏勘造報被災地畝分數前來

本司嚴加查核雖以該縣錢糧總計
合筭被災一分以上不在蠲免之內
然以被災地畝而論則有八九十分
之不等從前大部蠲免均就被災地
畝而筭不在闔縣總數而科似應仍
予

題豁以甦災傷之予黎可也既准該道
覆查造冊具結前來相應呈詳合無
請乞憲裁批示以便行令遵守等因
呈詳到臣據此該臣看得地方遇有
災傷不得不行題

報爲民

請命以甦災困然而未經查勘分數明白
及察其被災之時可否補種則又不
便于草草具

題以致小民觀望有虧

國賦也晉省連年災侵今歲幸獲有收
四五月間惟有遼沁等五州縣申報

撫晉奏議 卷四
電災臣因彼時方係仲夏尚可補種
遂嚴督各州縣措給籽粒勒令補種
俱得有收業經臣爲彙報米電災傷
事疏內

題明在案彼時有和順一縣于六月初
九日飛蝗倏降蓋天蔽地將夏麥秋
禾蚕食有六七分至十分不等者該
縣僻處山嶠地土砂磧連年災稔民
困已極今歲復罹此災深可憫惻臣

備行藩司確查今據該司詳覆行准
巡寧道委遼州知州尚可學親赴該
縣逐村履勘分別田地分數造冊前
來臣細加查核被災已在六月不但
災黎應納之

國賦難辦尚不知何以資生旣經該司
查明蠲免應照被災地畝而論已有
八九十分之不等應與題豁前來除
冊結送部查核外臣謹會同督臣張

玄錫按臣高爾位合詞具

題伏乞

皇上俯念疊年困苦災黎

勅部議豁施行

順治十三年十月初三日具

題奉

旨戶部核議具奏

題爲邊腹缺餉日久窮軍呼籲堪憐急
請具

題改撥以救倒懸以安反側事據山西

布政司呈切照晉省邊腹九道兵餉

米折等銀每年額該五十七萬六千

六百有奇原有派定倉口按月支領

毫不容於缺乏者案查前蒙巡撫陳

都御史案驗准戶部咨爲酌撥十三

年兵餉事於本省兵餉內改撥秦川

餉銀二十七萬四千二百九十八兩
零以節年未完正賦并荒亡及屯糧
抵補本司隨卽分派各府州催解去
後而各道府紛紛額請改撥前署司
業已呈詳本院具

題未蒙部覆允從今又於本年八月內
蒙本院案驗准戶部咨爲找撥十三
年兵餉事內開山西省未撥銀九萬
九千四百一十一兩五錢仍於節年

未完正賦內撥銀八萬五千兩又於
裁減走遞夫馬書辦納吏銀內動支
銀一萬四千四百一十一兩五錢本
司亦經備行分派及屢蒙本院嚴檄
催解間節據所屬各州縣及汾平潞
澤以及鴈寧岢嵐等道詳請改撥積
案盈几而會省各標營軍士擁門告
討殆無虛日今查邊腹各道壓欠兵
餉已至四月而各屬徵解竟無影響

總緣所撥節年未完銀兩俱係晉省
荒亡之數而節年拖欠有名無實今
以見在之餉改撥他鎮而以虛懸之
數兌之本省其何異於以羊易牛也
哉目今各營紛紛告領三軍皇皇呼
籲本司總有錢穀之責豈有點金之
術若坐視軍苦而不急爲

請命萬有庚癸之呼脫巾之變則是本司
之悞軍而亦自悞也况三晉爲

神京右臂兵餉關封疆安危秦餉固屬
吃緊晉餉猶不可玩視勢急燃眉亟
宜陳請合無請乞本院軫念兵食爲
重早賜具

題將秦川兵餉改撥新賦而晉省仍照
經制支給庶重地無反側之虞而秦
晉軍需各得實濟不致望梅畫餅矣
等因蒙巡撫白都御史批仰候具
題行繳蒙此遵候間又據潞安府申爲

酌撥十三年兵餉事奉本司劄付單
開本地兵餉銀一萬一千五百一十
七兩五錢係經制額載供應道標潞
澤二營并潞州衛官兵廩餉之需今
於本年六月初七日奉文撥解秦餉
已經屢詳請項抵補未蒙允示今於
本月二十一日早辰潞澤營兵丁蜂
擁齊集門首將馬騾欲交付本府喂
養呼噪喧嚷索討壓欠餉銀怒目猙

獰喊聲震動實有鼓譟之狀本府束手
無策唯有百計撫慰并傳軍糧兩
廳勸諭始得解散夫有兵卽有餉數
月壓欠兵之呼譟誰曰不宜但無米
之炊本府卽粉身碎骨亦無濟也若
不再爲籲請誠恐一旦有不測之變
本府之性命不足惜其如封疆何合
無請乞本司早賜定奪轉詳撥補營
兵幸甚地方幸甚等緣由申詳到司

據此該本司左布政使彭有義覆看得晉餉之匱詘前詳已備述顛末無煩爲之再贅正候本院具

題間而潞安府又有此急切之告但查省營之呼籲本司無奈借動錢價以援一時之急而三關之課變該道又議動朋合以爲一月之需然總於無可如何之中而爲此不得已之計卽干邪移之咎所弗恤也今該府如此

控陳情切剝膚若有時刻不容緩待者本司更無術以調濟惟有靜候本院速賜

題請一着耳旣經該府詳請前來相應覆詳合候本院一併入疏施行等因呈詳到臣據此該臣看得

朝廷措餉養兵則兵惟餉是賴是餉者乃三軍養命之膏按月而給方得士飽馬騰不便愆期以致枵腹飢疲也晉

省守巡兵備九道所轄各營官兵應食廩餉米折乾銀載在經制定有倉口歷年照額支領其來已久不可紊亂年來因災稔屢見徵解維艱州縣既有拖欠兵食每致愆期多方督催接濟殊爲竭力支持乃十三年正月內倭奉部文于山西十三年額編兵餉內撥銀二十七萬四千二百九十八兩零解交秦省充餉將晉省各營

應食餉銀撥新墾荒地銀五萬兩十一年未完餉銀六萬一千八百一十四兩十一年錢息銀四千五百五十兩十二年錢息銀一萬五千兩是剋晉省兵士經制額領月餉以濟秦省之急需而將節年未完荒亡難徵絕無影響之銀抵作晉兵之月餉也在秦兵得食晉兵經制額餉自可無飢在晉兵失額支按月之餉而望濟于

撫晉奏議 卷四
無徵無解之銀事同畫餅該臣於本年三月內

題爲酌撥十三年兵餉一疏業已詳晰奏明請將部撥荒糧并錢息銀兩改解秦省尚該不敷秦宣餉銀二十四萬四千七百三十九兩零于晉省十三年解部正賦撥剩銀內照數起解深屬妥便未蒙部覆允從嗣於本年八月內復准部咨山西未撥兵餉又于

本省節年未完正賦銀內撥八萬五千兩臣俱嚴行催解不遺餘力然據各州縣紛紛申請咸謂節年未完正賦盡係荒亡地內錢糧卽百計敲扑無力辦納官吏疊受叅罰職此之故所以致本省各營兵餉壓欠多月兵丁擁呼告討各道府呈請絡繹不已也頃據署鴈平道寧武道僉事潘超先呈稱三關餉銀已缺四月各營兵

士每日號啼跪討本道目擊各兵噉
噉有莫測之勢等情又據布政司呈
據潞安府申稱潞澤營兵丁蜂集府
門交馬索餉有鼓譟之狀情勢岌岌
俱若不能少待者臣閱之不勝悚慄
無奈行令鴈平道將扣貯朋合銀兩
暫那給三邊各營一月之餉并行藩
司亟令潞安府不拘何項錢糧那給
一月以救兩處目前之急其餘各營

尚不與焉但從前歷欠之餉以後應
給之銀俱屬萬分緊急且時已入冬
飢寒交困倘必欲以荒亡難救無解
節年未完疊經叅罰之銀以抵晉兵
月餉竊恐或生脫巾之虞封疆闢繫
非淺也臣仰屋長嘆再四思維惟有
仍請將額編兵餉照舊留爲晉省各
營官兵支給以無紊經制而濟飢軍
將前撥秦省不敷餉銀俯准于十三

年正賦撥剩銀內撥解庶秦晉感荷
皇恩而晉兵不致獨飢獨寒生意外之虞
矣至于新墾荒地糧銀併節年未完
正賦銀兩容臣嚴行查催陸續解部
可也既經該司呈詳前來臣謹會同
督臣張玄錫合詞激切具

題伏乞


皇上軫念三晉兵困民疲

勅部速議改撥庶兵民兩有攸賴也

順治十三年十月初三日具

題奉

旨戶部議奏



撫晉奏議

書

題補鴈平道中軍疏

題爲晉省荒亡有據錢糧追徵無由再

懇

睿慈勅部酌議急施調劑之術以援殘黎
之厄事據山西右布政司呈准本司
左堂咨本年五月二十二日蒙巡撫
白都御史案驗准戶部咨山西清吏
司案呈奉本部送戶科抄出該本司
覆山西布政司左布政使臣彭有義
奏前事內開竊惟正賦錢糧關軍

撫晉奏議

目錄

卷五

請免晉省荒亡疏

請換驛傳道 勅書關防疏

題報解過兵餉銀兩疏

請飭緝獲深州大盜疏

議裁通省里馬疏

覆查秦餉未完各院職名疏

國急需爲居官首務凡有督催之責經
徵之任者誰不急欲全完以副考成
之令詎敢怠忽玩泄以甘尸曠之咎
哉奈晉省自姜逆蹂躪之後繼以災
侵頻仍百姓逃亡最衆田地荒蕪甚
多從前司民牧者相率坐視不爲

上聞致令

國賦缺額民困莫恤迨前撫臣陳應泰
今按臣高爾位蒞任之始及臣到任

之初州縣之申訴積案如山父老之
呼籲登堂如蟻方在批行察核間適
奉有清理丁地之

明旨是以委令右布政董應徵遍歷所屬
履畝丈量而荒亡隱占一一清釐無
遺每年約計荒亡一十六萬有奇當
經造有確數撫按交章具

題部臣以隱占少而荒亡多慮恐虧額
不准除豁覆令仍遵前

官是司農之爲

國用計者誠深微臣又何敢復贅一詞
第思種地納糧養兒當差此從古不
易之理若地荒而仍責以納糧人亡
而復責以當差蓋亦憂憂所難之事
設使有主之荒拖欠在民臣雖不才
何難嚴行追比民卽無知詎不畏法
賠輸但多年無主之荒承應無人旣
不敢背

嚴綸而令見在者包賠又何能起九泉而
向鬼籍追呼乎卽使奇才異能者處
此當知其束手無策矣目今部差滿
洲章京完兒哈坐晉守催有司畏恐
叅罰那新補舊總使舊欠完而新賦
仍欠剜心頭之肉醫眼前之瘡亦何
益矣以臣愚見莫若暫蠲此有名無
實之荒寬其從前逋欠責令招人開
墾如有情願承種者官給印照爲業

限以年分起科庶使流離子遺無所
畏忌將見源源樂歸數年之內有不
復其原額者臣不信也否則日復一
日年復一年空負紙上之桑宛無涓
滴之濟竊恐荒者愈荒而熟者亦變
爲荒逃者愈逃而存者亦因之而逃
何日是其全完之期乎今臣入覲
天顏許陳地方利病民生疾苦蓋地方之
病莫病於此民生之苦亦莫苦於此
故敢冒昧妄

瀆懇乞

睿裁勅部酌議早霈雨露之仁以解倒懸
之厄如謂微臣無能催徵請卽行罷
斥另簡賢能任事限以一年半載如
果不用洒派不需包賠能使節年逋
欠十分全完臣願甘以欺誑之罪事
關

國計民瘼詞覺過激字稍逾額統祈

皇上—併鑒宥施行等因順治十三年四月十九日具

奏奉

旨戶部議奏欽此欽遵抄出到部送司奉此相應議覆案呈到部該臣等看得晉省荒地臣部於順治十二年十二月內覆撫臣陳應泰題爲清理人丁地土一疏因該省清出地丁僅一萬六千五百餘兩而

請豁者一十七萬有奇是不能豁

國而反虧國賦也仍應責令廉幹道官將隱匿丁地逐一清理毋致借端冒免奉有依議之

旨欽遵在案今該布政司彭有義仍以該省荒地

請蠲前來仍

勅該撫遵照前

旨將地丁逐一清理俟報題之日以憑議

覆可也等因奉

旨依議行欽此欽遵抄出到部送司奉此相應移咨案呈到部擬合就行爲此合咨前去煩爲查照本部覆奉

旨內事理遵奉施行等因備咨到院准此爲照清理地丁及查勘荒亡事關

國計民瘼今見在各道俱有本等職業不便議委遍歷致稽時日相應卽責各該守巡兵備各道就近履勘庶無遺漏行據布政司議明責令右司綜核深屬妥便爲此案仰本司官吏查照咨案部覆

旨內事理卽便飛行各道將所屬州縣地畝速速躬親遍歷將前院題

報隱匿地丁再行確查果否止於前報之數另造一冊并取各州縣官印信彙送右司綜理查核另文詳報其前院題

報過荒亡之數一併確查有無冒濫以熟
報荒以存報亡情弊另造一冊并取
各州縣官印結彙送右司綜核明白
詳報以便本院覆核明白會議具
題仍令右司赴適中地方督催各道
嚴親查務期矢公矢慎不得扶隱朦
混致干

功令未便蒙此合咨前去煩爲查照撫院
檄行速移行各道將所屬各州縣地
畝親詣逐段查勘貴司仍赴適中督
催俟報到綜核明白各另造冊呈送
各院會

題希勿遲違扶隱等因准此隨即備移
守巡兵備九道各將所轄荒亡丁地
逐一清理確查及屢催造冊以憑綜
覈彙冊轉報去後續准分守冀寧道
右叅政王舜年咨前事內開該本道
看得道屬陽曲等九州縣自姜逆煽

亂之後人民傷亡逃竄甚多故致地
土拋荒錢糧逋欠本道凜遵憲檄逐
縣履畝踏勘併查核人丁見其荒蕪
地畝荆棘茂盛河塌者砂石層層察
其人丁猶鬼域之形尚然包賠荒土
錢糧代納亡丁徭銀本道逐一查明
造冊相應移送並無以熟作荒以存
報亡情弊其清出無糧地畝人丁事
屬繁冗另行造送等因移送司准

此又准分巡冀寧道僉事馮嘉會牒
呈同前事該本道看得地賦丁糧廼
軍

國急需而州縣隱匿不報致虧賦稅荒
亡不除遺累不淺今奉

嚴旨責查逐一清理毋致徇情遺漏借端
冒免本道單騎躬親遍歷所屬太遼
等七州縣一一履畝確查如遼和榆
社等州縣設在窮谷多屬坡坼山田

年來疊罹兵荒人民死徙更加霖雨連綿將山田漂沒悉爲溝渠蒿草滿目骨立盈衢本道觸目傷心又如文水等縣逼近汾河河水泛漲將膏腴之地已成池塘此本道所屬之殘苦也今備造青冊見在其清出地畝人丁另報外擬合移送爲此合牒前去煩請彙造轉報施行等因造冊牒送到司准此又准寧武帶管鴈平道會

事潘超先牒稱爲照東路所屬州縣設在邊陲古稱沙漠地瘠民窮卽承平時正賦尚且追呼不前況今頻年以來疊遭兵亂屢罹旱溢幾經殺掠屢被災傷真勢若沉疴最難調劑故致人亡地蕪蕭條如是之甚若不因病進藥開除荒亡而見在之斃斃子遺亦必至接踵俱逃矣本道屢奉憲檄查理人丁地畝幾經履畝查勘竝無

以熟報荒欺隱情弊今取有各官甘
結前來本道亦具印結見在并造完
青冊擬合會送爲此合牒前去煩請
查照彙冊轉報施行等因造冊移送
到司准此又准寧武道僉事潘超先
牒稱本道親詣忻定靜三州縣并寧
武寧化八角三所隨將丁地逐一確
查看得忻定靜三州縣素爲疲邑前
經姜逆叛亂本道所屬殺戮獨重于

他處以致地土拋荒

國賦空懸年來雖督責有司設法招墾
但荒蕪甚多不能遽然成熟又如寧
武等所皆砂磧之地遇風卽積砂數
尺不惟五穀不產蒿草亦不能生今
奉

旨清理本道履畝查出荒地亡丁備造青
冊并取具印結擬合彙造移送爲此
合用牒呈前去請乞貴司覆核轉報

施行等因造冊牒送到司准此又准
岢嵐道副使馬燁會牒呈本道看得
岢嵐等州縣鎮西偏老衛所峴巖疊
障土瘠地寒兼之頻年兵燹災侵人
民死亡逃竄十去其六七地土荒蕪
日甚一日曾蒙前院具

題今復奉

旨清查本道親詣各屬踏勘遍地蒿萊現
在苞荒賠累民命難堪安敢扶同隱匿
致虧正額也先將各屬荒地彙冊移
覆伏望貴司綜核轉詳極此殘黎地
方攸賴矣合用牒呈前去煩請查照
彙報施行等因造冊牒送到司准此
又准分守河東道左叅議薛陳偉咨
稱看得計畝輸賦按丁納徭此古今
定例也惜乎晉地不辰始罹寇殃繼
遭兵燹兼之飢饉頻仍旱魃肆害人
丁之逃亡者既多是以地畝之荒蕪

者不少夫人之逃亡既多則招徠匪
易地之荒蕪既廣則開墾誠艱有司
畏考成之

嚴令非不將見在地丁極力搜括盡力敲
扑然地雖荒而糧額不可缺丁雖亡
而徭賦不可減以致乳乳子遺種熟
地者包賠荒地之糧納見丁者代賠
亡丁之差日復一日年復一年窮民
力竭勢實難支不至地盡荒丁盡逃
不止也今幸奉

旨清理地丁則隱冒與荒亡自當並為清
理此正三晉殘黎可得更生之日也
本道躬詣蒲解等州臨安等縣并蒲
州所履畝查勘清出溢地新丁荒地
亡丁皆一一查明各造清冊並無欺
隱情弊伏乞台裁轉請各院具

題應徵納者照丁地徵納應蠲免者照
荒亡蠲免不惟晉民受再造之仁而

無言奏議
卷五
十三

荒地亡丁將來庶有開闢足額之日
矣并具府州縣各不致扶同印結擬
合咨復爲此合咨前去煩爲覆覈轉
報施行等因造冊咨送到司准此又
准分巡河東道副使劉驥牒稱該本
道看得平陽自賊寇蹂躪之後災祲
頻仍人亡地蕪在在堪憐今蒙確查
本道將巡屬等處履畝確勘逐一踏
丈除熟地外其所荒地畝亡丁俱係
實荒實亡本道目覩心傷竝無假捏
妄報隱匿冒濫等弊今具不致扶同
印結合無請乞貴司覆覈轉報倘蒙
早賜

題豁則倒懸殘黎得邀

朝廷浩蕩之仁而

國課亦不至永受虛懸莫補矣爲此除
將清理過丁地竝荒亡丁地各另造
確冊外合行牒移前去煩爲裁奪轉

報施行等因造冊牒送到司准此又
准分守冀南道左叅政袁一相咨稱
該本道查看得人丁地土奉

旨清查惟其蘇閭閻倒懸之苦事關

國賦民生本道早夜弗遑隨將所屬汾
陽等八州縣以及沁屬并汾州衛人
丁地土親行履勘竭盡心血不遺餘
力而所荒之地或蕪穢盈陌或砂磧
成坵有王者鵠形鷄衣環馬首以號

泣無王者荒草淒風迎人面而傷心
荒殘困敝實爲堪憐竝無以熟作荒
之弊此本道親查履核毫無虛謬所
有造完清冊竝本道印結擬合移送
爲此合咨前去煩請清核轉報施行
等因准此又准分巡冀南道副使董
顯忠牒呈內開該本道看得近日有
司驚心

功令之森嚴而催科之術已窮百姓欣逢

包賠之

嚴禁而荒亡之告愈懇究竟荒亡未豁而考成愈嚴似將責有司作巧婦之炊而令百姓增剗肉之慘也除無荒亡之邑不敢多贅外如潞之屯襄黎潞四邑澤之陽城一邑不能無請焉夫潞澤處萬山之中地磧溝深不過就地之高下稍取平正者施畚鍤之力耳故一遇稍旱便成稿苗卽雨暘時若而全熟大有之年亦止可供賦糧饘粥而已無奈賊亂之後繼以凶年全屬爲墟數邑更甚滿目枯根野無青草亡者已見骨填溝壑逃者更見挈子携妻有執而問之者曰父母之鄉田園廬墓何忍經棄彼荅曰與其半菽不飽而作溝中之瘠曷若就食異地而爲緩死之人執者又問曰爾等輕去其鄉而乳乳孤子又何地可

覓生涯彼蒼曰無食已不免於餓莩
輸納更毒於蛇虺有司之繪圖非不
丹青欲淚而追呼之督責何堪檄雨
差雲爾不見夫亡者豈盡兵火之魂
抑多敲扑之魄此目逼其生而逃自
不顧也然成書在籍催檄綦嚴官亦
難起白骨而問之捕逋逃而求之似
必於現在之孑黎徵之限之比之責
之且以非刑及之民亦無可如何而
典衣質物賣及甕裡之米珠而忍饑
以輸之官府拆家變產削盡針頭之
餘鐵而罄身以佐軍需自以爲寧貧
且餓以緩須臾死耳而不意前項未
完後項已催自賦已竭他賦又臨傷
哉二三之遺孑無不以逃者爲得計
而仰

天疾呼奔顙憲臺之前也及今不爲速
請蠲其荒亡以甦數年萬不可完之積欠

以救將來萬不可徵之錢糧將見亡者相繼而逃者踵足而去矣究何益於

國課哉有司之一身何惜萬民之生命倒懸伏惟憲臺早賜

題蠲則或可令逃者日歸荒者日墾而潞澤漸有起色矣今荒亡尚仰

蠲之無從又何有以熟作荒以存作亡之弊哉除見在實荒俱在冊內而各

屬印結現具本道嚴查並無前弊今將造完文冊同印結合牒前去請爲查照會議施行等因造冊牒送到司在此除將各道清出額外無糧地畝并新收土著幼丁及久近寓流民數目另冊呈詳外該本司右布政使潘朝選看得三晉地方山多澗廣土瘠民貧始遭闖寇蹂躪殺擄已甚繼值姜逆鼓叛全晉陷沒百姓之死於鋒

鎬死於刼掠者不知凡幾兼以連年
饑饉水旱交加水電霜災時時見告
百姓之斃於溝壑轉於四方者又不
知凡幾人亡則地荒民逃則逋賦理
所固然勢所必至前撫院據州縣之
申訴小民之呼籲委令先任董右布
政履境清查已具荒亡確疏乃大部
惟恐中有隱情覆令仍遵前

旨確查蓋亦慎重之意而彭左轄以

輯瑞之役乘

皇上之下詢疾苦復爲繪圖陳請荷蒙

俞旨責令廉幹道臣復查山右殘黎靡不

歡呼雷動慶更生之有日矣今本司

奉委綜核節據各道履畝踏勘按籍

稽考共計各道踏勘出民王屯荒蕪

并河塌砂壓共地三萬八千五百一

十八頃八十八畝六厘四毫五絲五

微又確查出逃亡人共四萬七千二

百五十八丁半委屬真荒真亡竝無
織毫假飾况以熟包荒以存代亡屢
奉

嚴綸禁諭自當亟爲

題豁以蘇子遺包賠若從前之荒亡既
豁則流離者易於復業見在者亦樂
爲開墾將見荆棘之野復變爲沃壤
之土矣既經各道清查造冊具結前
來本司綜覈明白理應彙冊呈詳合

候本院裁酌具

題施行等因呈詳造冊到臣據此除隱
匿丁地一案見遵

前旨逐一清理容臣另疏奏

報以聽

睿鑒外該臣看得地賦丁糧乃軍

國急需凡屬臣工孰敢怠玩但賦由地
輸而糧由丁納如地土荒蕪則賦稅
自缺人丁逃亡則糧銀自減然地土

之荒蕪正由人丁逃亡無人耕種故也倘地土已荒而責令熟地照額攤賠人丁已逃而責令見丁代爲包納不但窮黎之皮骨不足以代荒亡者之敲扑將來必致見丁亦逃熟地亦荒

國課愈致匱絀矣此不易之理也故屢奉

嚴禁不許以熟包荒以存代亡仰見

皇上已洞悉民隱深知包荒代亡之厲政有損于

國計民生也臣查晉省州縣多處山谷之中民鮮素封地多砂磧南逼諸河有浸塌之虞北隣沙漠有風霾之患素稱疲敝之省年來兵火頻仍又兼災侵屢見小民疊遭荼毒殺戮他徙及饑困死亡者十去其六七僅存三四分之殘黎人丁既少地土自荒地

土既荒均徭自缺故前撫臣陳應泰
仰遵清理之

恩綸檄行確查清出荒地亡丁卽會疏具
題

請豁非不知有虧

國賦實出於情勢之不得已也及奉

旨勅部議覆而部臣以不能裕

國議令照舊徵收殘黎聞之哀聲遍野

臣蒞任之初據各州縣之申訴情甚

迫切案積如山繼而各處窮黎扶老

携幼泣懇盈庭咸稱有一畝熟地責

令包賠三四畝之荒賦有一人見存

責令代納三四丁之亡糧奄奄殘喘

自顧不贍焉能代賠大悖不許包荒

代亡之

旨若不亟請除豁將來壯者必至俱竄他

鄉老者必至盡填溝壑哀聲痛楚令

人酸鼻臣視之皆鳩形鵠面鵠衣百

結誠有鄭圖難繪者臣俱宣布

皇上愛民至意婉言慰諭令其歸業一面
密行查訪仍嚴飭各州縣不得借端
隱朦妄冀蠲豁勒令將節年逋欠錢
糧仍行督徵去後及今備知荒亡之
真包賠之苦催科之難敲扑之慘臣
始食不下咽矣正擬懇切入告爲此
三晉劇苦之災黎

請命適准部咨該左布政使彭有義

輯瑞之時卽侃侃具疏誠一字一血不勝

肫切部臣議覆仍

勅臣遵照前

旨將地丁逐一清理俟題

報之日以憑議覆奉有依議之

旨備行到臣仰見我

皇上軫念民瘼至意三晉士民無不歡呼
望更生之有日矣但彼時在省無可
端委之道臣且晉省地方遼濶未便

止令一道臣周流履勘致稽時日似
不若卽令本管各道躬親確察嚴行
稽查庶無遺漏臣隨與司道各官確
商明白檄行通省守巡兵備九道履
畝親查仍專責右布政使潘朝選董
理綜核去後今據開報各道履畝查
出民屯王田荒蕪共地三萬八千五
百一十八頃八十八畝零逃故人丁
四萬七千二百五十八丁半委屬眞
荒眞亡毫無假飾俱取有印結存案
總由晉中自姜逆摧殘之後被殺被
擄戶口業已蕭條又兼連年災侵饑
斃逃竄過半所遺荒地亡丁糧銀至
今虛懸旣不可就僅存皮骨之孑遺
敲扑包賠致違

嚴禁而

國賦虧缺兵餉迭欠總在此荒亡無可
徵輸之內地方官無點金之術惟賴

首以受叅罰士民懼包賠之累惟襁負而思他逃此非

盛世之所宜有也爲今之計惟有亟

請除豁庶熟者不致復荒逃者望風歸業將來可以漸次招墾以期地方改觀生齒復聚也既經司道確查明白前來臣復嚴加覆核無異除荒地并逃故人丁應豁糧銀均徑數目文冊咨送戶部查核外臣謹激切具

題伏乞

皇上軫念三晉疊罹災困之遺黎將實荒

實亡地丁糧銀

勅部作速議覆蠲豁施行

順治十三年十月十二日具

題奉

旨戶部議奏

題爲敬陳理財管見仰祈

採擇事據山西布政司呈該本司左布政使彭有義看得糧屯道缺旣經奉

旨裁併所遺屯糧等項事務自應歸併驛傳道接管但衙門已裁則關防衙役或亦與之俱裁原行未蒙剖明該道無所適從相應呈請合無請乞本院詳示准令驛道將糧道所掌應行屯糧事務等項查明接管其印信衙役

掛前奏請
卷五
三五
作何歸着請祈憲裁詳示遵行本司
未敢擅專等緣由具呈巡撫白都御
史照詳蒙批糧道奉

旨已裁事歸郵道兼理其關防衙役自應
併裁前本院所

題及部覆之疏俱未議及且以郵道而
兼糧道事則郵道原奉

勅書關防似應換給且糧務必須另用一
二經承胥吏恐衙役不便一槩盡汰

也仰司再會同驛傳道確議詳報以

憑具

題請

旨遵行繳蒙此又蒙巡按高御史批據本
司經歷司呈前事蒙批屯務奉

旨歸併驛傳道矣其衙役聽自便可也印

信候會

題仍候督撫詳行蒙此又蒙總督張尚
書批該本司呈同前事蒙批屯糧事

務既歸併驛傳道印信自應繳部衙役亦應併裁仰候撫院詳示行繳蒙此擬合移會爲此合照前去煩爲查照批詳內事理即便速議妥確酌定經承數目姓名火速移司立等轉詳具

題施行准此該分巡帶管驛傳道僉事馮嘉會查看得糧道歸併驛傳既已奉

旨但

勅書關防應添糧屯字樣以便催徵再查屯糧頭緒繁多須用原管舊役數名方不悞事合無請乞詳院酌奪具題換給

勅書關防定留衙役若干以便接管等因牒呈到司該本司左布政使彭有義看得糧屯歸併驛傳既已奉有

俞旨其

勅書關防自應

題明更換以專責成而皂快等役亦應與之併裁以省糜費但查屯務殷煩非得老練舊役不克知其頭緒而驛道吏書有數難以責之併理今仍議留書役四名載入驛道經費之內以供屯務之役庶或經久可行也謬議如此未識可否相應呈請合候本院詳示會

題等因呈詳到臣該臣看得糧屯一道前經臣會疏具

題裁併驛傳道兼理部覆奉有

俞旨欽遵在案矣印信自應繳部衙役自應併裁經費開載一切俸薪工食等銀自應照數扣存解部此無庸他議者也但驛道既有兼攝屯糧之任則關防理應添鑄屯糧字樣

勅書亦應增入屯糧職掌庶該道得以凜

遵

簡書敬循職業郵政糧務並行而無悞矣
且以通省屯糧督核不易頭緒紛紜
清釐頗艱郵道衙門之書吏有限恐
不能兼爲經承致有舛錯故官可兼
理而經承書吏似不便于盡裁今司
議量留原管書役四名載入驛道經
費給與原派工食庶使經承各有專
責可爲經久之計也既經該司查議
呈詳前來臣謹會同督臣張玄錫按
臣高爾位合詞具

題伏乞

勅部議覆行臣等遵奉施行

順治十三年十月十二日具

題奉

旨該部議奏

題爲晉餉徵解愆期從前怠玩可駭謹
查積逋數目特疏題

報仰請

睿鑒事據山西布政司呈該本司左布政
使彭有義查看得節年新舊未完秦
川以及各鎮兵餉與夫撥剩解部銀
兩俱關

國計軍需凡有催徵之任者自宜及時
催解務期十分全完方爲克盡厥職

柰晉省節年逋欠錢糧率由荒亡遺累無論從前各司計日催督案如山積卽本司到任來業已守催劄催及委各府糧官分投親詣勒催又經詳委守巡各道就近提催蓋已法竭智窮心血爲枯而各屬之告荒告苦殆無虛日今經徵各官屢叅降革承行里老屢提枷責而卒莫能如額通完矧本院入境之初卽徹底清釐具疏

題叅勒限檄催何等森嚴近則日奉本院嚴檄如雷如雨豈州縣各官盡不畏考成小民盡不怕法紀乎乃官無點金之術民苦包賠之累官與民均亦無如之何矣本宜將從前各官造冊

題叅但查於順治十二年七月二十一日爲兵餉急催如雨等事將八年分欠解宣雲二鎮兵餉各官造冊呈報

前院

題叅訖又於十三年五月十一日爲嚴催速解錢糧等事將八九十年未完解部錢糧催徵各官造冊本院

題叅訖本月二十二日爲兵食匱極等事將十二年并節年欠解秦川兵餉銀兩各官造冊呈報本院

題叅訖又於十三年五月二十三日爲錢糧拖欠日多等事將十一十二兩年欠解秦川并各鎮兵餉各官造冊呈報本院

題叅訖又於十三年八月十九日爲秦川兵餉半年無支等事將十二十三兩年并節年拖欠秦川兵餉各官造冊呈報本院

題叅訖總之節年未完錢糧各官疊受考成屢被叅罰然追徵無門終無完期縱盡官而黜革之盡民而捶楚之

其如軍需何哉既經節次造冊參罰
茲則無庸再贅相應回詳合候本院
裁酌

題覆以結

欽案施行等因呈詳到臣據此該臣看得
額徵起運錢糧有應解兵工各部者
有奉部文撥兌各鎮兵餉者其撥剩
銀兩有卽應起解戶部者皆關軍

國急需奚容逋欠臣奉

命撫晉兢兢以錢糧爲首務故自蒞任之
始卽檢查案卷將各項錢糧逐一清
理查得八年起十二年止除撥兌兵
餉外尚欠起解戶部銀壹拾陸萬玖
千捌百貳拾壹兩玖錢零又欠兵工
二部銀肆千壹百捌拾貳兩伍錢零
又欠撥兌各鎮節年兵餉銀柒拾叁
萬壹千叁百肆拾捌兩零俱係久逋
積欠之銀臣閱之大爲駭異隨一面

具疏據實入

告一面切責司府州縣各官清查設法催徵嗣准部咨該部臣議覆以節年解部錢糧并協解各鎮兵餉逋欠甚多從前催徵各官怠玩殊甚

勅臣嚴查具奏等因臣遵照卽檄行司府嚴查及絡繹嚴催不啻古敝頽禿無奈各州縣每以荒亡申請無可獻迨爲言臣復加提比不遺餘力今查八

九十十二年欠部銀兩續完并續撥各鎮及蠲免者計壹拾叁萬伍千伍百伍拾壹兩柒錢零又完兵工二部節年拖欠銀叁千壹百肆兩柒錢零又完并抵筭禮兵工三部十三年分各項銀壹拾萬肆千叁百肆拾捌兩貳錢零又完十三年撥兌各鎮兵餉銀壹百柒萬捌千餘兩又完過節年積欠各鎮餉銀柒萬捌千肆拾壹兩

有奇此臣撫晉以來督催所完之數也俱已疊次具咨報部在案然雖如此輸解終未能照數通完故臣於本年五等月內具爲兵食匱極等事一疏又具爲嚴催速解錢糧等事一疏又具爲錢糧拖欠日多等事一疏又具爲秦川兵餉半年無支等事一疏備將怠玩催徵司府州縣各官節次題參俱奉

旨降罰遵行在案但此案奉有嚴查具奏之

旨臣將從前怠玩各官旣已逐案疊疏參罰無可再參矣今據藩司詳稱節年未完錢糧各官疊受考成縱官盡黜革而民盡捶楚無益軍餉總由荒亡之所累也除未完錢糧臣一面仍行嚴加督催外旣經該司呈詳前來臣謹核明具

題伏乞

勅部覆議以結

欽案施行

順治十三年十月二十四日具

題奉

旨該部知道

題爲鄰盜流劫縱橫衙蠹窩隱非法特

請

嚴旨申飭以期盡獲以靖盜源事據山西

按察司呈前事等因該本司按察使

楊思聖看得張鵬蛟等係劫縣大盜

蒙憲移文井陘道緝拿今准回稱知

情遠遁無從捉獲則此案何日歸結

或再請移文井陘設法密緝或別賜

定奪伏候詳裁等因呈詳到臣據此

除批行該司仍一面移文井陘道設法躡緝外該臣看得盜賊糾覓流毒緝捕不容少寬衙役窩盜庇奸尤爲地方大害晉省徐溝太谷清源等縣前罹夥盜越城行劫官舍已經臣備查隱匿不報情由兩疏

題參奉

旨將印捕等官俱分別究處矣但向日行劫盜賊未經緝獲故臣備行各道設

法廣捕適河曲縣于二月內亦經盜賊越城劫掠縣官財物當被捕快追緝擒獲十一名祇因拒捕受傷悉斃於獄惟存田四兒王天友二犯提至省城會審供稱行劫徐溝四兒與天友俱在其內至第二次行劫太谷雖未得手四兒與天友亦在其中究其餘黨則歷歷供指如賊魁張鵬蛟等俱係真定深州人也卽四兒亦冀州

人氏且所供各賊住址皆確確有據是歷劫晉省各縣之賊皆係直隸真保之人飽颺而去三窟深藏從何躡緝及臣移咨直隸撫臣併行臬司移關彼處道府密緝止據深州緝解賊犯一名駱時榮前來研鞫情詞則所供與四兒等無異其所供行劫清源情節更宛然不虛及究其同夥亦卽四兒所供之張鵬蛟等也是鵬蛟等

委係隣疆巨盜遊劫各省已非朝夕矣再究其窩藏之處則供係深州快手劉繼環陳諫伯高少台三人庇護蓋各盜以繼環等爲盟主而月交賍銀以爲護身之地而繼環等又藉鵬蛟一夥兇徒以充鷹犬指揮流劫坐地分贓如遇提緝卽預通線索俾令潛踪誠狼狽爲奸者也故此夥賊盜不劫商旅不掠民舍而歷供皆入官

署而劫官資此由繼環等身係衙役
備知官衙可劫故發縱指示止劫印
官也今據臬司詳覆准并徑道關稱
賊犯張鵬蛟等知情敗露遁跡無踪
衙役劉繼環等一稱發配一稱緣事
一稱奉差然則此等巨盜大窩豈可
置諸不問以致羣兇肆毒於隣境無
已乎臣以隔屬不便嚴提必須請
旨申飭其夥賊田四兒等已經奉

旨正法臣思已獲賊犯雖經正法未獲夥
盜自應嚴緝庶可以結晉中之案為
此據實具疏謹會同督臣張玄錫按
臣高爾位合詞亟

請伏乞

皇上嚴勅直隸撫道諸臣將涿州積盜張
鵬蛟趙大賈三李九節王毛子史長
春駱洪芝俱密行着落該州衙役劉
繼環陳諫伯高少台盡行捕緝務在

必獲移解晉省以憑審明結案以靖盜源庶巨盜不致兔脫而窩盜之衝蠹知有法紀矣

順治十三年十一月十六日具

題奉

旨張鵬蛟等着兵部速遣員役密行緝獲交與該地方官押解晉撫審擬具奏

題爲遵

諭敬陳職掌清查里馬錢糧事據山西驛傳道呈該分巡冀寧帶管清軍驛傳鹽法道馮僉事看得晉省里甲夫馬錢糧已經查照繁簡酌議減裁造冊呈送部算夫馬共裁銀壹萬陸千肆百捌拾壹兩肆錢柒釐零今照原冊底檢查算止該壹萬陸千肆百柒拾捌兩肆錢柒釐捌毫部多算銀貳兩

玖錢玖分玖釐貳毫又查得大路衝
繁等事一案內沁源縣有外雇民馬
銀陸拾兩議裁三分之一該裁銀貳
拾兩武鄉縣外雇民馬銀叁拾兩議
應全裁因遵

諭敬陳一案二縣遺漏未造又太平縣原
額夫壹拾肆名後定賦役止留銀柒
拾伍兩陸錢前議止裁銀壹拾玖兩
壹錢陸分今議裁應三分之一比前

多裁銀陸兩肆分又澤州應裁馬捌
匹該銀貳百捌兩又聽雇馬銀壹百
肆兩應裁三分之一銀叁拾肆兩陸
錢陸分陸釐陸毫柒絲比前多裁銀
壹兩叁錢捌分陸釐陸毫柒絲今備
查入通共裁銀壹萬陸千伍百叁拾
伍兩捌錢叁分肆釐肆毫柒絲業今
咨戶部允行兌撥兵餉除一面行令
各府州轉行所屬州縣先行追完貯

庫候充兵餉外相應呈詳合候具

題等因呈詳到臣據此該臣看得各州縣設有里馬及接遞損轎等夫所以迎送往來滿漢官員與夫一應差使勢不可缺舊以州縣之衝僻額定夫馬之多寡所從來矣及本年閏五月內接准部咨奉

旨勅臣斟酌地方繁簡差使多寡量減三分之一以充兵餉該臣檄行驛傳道

造報如太原府屬陽曲徐溝二縣原未設有里馬損轎等夫無憑議裁其祁縣平定壽陽及平陽府屬之臨汾洪洞趙城安邑等州縣俱路當子午要衝免行議裁外其餘州縣次衝者遵減三分之一偏僻者卽議全裁通省每歲共議減夫馬銀壹萬陸千有餘業經臣覆核明白造冊報部矣嗣准部咨着臣自行具

題一面將所裁銀兩先行催完貯庫候
充兵餉該臣復行該道再加詳核今
據該道查照報部原冊增入遺漏續
裁等項四府三州通共應裁夫馬銀
壹萬陸千伍百叁拾伍兩捌錢叁分
肆釐肆毫柒絲此係實裁銀兩之數
核明無異者也但夫馬工料銀兩乃
按月支給以資馬騾飼秣夫役養贍
者向來不容壓欠裁減之議閏五月
方准部咨六月內始行定議至今方
在具

題議裁馬騾尚在喂養未經奉

旨發落今准部咨責令先行催完貯庫又
令將晉省不敷兵餉于裁減夫馬銀
內動支則從前半載給過工料銀兩
業經夫馬支領食用將從何而扣追
乎且所裁馬騾草料既已奉文充餉
則此後喂秣業已無資今或應議令

變價起解或應發補衝要驛站俱未
蒙部議詳示是不但上半歲支給過
之工料無可扣追卽下半歲無草料
之馬騾憑何喂養見今各州縣官吏
紛紛申訴誠出于情理之固然也今
臣謬議自七月以後喂馬之資不得
不責令印官賠補而七月以前之工
料斷斷難以行追者也裁減銀兩相
應以七月初一日爲始責令各州縣
照數交庫以充兵餉庶爲妥便理合
一併題

請除裁減夫馬并銀兩數目文冊送部查
核外臣謹會同督臣張玄錫合詞具
題伏乞

皇上睿鑒

勅下該部一併議覆施行

順治十三年十一月二十日具

題奉

撫晉奏議
卷五
旨該部核議具奏

題爲封疆未可玩視等事據山西布政
司呈該本司左布政使彭有義看得
秦餉爲第一急需誠不容於緩視向
緣徵解愆期致蒙王與固山大聲疾
呼密疏入

告奉行之初本司凜如履冰若坐針席隨
分投差人守催及呈委各府糧官躬
詣嚴比迄今次第完解約十分之八
九矣所欠者非節年之荒亡卽本地

之兵餉虛懸莫追徵解無門業已
詳本院批允具

題另請改撥矣今復奉

旨行查職名除本司衙門正署各官以及
完欠分數蚤已確查造冊與同各府
州縣經徵職名呈報本院

題叅訖擬合再行補報至於督撫鹽三
院職名自是本院爲政非本司所可
擅開也其運司本年鹽課蓋已十分
通完所有該司職名相應併行呈報
伏乞本院嚴核具

題施行等緣由蒙批細繹部咨備查督
撫藩司御史運司各經手月日督催
分數則各衙門之經手分數俱當犁
然明白庶便具

題今該司不將三院經手月日分數詳
報而諉之于本院本院曷從而知之
且三院及該司之分數務須確查開

報以聽

廟堂處分何可以先經造報

題叅便不以分數確報也限期已屆仰
司卽日確查具簡明揭帖詳報毋遲
毋忽速速繳等因蒙此該本司左布
政使彭有義覆詳看得奉

旨行查職名本司敢不凜遵今查順治十
三年分節次奉部于山西十三年正
賦并節年拖欠及額編兵餉內共撥

秦川餉銀壹百叁拾貳萬捌千陸百
肆拾肆兩肆錢貳分叁釐乃係一歲
催解之數今歲冬季應輸錢糧正在
徵收所撥餉銀以一歲計算扣至十
月終止該分經催銀壹百壹拾貳萬
肆千貳百叁拾柒兩伍錢零內總督
部院馬 自順治十三年正月初

一日起至本年六月初八日止該分
催銀陸拾肆萬肆百柒拾肆兩柒錢

肆分米釐已完銀肆拾壹萬貳千玖拾伍兩肆錢玖分未完銀貳拾貳萬捌千叁百柒拾玖兩貳錢伍分米釐總計以十分爲率已完六分四厘之上未完三分五厘之上總督部院張玄錫自順治十三年六月初九日起至今止該分催銀肆拾捌萬叁千柒百陸拾貳兩捌錢肆分壹釐總計十分通完巡撫都御史陳應泰自順治

十三年正月初一日起至本年二月二十四日止該分催銀壹拾捌萬叁千玖百陸拾陸兩壹錢伍分壹釐總計十分未完巡撫都御史白 自

順治十三年二月二十五日起至今止該分催銀玖拾肆萬貳百柒拾壹兩肆錢叁分米釐已完銀捌拾玖萬伍千捌百伍拾捌兩叁錢叁分壹釐未完銀肆萬肆千肆百壹拾叁兩壹

錢陸釐總計以十分爲率已完九分五厘之上未完四厘之上巡鹽御史朱紱自順治十三年正月初一日起至本年七月二十七日止該分催鹽課銀捌萬壹千伍百肆拾伍兩肆錢伍分伍釐總計十分通完巡鹽御史焦毓瑞自順治十三年七月二十八日起至今止該分催銀肆萬捌千肆百伍拾肆兩伍錢肆分伍釐總計十

分通完布政司經催署印守寧道右叅政王舜年自順治十三年正月初一日起至本年三月十八日止該分催銀貳拾陸萬伍千柒百貳拾捌兩零已完銀壹拾伍萬未完銀壹拾壹萬伍千柒百貳拾捌兩零總計以十分爲率已完五分六厘之上未完四分三厘之上署印陞任右布政使加一級潘朝選自順治十三年三月十

九日起至五月十三日止該分催銀壹拾捌萬柒千叁百柒拾貳兩玖錢零已完銀壹拾陸萬未完銀貳萬柒千叁百柒拾貳兩玖錢零總計以十分爲率已完八分五厘之上未完一分四厘之上掌印見任左布政使彭有義自本年五月十四日起至今止該分催銀陸拾柒萬壹千壹百叁拾伍兩柒錢零已完銀伍拾捌萬伍千

捌百伍拾捌兩叁錢零未完銀捌萬伍千貳百柒拾柒兩肆錢零總計以十分爲率已完八分七厘之上未完一分二厘之上河東運司見任運使冀如錫自順治十三年正月初一日起至今止該徵鹽課銀壹拾叁萬兩總計十分通完等因呈詳開報到臣據此該臣看得十三年分節次于山西本年應徵錢糧并額編晉營兵餉

及節年拖欠銀內撥解秦川兵餉銀
兩乃秦川官兵計口養命之需自應
按期徵解難容延緩臣自蒞任以來
檄催守催復委四府管糧通判親詣
各州縣督徵并提各州縣經承臣親
加究比絡繹起解似已竭盡其力業
已彙疏上竢

宸聰并將未完催徵各官節次據實
題參奉

旨處分在案其未完者一係舊欠荒亡遺
累一係晉兵缺餉難支勢不得不剋
肉醫瘡仍將額編兵餉給發以濟然
眉亦經臣于本年十一月初八日
題爲秦川兵餉半年無支等事疏內俱
明白備陳仰祈

皇上勅部覈覆矣今准部咨查取督撫藩
司巡監御史運司職名督催分數到
臣臣行據藩司逐一分晰起止日期

經催錢糧已未完數目分數前來臣
謹會同督臣張玄錫合詞題

報伏乞

勅下該部查照議處施行

順治十三年十一月二十日具

題奉

旨該部核議具奏

題爲遴補要地中軍以重邊防事竊照
鴈門一帶爲晉邊東路地處衝要四
塞環山夙爲盜藪而鴈平兵備一道
駐劄代州居中彈壓其所屬北樓平
刑茹越小石等處及五臺崞縣繁峙
等邑俱係極衝最疲之地且該道因
餉司奉裁之後兼管三關兵餉政務
殷繁與他道不同其所以資傳宣而
供查飭邊防者道標中軍一官實要

職也必得謀勇兼資熟知邊務者方
克勝任臣近閱邸報見該道中軍常
道明已陞延綏撫標右營遊擊矣所
遺員缺尚未推授今查臣標中營外
委千總徐揚威禔躬謹飭技射優嫻
向任平樂營把總歷著多功及拔臣
標千總深稱厥職効力既已多年疊
經獎叙在案且向同滿漢將領進勦
臺山深得其力蓋本官家世屬代熟

知彼處邊境故所到得以成功業經
前撫臣陳應泰復

命題薦奉

旨紀錄在部且經臣咨送兵部見在錄功
酌用今若以本官卽補鴈平兵備道
標下中軍誠爲駕輕就熟深可資其
一臂之用臣固因地擇人更亦因人
器使實爲最便也臣謹會同督臣張
玄錫合詞具

題伏乞

皇上睿鑒

勅部議覆施行

順治十三年十一月二十日具

題奉

旨兵部議奏

撫晉奏議

數

清查河灘塞地疏

清查節年存剩官支銀兩疏

二次請豁晉省荒三糧銀疏

報軍犯安回子脫逃疏

題爲查取逋欠秦餉最多催解最玩職
名以憑特疏

題叅以儆怠吏事據山西布政司呈蒙
巡撫白都御史憲牌前事照得秦川
兵餉急如星火疊經平西王及秦督
具疏題催節奉

嚴旨切責查叅本院檄催提催復委四府
糧官躬詣各州縣守催不遺餘力報
解者固多而怠玩不應者不少茲准

撫晉奏議

目錄

卷六

查叅未完秦餉獨多孫自俊等疏

請除滿兵圈過民田地糧疏

叅沁州千總王一經剋軍疏

議慶賀委官兼賫疏

題臨汾機戶苦累疏

清理人丁地土疏

部咨見在查取督撫藩司職名

功令如此森森若輩仍然泄泄卽如昨
據平陽府管糧官呈報安邑縣節年
逋欠秦餉五萬有餘聞喜縣節年逋
欠秦餉六萬有餘通不徵解在九十
等年未完猶可諉曰荒歉今年處處
豐登或未完萬餘或五六十兩藐不
徵解催檄如雨置若罔聞深爲可恨
想如此怠吏不獨二邑爲然若不備

查摘叅請

旨重處則本院與該司代人受過而若輩
反恬不知儆深非法紀合行亟查爲
此仰本司官吏照牌事理卽查通屬
逋欠秦餉州縣印官某官逋欠獨多
督催最不應手卽取職名備敘怠玩
情節詳報以憑指叅重處以儆怠玩
毋得徇忽遲延蒙此該本司左布政
使彭有義查看得錢糧爲軍國急需

換舊奏議 卷六 二
催徵實有司首務必其十分通完方
爲克稱厥職縱使撫字心勤而催科
政拙終亦非賢吏也况近日考成

功令嚴如秋霜凡有催徵之責誠當不
寒而慄無奈晉中疲玩成風動輒諉
以荒亡及前官逋欠悠悠忽忽徵解
不前本司坐守省會日承本院耳提
面命近火先焦而各屬衰如充耳痛
癢弗關任其大聲疾呼竟莫以應若

不嚴行摘叅懲一儆百則錢糧終無
完期緩急更何以濟今蒙憲檄下詢
謹將拖欠最多與催徵最疲者先揭
四人焉合無請乞本院大奮威靈嚴
行糾叅從重處分以爲怠玩者戒

國課幸甚本司幸甚討開安邑縣見任
知縣孫自俊聞喜縣見任知縣劉珏
代州見任知州朱麟祥興縣見任知
縣陳鎰等因呈詳到臣據此該臣看

得晉省節年未完錢糧及本年正賦
盡經戶部撥兌各鎮兵餉秦川尤多
而且急疊經秦省

題催節經奉

旨嚴飭屢經檄臣查叅是考成之法不爲
不嚴矣春夏之間臣以檄文嚴催勒
限徵解自秋以來或差役守候或提
經承嚴比甚至復委四府管糧官躬
詣各州縣督徵催解是督催之法又

不爲不急矣其間有凜惕

功令而多方勸徵絡繹起解者或有地
方委係荒殘將見年之賦盡已完解
惟從前未完少有逋欠者情俱可原
乃有安邑縣知縣孫自俊者自八年
起十三年止共未完銀五萬一千一
十三兩零又有聞喜縣知縣劉珏者
自八年起十三年止共未完銀六萬
五千一百五十五兩零又有代州知

州朱麟祥者自八年起十三年止共未完銀二萬五千九百二十二兩零又有興縣知縣陳鎡者自八年起十三年止共未完銀一萬一千三百二十九兩零以上未完俱係部撥秦川兵餉四官雖任有淺深之不同而怠玩則一雖地有腴瘠之不同而逋欠獨多臣不敢以屢經叅罰便爲寬假故復行司備查徵解最玩者得此四

人若不特行摘叅請

旨從重處分則人人效尤怠吏何以知儆兵餉何以得完臣謹會同督臣張玄錫合詞特疏

題叅伏乞

皇上下大奮乾斷

勅下該部將孫自俊等從重議處或竟行革職責令徵解完日聽臣疏

請開復庶臣等得以仰邀

皇上之威靈而督催有濟矣

順治十三年十一月二十四日具

題奉

旨該部嚴察具奏

題爲亟請撥發秦省不敷兵餉事據山西布政司呈該本司左布政使彭有義看得絕宗自置民地向因滿兵圈兌占種所有隨地民糧尚未豁除百姓有重複之累前已確查委無完納並未徵收在官無容再議惟是糧銀數目未明致蒙憲檄復查今據該府統將圈過絕宗民地應豁錢糧歷年分晰明白確詳前來相應呈請合候

本院具

題等因呈詳到臣據此該臣看得錢糧從地出有地方有糧此不易之理也七八九十年間撥發滿兵在晉省住種園過陽曲太原忻州三處民間地土俱于王田并絕宗地內照畝兌還除王田內撥還地畝租課已經開豁外尚有兌過絕宗自置民糧地畝應納稅糧自應一併開豁者因從前未

經咨

題明白以致百姓有一地兩糧之累哀籲不已業經臣備咨戶部開豁而戶部復咨行着臣自行具

題并查已徵在官并拖欠在民數目臣檄行藩司確查去後今據司府詳稱地既兌撥錢糧何輸卽徒事徵比誰肯完納前咨稱有已徵在官者蓋就百姓本身之糧而言非此絕宗之糧

也蓋滿兵圈種民田而以絕宗自置民田兌還則小民孰肯以一地而輸二糧此必不得之數也既據該司備將陽曲太原忻州三處應豁錢糧分晰明白前來臣查核無異相應具題伏乞

勅部覆議開豁施行

順治十三年十一月二十四日具題奉

旨戶部知道

題爲特糾剋餉厲軍所官以肅軍政事據帶管守南分巡冀南道副使董顯忠呈前事等因到臣據此該臣看得武弁職司防練務期潔已恤兵方爲稱職晉省沁州一城處萬山之中夙稱疲敝本城設立千總一員統兵二百名端資防守且此官係該所印官又有徵收屯糧之責職雖么麼亦要地之要弁也不期有該所千總王一

經者貪婪成性罔恤軍兵前赴屯所
徵糧不能善爲勸輸致被屯丁驅逐
大乖職守臣正在查叅乃不意其尅
餉厲軍又復如是雖侵尅各款出自
兵丁所訐然而該弁之貪橫躁妄實
已著聞該道巡歷其地闔營兵士敢
明目張膽而告之則必事事皆有實
據矣豈可尚容一日在于兵士之上
乎所當革職提問追擬以肅軍政者
也除一面行道查究外緣該弁係部
推之官相應具

題爲此謹會同督臣張玄錫按臣高爾
位合詞上

聞伏乞

皇上睿鑒施行

順治十三年十一月二十四日具

題奉

旨王一經着革了職併本內有名人犯該

督提問追擬具奏該部知道

題爲慶

賀事據山西布政司呈稱照得順治十

四年正月三十日恭遇

萬壽聖節又二月初八日恭遇

皇太后聖誕例應本司堂上官一員捧表慶

賀以盡臣子

嵩祝之誼但查本司右布政使尚未到任
糧儲道已經裁缺而分守河東與分
守冀南二道俱已陞轉新官未到惟

有守寧道叅政王舜年不惟有地方
兵馬之責抑且見署右轄事務清理
廢藩王田勢難分身齎捧本司再四
思維不得不從權呈請今查按察司
已委岢嵐道副使馬燁會恭
進合無委令該道一統齎捧在秦中每
有一官代

進之例故敢冒昧呈詳事關

大典本司未敢擅專請乞本院裁酌或先

爲

題明或復別賜定奪等因呈詳到臣據
此該臣看得

嵩呼大典在外藩臬兩司理應拜

進慶

賀表文以祝

天顏有喜

眉壽無疆舊例藩臬二司各應堂上官二

員捧

表慶

賀今臬司已詳委岢嵐道臣馬燁曾齎捧矣其藩司應委官員查右布政臣潘朝選陞河南左布政使業已赴任分守河東道臣薛陳偉陞薊州兵備道見在就道分守冀南道臣袁一相陞任陝西按察司亦已西行糧道新經裁併則藩司之官僅有一分守冀寧道臣王舜年見兼右轄事務目今

奉

嚴旨清察廢藩田產綜覈督催正藉本官釐剔且該道駐劄省城有地方兵戎重責難以刻離故藩司有議委岢嵐道一併齎捧之請臣以

華祝鉅典臣子理應虎拜稽首以頌天子萬年更遇

皇太后聖謨允宜添籌海屋共慶

同陵億載可否兼捧不敢擅專相應具疏

題

請伏乞

皇上睿鑒

勅部議覆行臣遵奉施行

順治十三年十二月初六日具

題奉

旨該部知道

題爲乞查包匠疾苦以救蟻生事據山西布政司呈該本司左布政使彭有義查看得平陽織造匠戶故絕已久株連苦累匪朝伊夕今幸逢有應裁募之行

皇仁浩蕩可謂體恤窮簷至矣所以伊等嘵嘵控訴不啻至再而至三節經該道府確詳前議欲照額絲募匠仍照匠供費業已具悉前詳茲不爲之復

賁也欲與苦累悉在斯舉舍此別無
良策矣所有原額絲價銀兩並額解
絲數既經該道府覆查前來本司遵
蒙憲示覆查無異相應呈詳伏候本
院具

題等因呈詳到臣據此該臣看得平陽
府屬每年額解綾絹五百五十疋乃
上供必需任土作

貢小民所應竭力而承辦者曷敢以困

苦而疾首相告也然苦累至極力不
能支時異勢殊情實可憫則又不得
不通變而體恤之查額解綾絹其應
用之絲雖係各州縣照額起解獨責
令臨汾縣機戶織解役號堂長戶名
匠戶專司杼柚不事耕耘此乃明季
設立所從來矣向雖亦稱苦累然而
機戶繁盛應役有人尚可勉力支持
迨自我

朝鼎定改解折色各機戶之積困頓蘇莫
不歡呼手額自九年起仍解本色不
得不復拘舊機戶而承造也但各匠
戶自罹姜逆變亂復遭連歲災青戶
絕人亡見存十無一二又遺戶甲包
賠之累工食盤費等項數至八百餘
兩粉骨莫措故左登雲等情迫而哀
控不已向經前院臣陳應泰具

題部覆行臣仍按歲照原額徵解至于

機戶應裁應募責地方官加意寬恤
毋致偏累奉有依議之

旨仰見

皇上視民如傷之懷不以匠役而少忽也
今行據司道府縣會議各州縣有歲
解之絲多寡不等每絲三十斤募匠
一名照絲一斤議徵工費銀六錢載
入由單共約徵銀八百兩以爲覓匠
工食起解箱槓盤費之資經臣再三

批駁舍此別無良策允屬衆擎易舉
上不悞公下不病民經久可行之議
也既經該司呈詳前來臣謹會同督
臣張玄錫合詞具

題伏乞

皇上俯念平陽匠戶困苦已極

勅部覆議行臣等遵奉施行

順治十三年十二月初九日具

題奉

旨該部議奏

題爲清理人丁地土以裕

國用事據山西右布政使潘朝選呈看

得晉省所屬隱匿丁地先經奉

旨責令董右布政使清理嚴查業經通行

所屬州縣查報造冊呈詳前院具

題下部隨蒙部覆比照東省清出之數

甚少恐有徇隱遺漏之弊仍請責令

廉幹道臣再爲清理嚴查誠爲裕

國詳慎至計也今復遵奉

俞旨行令守巡兵備九道就近各本各屬
凡有遺漏丁地務要逐一清釐盡數
查報入冊去後節准各道清釐造冊
送司本司綜覈查美除從前清出無
根地畝并新收土著幼丁及久寓流
民應徵糧徑銀壹萬陸千伍百玖拾
柒兩捌錢零外今准各道覆查又清
出額外無糧民王田地共貳百貳拾
捌頃肆拾叁畝壹分壹厘壹毫玖絲
各照地色不等起科共該徵本色租
糧壹拾壹石壹斗貳升叁合伍勺伍
抄共該徵折色糧壹千柒拾捌石壹
升壹合叁勺共該徵折色銀壹千貳
百柒拾肆兩玖錢柒分壹毫肆絲又
清出土著幼丁并久寓流民共壹千
壹百陸拾肆丁各照門則不等共該
徵徑銀叁百伍拾捌兩玖錢陸分玖
厘伍毫又清出近寓流民捌百肆拾

捌丁俟伍年後編差以上各道清出
地丁數目雖云爲數無幾然已殫心
盡力可謂搜剔無遺矣既經各道逐
一清查造冊前來本司綜核明白彙
冊相應呈送本院裁閱具

題庶便轉行所屬遵照徵解施行等因
呈詳到臣據此該臣看得曾天莫非
王士率土莫非
王臣奚容地有隱占而不輸

國賦丁有遺匿而不納徭銀自處化外
者哉故清釐地丁一案非特裕餉之
良籌實乃經

國之至計凡屬臣工孰敢不竭盡心力
以期盡數清出俾豪右無朦隱之弊
也耶但查此案前奉部文徹底稽核
已經查出隱匿地畝并人丁應徵糧
徭銀壹萬陸千伍百玖拾柒兩捌錢
零本色糧肆拾貳石叁斗肆升貳合

零該前撫臣陳應泰會疏題

報矣而部覆惟恐隱匿者未能盡行釐剔

故仍責遵照

前旨令廉幹道臣逐一清理毋致徇情遺漏奉有依議之

旨前撫臣陳應泰因晉省地方遼濶恐一道臣不能周流遍歷議委守巡兵備九道各查各屬仍責右布政司綜核彙報臣自蒞任之始檢閱此案知係

國家重務隨嚴責司道履畝確查勿得瞻徇情面少有寬假務俾隱占弊絕丁地力清毋致遺漏復疊經行催駁查去後今據右布政使潘朝選開報除前查出丁地已入冊起科外今又續清出無糧民王田地貳百貳拾捌頃肆拾叁畝零土著久寓流民共壹千壹百陸拾肆丁貳項共徵本色糧壹拾壹石壹斗貳升叁合零折色糧

銀壹千陸百叁拾叁兩玖錢叁分玖厘零應自十三年起科連前清出無糧地畝人丁糧徭共本色糧伍拾叁石肆斗陸升伍合零折色銀壹萬捌千貳百叁拾壹兩柒錢叁分零又查出近寓流民捌百肆拾捌丁俟五年後編差此乃各道查出之數咸稱逐村履畝悉力搜求傳集地方約保論以利害並無隱漏情弊者矣既經該司綜核彙冊前來除查出丁地應徵本折糧徭銀兩數目文冊咨送戶部查核仍備取各道印結存案外臣謹會同督臣張玄錫按臣高爾位合詞題

報伏乞

勅部覆議行臣等遵奉施行

順治十三年十二月十六日具

題奉

旨着察核戶部知道

題爲清查河灘塞地以杜侵漁以佐

國用事切照曾天

王土不容欺朦凡係公財難憑濫費臣才
識疎庸謬忝重寄待罪以來日惟兢
兢以清理隱佔稽覈錢糧爲首務蓋
深知

國用浩繁司農仰屋凡有可以從地方
釐剔以少效涓滴之濟者不敢不竭
盡心力也除奉

旨行查清理地丁一案臣已嚴查明確另
疏具

題外臣復案查晉省各州縣尚有河灘
塞地一項共地貳千貳百餘頃每年
該徵租穀叁千伍百有零折色銀玖
百貳拾餘兩緣此項地畝皆在河畔
水濱倏坍倏漲滄桑不定如今歲水
涸土浮便可量種雜糧倘明年水漫
土沒不能復事耕勸故不入於賦役

之內在明季之時原所以充道將操
賞及孤貧月糧等項需用地既不在
版圖糧亦不歸正項所從來矣自順

治三年經前院臣申

具疏

題明留爲地方公用以資水旱災傷賑
濟之需迄今多年並未清楚故臣嚴
行布政司逐年確查所收本折支銷
存剩數目併設法清查有無續淤河
灘地畝去後隨據該司左布政使彭

有義查看得太平潞汾四府澤遼沁
三州各所屬州縣衛所有舊額河灘
砂鹹山淤塞田地畝一項每年徵納
本折不等乃係賦役額外之數今蒙
本院檄行清查題

報誠裕

國用而濟軍需之至意但此項地畝除
代州繁峙五臺崞縣四處山糧卽係
屯糧已載入經制以充鴈平道屬營

兵月餉無庸再議外其餘州縣衛所

地畝每歲河崩水渰不常雖有地租

之名而節年無完納之實卽已完者

歷經各院道府等衙門或動給孤貧

或獎賞節孝或鼓勵降丁或犒賚防

河兵士或修理城垣或置造火器或

賑恤貧生等項節年俱已動用今查

四年起十二年止見存倉貯租穀共

肆千柒百柒拾柒石叁斗肆升叁合

取今見存庫銀共叁千壹百貳拾兩
陸錢貳分陸厘玖毫捌絲肆忽玖微
尚有未完租穀銀兩見在查催陸續
完納至奉本院嚴查續淤地畝今確
核共續查出塞田砂磧河灘地肆百
捌拾肆頃陸拾貳畝柒分叁厘每年
該徵本色租穀柒百叁拾捌石肆斗
捌升捌合自十三年起科同前項地
畝十三年應徵租課俟各州縣徵收

完報一併彙冊呈報者也今將節年
已未完并各衙門動用過數目造冊
相應詳報統祈本院覆核具

題以便遵守等因呈詳到臣據此該臣
看得晉省河灘一項係黃汾諸河貼
岸淤漲荒鹹之地而塞田一項又係
山磧溝澗砂灘之土俱漂塌靡定旱
澇不常非額定可種之地畝也每年
雖定有租課而完欠不能如額臣蒞

任後檢查卷案閱此項地畝每年應徵租課爲數不少似宜清出以佐

國用不宜因循動用致有濫觴故特行藩司逐年徹底清查今據冊報前撫臣申向日題

報之內除代州繁峙五臺崞縣山糧原係屯糧已載入經制充爲鴈平道所屬各營月餉外又太平介休二縣地陸拾伍頃柒拾貳畝玖厘捌毫係重複

開報冊內登荅明白相應開除外原額河灘塞田共地貳千壹百叁拾柒頃柒拾叁畝玖分柒厘貳毫每年應徵本色谷叁千伍百叁拾貳石壹斗陸升九合捌抄折色銀陸百柒拾陸兩陸分捌毫零又臣續查出芮城水泉等處河淤塞田地肆百捌拾肆頃陸拾貳畝柒分叁厘該徵本色谷柒百叁拾捌石肆斗捌升捌合已責令

自十三年追徵租課其前額河灘塞地自四年起至十二年止節年租課內有院道府州縣勸濟孤貧孝子節婦貧生貧民與夫修城製繕器械火藥鼓勵降丁犒賚防河官兵羊酒支用并被賊搶掠及各處荒蕪水衝漂沒地畝未徵租課臣已駁查再四俱卷案有據竝非侵欺朦蔽似宜准其開銷者已將備細數目開載冊內至于見貯倉谷共存肆千米百米拾柒石叁斗肆升叁合玖勺見貯庫銀共存叁千壹百貳拾兩陸錢貳分陸厘零所當將存谷悉行變價并存銀一同解部充餉以佐

國用者也其節年未完租谷銀兩併十三年分徵收銀谷俟各州縣報齊容臣另冊開報解部至於此項地畝委係濱河沙磧之地消長靡定不能預

定其數自今十三年爲始嗣後唯于
年終將徵收過實在地畝銀谷數目
造冊報部其銀解部充餉其本色谷
石或仍照前撫臣申 前題留爲
本地以備水旱災荒賑濟之用或行
令變價併解總聽

皇上睿裁除節年定欠支銷文冊咨送戶
部查核外相應據實題

報伏乞

勅下該部覆議行臣遵奉施行

順治十三年十二月十六日具

題奉

旨着察核該部知道

題爲恭

報清出節年存剩冒濫官支銀兩以佐

國用事切惟錢糧關繫

國計錙銖不許濫費故凡賦役額載倉

口無論起解存留務期支銷清楚各

依款項無容混淆者也况今值財賦

匱乏之時軍需浩繁之候司農無點

金之術每以入不敷出百計減裁得

一分即可佐一分實用此誠我

皇上宵旰憂勞之日臣子仰屋莫籌之際也臣裕

國有心理財無計今查晉省有官支一項載在賦役乃係存留錢糧每年額該銀壹萬壹千叁百肆拾叁兩叁錢壹分陸毫向來設爲通省各驛支應往來滿漢官員勘合火牌廩給坐司中火口糧及臣衙門經費錄內開載每年應支蔬菜燭炭銀兩等項支用

前因奉

旨置辦牛車以備應付往來滿洲家口及運送秦川軍器等項差使部議卽將此項銀兩動用已經臣于本年四月內題爲遵

諭陳言以備採擇事一疏議將晉省額設官支銀兩自十三年爲始悉供僱覓牛車腳價之費年終報銷奉有部覆俞旨則從今以後一切過往坐司中火俱

盡行裁革而不行應付矣但從前支過銀兩未免中多冒濫且節年各州縣俱有零星存剩不可不亟行清出以佐

國用也除六年以前自羅姜逆叛亂通省蹂躪卷案無存無憑稽查外該臣嚴行驛傳道將各屬支用過官支銀兩備取節年支銷底冊逐年確核多方查駁內除七年分支剩銀兩業經

前撫臣劉

查出解部外今自八

年起至十二年終止共查出存剩零星存貯各州縣銀共柒千玖拾兩玖錢玖厘至于冊報節年應付過往來冠蓋滿洲勘合火牌廩給坐司中火口糧數目有衝繁之地供應浩繁將所額銀兩盡行支給內中少有冒濫者有偏僻處所供應無多其中開銷不當者臣俱一一備細嚴核應開銷

者准其銷筭有冒濫者卽行議追通
省共清出節年冒濫應追銀肆千壹
百叁拾柒兩捌錢貳分叁厘又有平
陽府併陽曲等州縣節年拖欠未完
銀貳千壹百壹拾伍兩壹錢以上三
項共清出銀壹萬叁千叁百肆拾叁
兩捌錢叁分貳厘此臣竭力清出之
確數也雖涓埃無補于江河亦臣微
效區區仰佐

國儲之萬一耳除前項清出存剩及應
追冒濫銀兩行令四府催解布政司
轉解戶部充餉其未完者亦一面嚴
催起解外臣謹據實題

報伏乞

皇上睿鑒

勅部查照施行

順治十三年十二月十六日具

題奉

旨戶部知道

題爲晉省荒亡有據錢糧追徵無由再
懇

睿慈勅部酌議急施調劑之術以援殘黎
之厄事據山西布政司呈蒙巡撫白
都御史案驗准戶部咨山西清吏司
案呈奉本部送戶科抄出該山西巡
撫白
題前事等因奉

旨戶部議奏欽此欽遵抄出到部送司奉
此相應議覆案呈到部該臣等查得

順治四年晉撫祝世昌題免荒地米
萬柒千餘頃內有主荒地叁萬貳千
貳百餘頃免其三年以前錢糧於八
年巡撫劉弘遇題免荒地壹萬伍千
伍百餘頃逃亡人丁拾萬玖千肆百
玖拾丁其地應於十年起課九十兩
年巡撫劉弘遇又二次具

題免過荒地伍千伍百餘頃十二十三
兩年巡撫陳應泰白 五次具

題免過荒地叁千陸百伍拾餘頃於三
年後起課屢經奉

旨蠲免在案查十一年山東巡撫耿惇題
報清出該省丁地錢糧叁拾餘萬恐各省
有如此隱漏錢糧者亦不可定應行
該督撫查明等因具

題行查去後因該撫陳應泰查出銀兩
止壹萬陸千伍百餘兩請免荒地逃
亡人丁錢糧拾柒萬餘兩臣部具

題今正在用兵錢糧不敷之際不能裕
國而反虧

國仍遵

前旨將隱漏地畝逐一清理勿得徇縱冒
免致虧錢糧奉

旨欽遵去後今該撫白

疏稱荒蕪地

墾萬捌千伍百壹拾捌頃逃亡人丁
肆萬柒千貳百伍拾捌丁俱係真荒
真亡毫無假飾等因前來臣等查得

該撫疏內亦未開明請蠲錢糧或係
前荒未開或係續有荒亡既身在地
方不分新舊不經確查何得輕行請
豁相應

勅下該督撫除新荒逃亡不准外前撫祝
世昌劉弘遇題免地畝已經限年起
課其地內續開若干人丁招徠若干
分晰明白若果係無人耕種仍荒者
於文到之日卽速查明具

題定奪可也相應具覆恭候

命下臣部轉行遵奉施行等因奉

旨依議行本內漢字刮一字未寫着填補
欽此欽遵抄部送司奉此相應移咨案
呈到部擬合就行爲此合咨貴撫院
煩爲查照本部覆奉

旨內事理遵奉施行准此擬合就行爲此
仰本司官吏照依咨案遵奉

旨內事理卽便會同右轄速查前院祝

所題有主荒地叁萬貳千貳百餘
頃又前院劉 所題傷亡荒地壹

萬伍千伍百餘頃逃亡人丁拾萬玖
千肆百玖拾丁二項荒地內節年開
墾過各若干招徠人丁若干前院并
本院節次題免過有主傷亡荒地各
若干見今實荒者各若干今次冊報
荒地叁萬捌千伍百壹拾捌頃或係
前荒未開或係新荒要見新荒若干

前荒未開若干未開者內有主若干
前院劉 所題者若干該錢糧若
干俱逐一分晰造冊具詳限三日內
呈送本院并軍門以憑會

題務要切實不得扶隱未便蒙此又蒙
總督張尚書案驗准戶部咨同前事
案仰該司官吏查照部覆奉

旨內事理除新荒逃亡不准外即將前撫
題免地畝已經限年起課其地內續

開若干人丁招徠若干分晰明白若
果係無人耕種仍荒者於交到之日
作速察明造冊通詳以憑會

題施行蒙此除順治四年并八年分前
撫院祝都御史劉都御史題

報有主傷亡荒地內開墾并節次題免過
數目及見荒地畝與夫今冊報荒地
俱備晰冊內外該本司左布政使彭
有義會同署右司守寧道叅政王舜

年覆詳看得晉省荒亡之苦屢經本
司愷切痛陳疊蒙本院繪圖入

告蓋已久在

廟堂洞鑒中無煩爲之再贅今蒙部覆請
查從前兩項未完荒亡誠爲溯源窮
流務求確實至意本司逐一確查分
別已墾未墾併無纖毫餘混獨是今
次所題又有續荒續亡丁地大部以
爲新荒不准蠲除百姓聞之環泣而

擁訴者又已積案盈几然此續報荒
亡蓋係姜逆叛後人民殺擄家資罄
却無力承種以致田土拋荒者亦有
連年水旱災侵頻仍舊欠追徵懼恐
包賠棄家逃匿以致地土復荒者總
緣從前荒亡未豁以致荒者愈荒逃
者愈逃今續荒若不蒙蠲則逃者亦
復觀望誰爲墾舊荒以益

國賦乎無論新舊荒亡總係百姓之疾

苦莫非予黎之遺累然此中又有河
塌水衝無地可以耕種亦無日可以
望墾者忍令其永久包納賦稅而不
之恤乎我

皇上視民如傷必有所不忍也今本司眞
知灼見若不再爲詳請不惟溺職守
而反以殃民生殃民生而因以悞

國計豈職司之所敢出哉合無請乞本
院俯念晉省新舊荒亡委屬眞確再

爲殘黎請命一槩均免庶本司得以
率屬招墾限年起科而安居之民不
萌復逃之心蓁蕪之野將變爲膏腴
之田矣等因呈詳到臣據此該臣看
得晉省荒亡情狀臣前疏業已備悉
披陳不敢再爲瑣

瀆今部臣議覆除新荒逃亡不准外查前
撫臣祝世昌劉弘遇題免過地畝已
經限年起科其地內續開若干人丁

招徠若干分晰明白若果係無人耕
種仍荒者即便查明具

題定奪奉有

依議之

旨臣遵照確查前撫臣祝世昌題過有主
荒地叁萬貳千貳百肆拾伍頃叁畝
零又撫臣劉弘遇題過傷亡荒地壹
萬叁千壹百叁拾壹頃捌拾貳畝零
二項共地肆萬伍千叁百柒拾陸頃

捌拾陸畝零內除節年開過有主傷
亡荒地壹萬捌千陸百玖拾貳頃肆
拾柒畝零又節次題免平定夏縣岳
陽永和吉州大寧永寧州荒地肆千
玖百壹拾叁頃柒拾陸畝零尚有實
荒未開地貳萬壹千柒百柒拾頃陸
拾貳畝零臣前疏所

題民荒地叁萬陸百伍拾陸頃叁拾畝
零民地又河塌貳千叁百肆拾壹頃

肆拾畝零屯荒地叁千壹百柒拾叁
頃壹拾叁畝零屯地又河塌陸拾玖
頃叁畝零王田荒地貳千貳百壹拾
貳頃肆拾玖畝零王田地又河塌陸
拾陸頃肆拾玖畝零以上荒蕪河塌
共地叁萬捌千伍百壹拾捌頃捌拾
捌畝零內有前項有主傷亡未開荒
地貳萬壹千柒百柒拾頃陸拾貳畝
零該本色糧柒百貳拾肆石叁斗柒

升零折色銀玖萬貳千貳百捌拾伍
兩肆錢玖分零又有續荒民地玖千
玖百肆拾捌頃捌拾叁畝零該本色
糧貳千伍百伍拾叁石玖升貳合折
色銀叁萬柒千捌百柒拾玖兩捌錢
叁分捌厘零又有續報河塌地壹千
貳百柒拾捌頃貳拾陸畝零該本色
糧叁石壹斗貳升叁合零折色銀陸
千伍拾壹兩伍錢陸分柒厘零又有

屯地王田荒蕪河塌地伍千伍百貳拾壹頃壹拾陸畝零該本色糧肆千玖百捌拾貳石柒斗叁升柒合零折色銀肆千叁百捌拾叁兩玖錢伍分伍厘零逃故民屯王田人丁肆萬柒千貳百伍拾捌丁該徭銀壹萬陸千壹百叁拾陸兩肆錢捌分柒厘零以上荒地亡丁總由前項有主傷亡地土見今實在拋荒無人開墾因奉文

起科責令見存子遺節年包賠錢糧力盡皮穿以致死者死逃者逃將熟地仍復累荒壹萬陸千柒百肆拾餘頃人丁死徙肆萬柒千貳百伍拾捌丁是以死者累生而生者復死荒者未熟而熟者復荒也若不仰懇

皇恩槩爲蠲豁將來日累日甚恐荒亡又不獨止此數也臣謬膺撫治之任目擊百姓如此疾苦安敢坐視懇祈

皇上早霈洪恩將荒地丁悉行除豁庶
遺黎得以少延殘喘而逃者自是望
風歸業所荒地畝即可漸望開墾以
期漸足額賦矣今行據藩司分晰造
冊前來除冊咨戶部查核外臣謹會
同督臣張玄錫合詞具

題伏乞

皇上垂念晉省災黎困苦已極
勅部再行覆議上

請行臣等遵奉施行

順治十三年十二月二十二日具

題奉

旨戶部核議具奏

題爲申報有文無人乞行嚴查情弊事
據山西按察司呈該本司署印副使
于變龍覆詳看得安回子係奉

旨解發寧化所充軍人犯業奉兵部發有
咨牌行令直省州縣沿途遞解凡經
過州縣印官須差的當衙役晝夜小
心遞解護送交割明白取有前途印
官收領信結存案方妥今查安回子
解至井陘縣印官不差現在衙役令

民壯頭郝興虛報趙朴張亮且二役
奉差在外興又替僱李祿張安奇押
解疎忽以致安回子乘便脫逃止有
空文投遞平定州所以平定申報有
文無人之詳也况部牌內云若有
違錯疎虞地方官叅處井陘縣印官
差人不當縱放軍犯免脫疎忽之罪
自難辭責伏乞憲臺裁酌咨

題行令該縣嚴緝併究疎玩官役庶狡

犯不致漏網而怠玩官役知所儆惕
矣等因并兵部原發護送印牌咨文
詳報到臣據此該臣看得脫逃軍犯
安回子經兵部審明仍發原配山西
寧化所充軍沿途遞解給有護送印
牌及移臣咨文于本年九月十八日
已到井陘而井陘縣應遞解平定州
交割矣乃該縣不行慎重其事惟憑
壯頭報名且不令正身領解輒任其

僱覓管押以致軍犯安回子脫遁無
踪止將空文赴州投遞及該州拆文
點名之際則僱役李祿張安奇預寬
不知何所往矣今批據該司詳覆前
因則疎玩之罪在井陘而不在平定
所當嚴責井陘縣將逃犯安回子勒
限嚴緝并究僱役李祿等縱放情由
以申法紀者也除部牌咨繳兵部外
事關脫逃奉

旨解發軍犯臣謹據實具

題伏乞

皇上嚴勅直隸督撫諸臣責令井陘縣查
緝務獲庶狡犯不致兔脫也

順治十三年十二月二十七日具

題奉

旨該部議奏

